

**EKALESIA FAAPOTOPOTOGA KERISIANO
SAMOA**

**TUSI MO FAIA'OGA O A'OGA ASO SA
SUNDAY SCHOOL TEACHERS TEXTBOOK**

2023



**VASEGA MATUTUA
SENIOR CLASS
(14 – 16 tausaga)**

**MATAGALUEGA O A'OA'OGA KERISIANO
DEPARTMENT OF CHRISTIAN EDUCATION**

**EKALESIA FAAPOTOPOTOGA KERISIANO SAMOA
CONGREGATIONAL CHRISTIAN CHURCH SAMOA**

**TUSI MO FAIA'OGA O A'OGA ASO SA
SUNDAY SCHOOL TEACHERS TEXTBOOK**

2 0 2 3



**VASEGA MATUTUA
SENIOR CLASS
(14 – 16 tausaga)**

**MATAGALUEGA O A'OA'OGA KERISIANO
DEPARTMENT OF CHRISTIAN EDUCATION**

UPU TOMUA

E mua'i faatalofa ma faafeiloai atu i le paia tele o le Eklesia Faapotopotoga Kerisiano Samoa i ona tulaga faalupeina, i le Suafa pele o Iesu Keriso lo tatou Taitai Sili. Ua faamalo le soifua manuia ia outou susuga i Toeaina, susuga i Faafeagaiga, Faifeau, A'oa'o ma Faletua, tainane foi afioga i Tiakono, susuga i alii ma tamaitai Faiaoga o tatou Aoga Aso Sa, faapea foi peresetene ma taitai o tatou Autalavou. Ia viia lo tatou Alii, i la outou molimau atu, o fita i tuga ai mo le Alii ma le Tala Lelei, e ala atu i mataupu a le Aoga Aso Sa ma Autalavou.

Ua tatou talitonu, o le Tusi Paia o le Upu a le Atua mo tagata uma, ma ua i ai i totonu vaega uma ua tatou naunau ia iloa, ina ia tumau mausali pea lo tatou sootaga lelei ma le Atua, ma ia tatou ola ai i le ala tatau e tusa ma lona finagalo. O le mea lea ua tatou talitonu ai, i le matuā taua o le a'oa'oina tatau o fanau laiti ma talavou mai le Tusi Paia. E ao ina a'oa'oina atu ma le faautauta lelei, le uiga moni o vaega o le Tusi Paia ua fia a'oa'oina atu, i se auala talafeagai e tusa ma le matutua ua i ai tamaiti.

1. O le Tusi o Aoga Aso Sa ma Autalavou, ua saunia lava faapitoa mo Aoga Aso Sa ma Autalavou a le Eklesia Faapotopotoga Kerisiano Samoa. O lona uiga o le meatotino lava a le EFKS, e le faatagaina faaletulafono ona toe lomia e se tasi, e aunoa ma le faatagaga a le Eklesia. O lea e fautuaina ai foi le Aufaigaluega, o faiaoga o Aoga Aso Sa ma Taitai o Autalavou, i le taua o le teu faalelei pea o Tusi Aoga, e toe saili i ai mo se fesoasoani pe a moomia.

2. O Mataupu o Tusi Aoga Aso Sa ma Autalavou 2023, ua maua lea i le upega Tafailagi (website) a le EFKS; www.cccs.org.ws. Faamolemole ia fesootai mai lo tatou Ofisa i Mulinuu mo se fesoasoani, ma nisi vaega e fia malamalamā i ai, i le telefoni 24340, po o le e-meli-extneduc@cccs.org.ws.
3. Ua lē o toe fa'aalia i le faasologa o Mataupu i Aso Sa taitasi, vaega masani o le a'oa'oina o mataupu, e pei o le Tatalo Amata, Faafeiloai le vasega, faamanatu mataupu talu ai, tatalo e faapaia ai le sene ma le Tatalo Faaieu. Peitai o vaega masani nei e tatau lava ona fai i Mataupu o Aso Sa taitasi. Ua tuuina atu i Tusi Aoga Aso Sa a le Vasega Amata, Vasega Laiti, ma le Vasega Feololo, fati o pese (nota) fou mo nisi o mataupu.
4. Mo le silafia e Tamā o le Eklesia ma le aufaigaluega faifeau, e i ai le taimi e toe saili mai ai e lo outou mamalu le ofisa o le MAK, mo nisi Tusi Aoga. Peitai, ua māua e le ofisa nei, o nisi tagata, e lē o ni tagata lotu iā tatou, auā latou te leiloa le suafa o lana faifeau. O lea e tatalo atu ai, o le a lē toe taliaina ni tagata faapea e omai i ni Tusi, sei vagana faafeagaiga ma ē omai ma se faamaoniga mai lana faifeau. E lē mafai foi ona faamatuu atu ni Tusi Aoga i nisi o la matou aufaigaluega e aunoa ma se faamaoniga mai le faifeau.
5. Afai ua i ai se lape i le galuega nei, e matua atu i la outou tofā faale-Atua e magalo ai le aufaigaluega vaivai. Pe afai foi e i ai ni fautuaga taua mo le faaleleia atili o le galuega, faamolemole fesoota'i mai lo tatou Ofisa i tuatasī o i luga, pe lafo mai i le Pusa meli 163, Apia.

6. Ua saunia le Tusi Aoga mo le Vasega Matutua e le susuga ia Peteru Seiuli FS, Ietitaia Solipo FS, Semikueva Su'a FS, Isamaeli Aula'i FS, Satala Sa'u FS, Farani Pauga FS, Apelu Lelevaga FS, Panapa Alafau FS, Vaegatootoo Magele FS, Faalefu Tumutalie FS, Falealii Afamasaga FS, Oli Levi FS, Luulau Taulagi AM, Tavita Pulu AM ma Lavea'i Fonomaalii AM.

Ia faamanuia le Atua i le galuega o lenei tausaga, auā le a'oa'oina o alo ma fanau a le Ekalesia, ina ia tutupu a'e ma le fiafia e faitau le Tusi Paia ma ola matata'u i le Atua.

Soifua ma ia manua
O la outou auauna

Māseifua Tānieſu
(Faatonu A'oa'oga Kerisiano)

MATAUPU VASEGA MATUTUA 2023

ASO SA MATAUPU

TUSI FAITAU

IANUARI:

29	Iakopo ma Esau (Aso Sa o Tupulaga)	Kenese 33: 1 – 11
----	---------------------------------------	-------------------

FEPUARI:

5	Loto gatasi e tumau ai, fevaevaea'i e faaumatia ai	Luka 11: 17 - 20
12	Uiga lu'itau	Iakopo 1: 1 – 12
19	Faamāmā le mimita ma le gugutu	Iakopo 4: 13 – 17
26	Lo matou Tamā o i le lagi	Ioane 1: 14 – 18

MATI:

5	Ia faia lou finagalo	Salamo 40: 4 – 8
12	Muātapenaga e faavavau	Ioane 6: 48 – 51
19	A ia lavea'i i matou mai le leaga	Salamo 56
26	Lafoa'i mea tuai ma faaulufale mea fou	Mataio 24: 1 – 14

APERILA:

2	O le meaalofa atoatoa (Aso Sa o le Laupama)	Mataio 26: 1 – 16
9	E te le savali to'atasi (Aso Sa o le Toetu)	Luka 24: 13 – 35
16	Toe amata	Faamasino 2: 6 – 23
23	O ai e alu ae mo i tatou?	Faamasino 10: 6 -11: 11
30	Ua mavae Iosua	Faamasino 6: 1 – 10

ME:

7	Tapuai i totonu o le fale ie	Esoto 33: 1 – 11
14	Upu o le ola (Aso Sa o Tinā)	Mataio 7: 1 – 12
21	O atu ia e faamalolō ma faasaoloto ou tagata	Mataio 10: 1 – 15
28	Tala Lelei mo e sauaina (Aso Sa Penetekoso)	Isaia 61: 1 – 3

IUNI:

4	Ua tanumia e Iosefa le tino o Iesu (Aso Sa o le Tolu Tasi Paia)	Ioane 19: 38 – 42
11	Ua alu ese atu le mamalu o le Atua	Esekielu 10: 1 – 22
18	Faia le finagalo o le Atua	Mareko 3: 31- 35
25	Faamasinoga i ē tuaoi	Amosa 1: 1 – 2: 3

IULAI:

2	Va'ai ma lagona le oo mai o suiga fou a le Atua	Mataio 13: 1 – 17
9	Va'ai mo ni faailoga	Mataio 16: 1 -= 12
16	Alofa e tumau	Salamo 33
23	Faatalitali faamaoni	Luka 2: 36 – 38
30	Iosefa, tu'uina atu i ai le malosi tele	Kenese 41: 33 – 46

AOKUSO:

6	O le Atua na te faia	Kenese 3: 1 – 15
13	O le moe gase a Atamu (Aso Sa o Tamā)	Kenese 2: 21 – 25
20	Lagona o le faagae'etia	2 Korinito 1: 1 – 14
27	Faanoanoaga faa-le-Atua	2 Korinito 7: 2 – 16

SETEMA:

- 3 O le a se anapogi e taliaina? Isaia 58: 3 – 11
 10 Tulafono faigata ma le alofa
 tatau Mataio 19: 1 – 15
 17 E i ai le Tausamaaga maua fua Mataio 22: 1 – 14
 24 Tapenaga a le Atua Salamo 65: 9 – 13

31

O le ala ma le upu moni
 ma le ola

Ioane 14: 6 – 14

OKETOPA:

- 1 I tulu'iga o le lalolagi Galuega 1: 1 – 11
 8 LOTU TAMAITI
 15 Sauniga ma le usiusitai;
 tepa i le Atua Luka 2: 21 – 35, 39
 22 O sefafine tete'e Eseta 1: 1 – 22
 29 O a'u lenei, ia faia lea Luka 1: 26 – 38

NOVEMA:

- 5 E tauau ina itiiti o a'u Ioane 3: 28 – 31
 12 Tioata ua faapogisa Mareko 8: 14 – 21
 19 Tulafono o le ola mamā-
 o le tulafono e fa'aalia ai le
 atoatoa o le Atua Teuteronome 5: 1 -33
 26 O se malosiaga faanatura
 (Sepela ma Pu'a) Esoto 1: 15 – 21

TESEMA:

- 3 Vaega o se tala atoa Esoto 1: 1 – 10
 10 E mai e le Atua ona fa'aaoga
 so o se tagata e folafola Lana
 Upu Efeso 3: 7 – 13
 17 Ola i le malamalamā Efeso 5: 1 – 14
 24 Sa i le amataga le Upu Ioane 1: 1 – 9

VASEGA MATUTUA 2023

ASO SA: **29 JANUARI 2023 (Aso Sa Tupulaga)**

MATAUPU: **IAKOPO MA ESAU (Jacob and Esau)**

SINI: Ia a'oa'o tamaiti o le vasega ia latou iloa.
O le faamaulalo, o se fofõ aoga mo fevaevaeaga.

TUSI FAITAU: Kenese 33: 1 – 11

FESOASOANI MO FAIAOGA:

E mua'i faatalofa atu i susuga i faiaoga ma la tatou vasega i lenei taeao. Malo le folau ma le soifua manuia, ua tatou toe fetāpai foi i lenei tausaga fou 2023, i le alofa o le Atua.

Ua tatou iloa uma Esau ma Iakopo o agai i ai la tatou mataupu o lenei Aso Sa, o le masaga tama a Isaako ma Repeka. Peitai, e le mafai ona lautele la tatou mataupu e uiga i tama ia, pe a tatou le iloa ni talaaga e uiga ia laua; O a ni a la mea sa fai? O fea sa i ai?, auā o le tala sa faitau nei, o iloa mai ai, o lea faatoa toe fetaiai ua leva ona valavala.

O le Kenese 27: 1 (ff), o lo o ta'uua ai le mafuaaga o le nonofo valavala o Esau ma Iakopo, ona o le mea na tupu, na ala ai ona maua e Iakopo faamanuiga e tatau ona maua e Esau e matua. Taatia la le lavelave o lea vaega, pau le itu taua, o lea ua iloa le mafuaaga o le nonofo valavala.

Ua faitau tausaga o alu Iakopo i le aiga o lona tinā, ona ua le fiafia i ai Essau lona uso, atoa ma lona fia tauimasui ia te ia. Sa fai ai ana avā, toatele lana fanau, ma sa avea ma tagata lima-ola i lafu manu. A o nofo pea Esau ma lona faamoemoe lea, e oti loa lona tamā, ona ia fasioti loa lea ia Iakopo lona uso; peitai e eseese taimi ma lagona.

Ua lagona e Iakopo le fia foi i lona aiga moni, e tuna o le tala; sa malaga mai ma ana avā, auauna, fanau ma lafu manu. Sa sau Iakopo ma lona lagona, o ia o le auauna loto maulalo; A o le taimi lava lea sa omai ai foi Esau ma ona tagata, lea e i ai le fetaiaiga sa faitau nei. O le fetaiaiga, e fai o le faamaulalo o Iakopo i ona lagona, a o Esau foi lona uso, ua sola le ita, ae ua lagona le alofa ma le faamagalo.

O lo o taua i le tala, e faafitua ona ifo Iakopo e faailoa ai le atoatoa o lona faamaulalo, sa ifo uma foi ana avā ma ana fanau. Ua feiloai tama, ona fusi lea e le isi le tasi, ua feasogi ma fetagisi. Ua ta'u atu foi e Iakopo, o le fanau ma mea uma o ia te ia, o foai a le Atua. Ona ia foai atu lea le lafu tele mo lona uso o Esau, e fai ma meaalofa. E ui sa teena e Esau ona o lo o tele foi ana mea, ae mulimuli ane, sa ia toe talia, e fai ma moni o lona alofa i lona uso.

Po o le a le umi o nofo valavala, ona o le loto tigā ma le fia faaoolima; a o i ai lava taimi o le Atua; taimi e lagona ai le faamaulalo, ma le faamagalo, lea na taunu i le toe faatasia i se mafutaga mautū ma mausali. O Iesu Keriso foi, na te le i taofiofi mamau i lona tulaga Atua, ae na faamaulalo e Ia ia ia lava, ma ia osia ai le Taulaga o le Faaolataga. O lona Toetu mai maumalo i le oti ma le tuugamau; o le Alofa atoatoa lena o le Atua, ina ia toe faatasia ma le lalolagi agasala, pe a salamō ma faatuatua.

GALUEGA FAATINO:

Taliga Fesili: Faalogo lelei i le faiaoga, faitau ia malamalamia i lau Tusi Paia, ma tali mai fesili o i lalo.

1. O ai sa muamua i luma i le fetaiaiga a Iakopo ma Esau?
Tali: O Iakopo.
2. O le a se uiga ia te oe, o le fusi, feasogi, ma fetagisi?
Tali: O le faailoga o le tiga o le mafutaga motusia le tagi, lea ua toe amata i le fefusia'i ma faamautu e le feasogi; o lagona o le loto faamaulalo ma le faamagalo.

3. O le a se faamaoniga o le Alofa o Esau ia Iakopo o taua i le tala?

Tali: E faamaonia le alofa e ala i le talia o le meaalofa.

4. O le a le upu e tasi, e faamatala ai le vaai atu o Iakopo i fofoga o Esau, e pei o fofoga o le Atua?

Tali: O le Alofa.

PESE: 222 “Aue loto ua leaga....”

A'OA'OGA:

1. O le Atua o le Alofa lava ia.

2. O le loto maulalo e fofo ai fe'esee'eseaiga.

3. O mea uma e mai le Atua.

.....

ASO SA: **5 FEPUARI 2023**

MATAUPU: **LOTO GATASI E TUMAU AI,
FEVAEVAEA'I E FAAUMATIA AI
(United we stand, divided we fall)**

SINI: Ia a'oa'o le vasega ia latou iloa, e malosi ma mautu le loto-tasi, nai lo le fevaevaea'i, na o le malepe e maua ai.

TUSI FAITAU: Luka 11: 17 – 20

FESOASOANI MO FAIAOGA:

O lo o tatou i ai lava, i ala eseese e fofo ai ni feeseeseaiga; E pei ona sa tatou i ai i le lotomaulalo mai le Feagaiga Tuai, i le vaiaso ua tea, sa fai ma fofo o le toe faatasia o tama. I lenei vaiaso mai le Feagaiga Fou, o le loto-gatasi e foia ai, le

fevaevaea'i ma le lē mautu o se mea. O le feau loloto lea o tuliloa i la tatou mataupu, o lenei Aso Sa e pei ona taua i luga. O le lotogatasi po o le tutusa o loto, e tumau ai pea le maoopopoga o se mea; Aua e eseese loa, ona leai lea o se malosi, salalautasi loa ma faaumati. Ua tatou iloa le moni o lenei mau, i le tele o malo, nuu, aiga, Ekalesia, ma sosaiete lava o tagata.

O le tala sa tatou faitau nei, o taua ai i le f(14), sa tuli i fafo e Iesu le temoni sa ulutino i le tagata gugu, lea na mafai ai loa e le tagata lea ona gagana mai (tautala). O le tala, sa ofo isi, a o isi fai mai, na mafua ona mafai ona o Pelesepulo le alii o temoni, na mafua ai ona mafai e Iesu ona tuli ese le temoni. O lenei mau eseesege o manatu i le mea ua tupu, o lo o silafia uma lava e Iesu, auā e oo a i mafaufauga ma loto o lenei anoano o tagata, e leai se mea o pogisa i le Alii. O le ala lena o le fetalai atu i ai o Iesu ia i latou o fai mai, na mafai e Iesu ona o Pelesepulo: **“O malo uma e fevaevaea'i, e faaumati ia.”** Afai la o le malo o satani, e mautū foi pe a loto-gatasi temoni, a o lea la ua toe tuli lava e Pelesepulo (alii o temoni) le temoni, e le o le faailoga lena o lo outou fevaevaea'i ma le lē loto gatasi. Auā o lea ua outou fai mai o Pelesepulo na mafai ai, ae le o Iesu. O ī lea ua manu a'e ai le tala lelei moni, e malosi atu Iesu nai lo satani. O le mea na tupu nei, o le fa'aaliga lava lea o le malo o le Atua ua oo mai ia i tatou. O lo tatou talia faatasi e ala i le loto talitonu ma faatuatua, o lo tatou fefaasoaa'i lava lea i lona malosi, e le mafai ona tatou toe toilalo ma fefefe i le malosi o le leaga po o satani. O le mea lea, ua matuā tatau ai lava ona tatou manatunatu ma taofi mau i le tāua o le loto-gatasi e mausali atili ai le malo o le Atua ia i tatou. O tatou uma e moomia le malosi o le Atua i o tatou olaga. Ma o lena malosi e saga faatumauina pea, pe a tatou tūtū ma talia faatasi.

O le loto gatasi foi o Iesu ma le Atua lona Tamā, lea lava na fa'aalia le malosi ma le mausali, i lona toetu manumalo mai le otī ma le tuugamau. O iina, ua saga faamautū ai le malo o le Atua e faavavau, e ala ia i latou ua talia lona Alofa Tunoa.

GALUEGA FAATINO:

Mafaufauga loloto: Tusi mai se mea na tupu, po o se tala foi o le Tusi Paia o e iloa; o atagia mai ai le uiga o la tatou mataupu o fai nei; “Tumau ona o le lotogatasi”

PESE: 359 Ia pei o Tanielu

A'OA'OGA:

1. E mausali le tutusa o loto
 2. O le Atua e faavavau lona malo.
 3. ‘Aua e te ‘au ia Pelesepulo.
-

ASO SA: **12 FEPUARI 2023**

MATAUPU: **O UIGA LUITAU (Pressure points)**

SINI: Ia a’oa’o tamaiti ia latou iloa, o faigata, o uiga eseese na o le ola, o luitauina ai le loto onosai, ma faatumauina ai pea le lagona olioli.

TUSI FAITAU: Iakopo 1: 1 – 12

FESOASOANI MO FAIAOGA:

O Iakopo le sa ia tusia lenei tusi, o ia o le uso o lo tatou Alii o Iesu, ma o ia foi sa fai ma taitai o le Lotu i Ierusalem, po o le tausaga e 40 – 50 (AD-After Death) tausaga o le Alii (T.A), ae na fasiotia i le 62 (T.A). O le tusi e mo tagata Iutaia ma Kerisiano o mulimuli ia Iesu, a o aumau i nuu ese, e aofia ai ma tatou. O lo o tautino mai lava e le Aposetolo, o le olaga e faigata i na aso. O le tele o faigata o feagai ma tagata o le Alii, o le anoanoai

foi lena o faaosoosoga, ma tofotofoga e tofotofoina ai le ola faatuatua ma le mulimuli moni ia Iesu. Fai mai Iakopo, o le tagata na te iloa le taua o tofotofoga i lona ola, o le tagata onosai moni lena; auā o tofotofoga e iloa ai le tagata onosai. O le atoatoa foi o le onosai, e iloa ai le tagata matua, e le o toe mativa i se mea mai le Alii. O faigata masani lava e pei foi o nei aso, e i ai le mativa, o faaiuga sese, o le ola taotaomia aemaise le ola sauaina e pei ona i ai i la aso. O le uiga la o le manatu o Iakopo pe a tuu sa’o – “‘Aua le fefe”, auā o faigatā, e mafai ona avea ma ala savali o le ola au-i-luma. O tofotofoga foi, o se auala lea ua faamaonia, le saunia lelei ai o le tagata mo luitau, o iina e faafouina ai ma fa’aalia ai lona malosi i totonu. O le avea lea o le onosai ma taulaiga muamua o le ola faatuatua, o le saunia lava lea mo so o se ituaiga luitau, mo se taimi umi e tauave ai fita ma tiga o le ola, ma ola ai foi ma le poto ma le faatuatua. Vagana le tagata ua leai se “poto” f(5) o i ai. O le poto, o le olaga tatau ma fa’aloalo i le Atua, ona tatalo lea ia maua. O le tatalo foi, o le manaoga e fai le loto talitonu faamaoni, e leai se masalosalovale o i ai. Auā e valaau loa i le Atua ma le faalotolotolu, ona leai lava lea o se mea e maua e lea tagata. O le feau faamalosi lea mo e o mulimuli ia Iesu – Ia taulai i le avea ma tagata matua i le faatuatua i le Atua, e ala i le onosaia o faigata, talu le alofa faamaoni ia te ia. Ua tatou iloa le anoanoa’i o faigata sa fetaiai ma le Alii, ae sa onosai lava ma le talitonu, o soifua le Atua lona Tamā, le Alofa Tunoa uma, tatou te le matitiva ai i se mea e tasi. O i latou uma foi e onosai seia oo i le iuga, latou te maua le taui ua folafola mai, “O le pale lea o le ola.”

GALUEGA FAATINO: Taliga Fesili

Faalogo lelei i le tala, ma faitau manino lau Tusi Paia, ona tali mai lea o fesili o i lalo.

1. O ai uso o le Tusitala, lea e tusi i ai e pei ona tau ai le fuaiupu (2)?

Tali: O uso, o faatatau i tagata Iutaia ma Kerisiano uma o salalau i nuu ese.

2. O le a lea mea o le onosai?

Tali: O le onosai, o lou lavatia lea tatali faigata.

3. O fea tonu le taimi e iloa ai le onosai?

Tali: O le taimi o tofotofoga i mea faigata o le ola.

4. O ai le tagata lea e taua i le tusi faitau, e leai ma se mea na te maua mai le Alii?

Tali: O le tagata e manao i se mea mai le Alii, ae faalotolotolu ma lē talitonu atoatoa ia te Ia.

5. O le a le uiga o le pale, lea e maua e le tagata faatuatua o taua i le f.(12)?

Tali: O le pale, o le ola lava lea e faavavau.

PESE: 174 Ia tausinio ma taumafai nei

A'OA'OGA:

1. O le faatuatua e tofotofoina pea.

2. E tupu le onosai i le faatuatua.

3. 'Aua e te masalosalo i le Alii.

.....

ASO SA:

19 FEPUARI 2023

MATAUPU:

FAAMĀMĀ LE MIMITA MA LE GUGUTU (Less boasting and bragging)

SINI:

Ia malamalama le vasega, o le mimita ma le gugutu, o le faailoga o le tagata faamaualuga ua ia fuuao le Atua i ana fuafuaga mo lona manuia.

TUSI FAITAU: Iakopo 4: 13 – 17

FESOASOANI MO FAIAOGA:

Faamāmā le mimita ma le gugutu, e mafai foi ona toe faaupuina faapea, ia 'aua le mimita, ma ia 'aua le gugutu. O le amio lea, e le tatau i se Kerisiano ona ola ai. E mafua ona mimita ma gugutu le tagata ona o le loto ua faamaualugaina ma le loto ua faafefeteina, ona o le taunuuga manuia o ana taumafaiga. Ua afua ai ona tautala i upu faasausili, ma faailoa atu ona lagona mimita i le tamaoaiga ua ia maua, ona o lona poto ma le tomai i le atinaeina o ana pisinisi, ua maua ai le oa e tele. Ua faapea ifo ai i lona loto, ina nofonofo filemu ia ma ai ma ia e olioli i mea tele ua ou maua. Ua leai lava se manatu ifo i le Atua o le punavai o ona manuia. Ua gallo i le tagata ua tele ana mea, o lo o i le Atua le gasologa manuia o ana fuafuaga i le taimi nei, e ola ai i le lalolagi o lo o ola ai. E pei o la le Faisalamo, Salamo 90: 12 - Ia faapea ona e a'oa'o mai, ia i matou e faitauina o matou aso, ina ia maua ai le poto i o matou loto.

O le tusitala o le tusi lenei, e faapea o Iakopo le uso o lo tatou Alii Faaola o Iesu Keriso. O ia lenei, ma isi ona uso na matua tete'e i a'oa'oga ma galuega faaola a Iesu. E pei ona fai mai le Evagelia a Ioane 7: 5 – Aua o ona uso foi latou te le'i talitonu ia Iesu. O ia foi lea na fai lana tautinoga e na te le ai lava i le areto ma inu i le auina seia vaai tino, ua toe tu mai Iesu mai i e na momoe. Ina ua toe soifua mai Iesu, ona maliu ai lea ua 'ave le ie lino na ia fa'aaoga e taai ai lona tino maliu i le auauna a le ositaulaga sili. Ua maliu atu o Ia ma faailoa atu ia Iakopo auā na ia tauto e le ai i le areto ma inu i le ipu a le Alii sei vaai tino i lona toe soifua mai, mai e na momoe. Ona ia fetalai atu lea, aumai ia le laulau, ma le areto ma le uaina. Ona tago ai lea i le areto, ua faafetai ma tofitofi, ua ia fai atu foi, lo'u uso e Iakopo tago ia ina ai, aua o le Atalii o le Tagata ua toe Soifua mai e na momoe. Ioe, o le uso na matua tete'e i a'oa'oga ma vavega a Iesu ua fai nei ma auauna a le Atua ma le Alii Toetu o Iesu e pei ona molimau le Iakopo 1: 1. O ia foi na fai ma faauluuluga o le Ekalesia a Iesu i

Ierusalem. Na maliu faamaturo ona o le Tala Lelei a Keriso i le tausaga 62 AD.

O molimau nei a nisi o le au su'seu'e o le Tusi Paia o le Feagaiga Fou, ua avatu ina ia malamalama ai, ia Iakopo ma lana tusi lenei. Peitai, o le tusi lava ia a Iakopo, o lo o avatu ai le feau o le Tala Lelei mo tagata uma o Israelu, ua faataapeapeina i itu e fa o le lalolagi. O le vaega o le tusi faitau, ua fai ma tatou mataupu i lenei Aso Sa, o lo o momoli atu ai se feau i tagata Israelu uma, ua faasalalauina i itu e fa o le kelope.

O le taimi o le tusi lenei o Iakopo, o lo o feagai ai tagata maualuluga e faavae aai i totonu o Asia Itiiti ma atinae le tamaoaiga. E manaomia tele e tagata maualuluga nei, i latou e i ai le poto, e maua tupe, maualuga le tomai fai ai pisinisi ma atina'e eseese ia vave ona faatupulaia le atinaeina o nei aai ma tula'i mai i ni tulaga maoa'e o latou tamaoaiga.

O tagata Israelu lava, o tagata o lo o numera tasi i nei agavaa uma. Ua ofoina atu ai e nei aai le ulufale saoloto o i latou ma fai ma tagata nuu moni o ia aai. O le mea lea ua faaosofia ai o latou lagona i le mimita, ma tautala i upu gugutu. Ua latou fai ifo i o latou loto, o tatou e lua lava tausaga e fai ai a tatou pisinisi, maua le tele o le tupe ma le tamaoaiga, ona tatou faasolo atu lea i isi aai, ma atili ai ona maualuga lo tatou tamaoaiga, auā e tele lava tupe tatou te maua.

Ua oo mai lenei tala i le aposetolo o Iakopo i Ierusalem. Ona avatu lea o lana feau faamanatu i tagata Israelu uma. Ia outou manatua le upu a le poto, Faataoto 27: 1 ‘Aua e te mitamita i le aso taeao, auā e te le iloa se mea e tupu a taeao.

O lo o fetalai foi Iesu i lana faataoto i le mauoa valea, ua fai ifo i lona loto, ina ai ia ma le filemu i mea e tele ua saunia, ae galo ia ia e aami e le Atua lona agaga i le po, ona fai lea ma ai le oa tele? Luka 12: 16-21, O le tagata faavalevalea tele le fai ona fuafuaga o lona lumanai, ae le o ia te ia se malosi ma se poto na te pulea ai a taeao.

Fai mai Iakopo, o le ola le mautonu o le tagata, e le o se mafuaaga e fefe ma atuatuvale ai. A o le mafuaaga tatou te iloa lo tatou matuā le mafaia o se mea, ae tuu atu atoa lo tatou

faalagolago i lo tatou Atua. O le pine lena o le tagata ua fuafuaina lona lumanai i le ola faalagolago i le Atua. Pei o la Paulo 1 Korinito 4: 19 Ae vave ona ou alu atu ia te outou, a finagalo i ai le Alii.

O le Kerisiano moni lava ma lona ala i le lumanai e le faapopoleina i le fefe ma faavaivaia i le lē mautonu, ae tuuina atu atoa lona faalagolago i le Atua. O Israelu ua salalau i le lalolagi, ua soona mitamita vale ma soona gugutu le taupulea, o latou taeao ma le faitauina o latou aso i le lumanai, o lo o i le Atua le pule aoao.

Le fanau o le a'oa'oga mo tatou, ia manatua le Atua i aso uma. A maua le poto, ia e iloa o lo o i le Atua le faitauina o tatou aso. Ia toe manatunatu lelei i tulafono e sefulu, o lo o aumai e le Atua, le tapasa ma le taitaiala i lo tatou ola i le lumanai. ‘Aua le maua loa le poto ona galo loa lea ia te oe le Atua. Ia tusi i papa aano o lou loto le Atua o le punavai o le ola ma le taunuuga manuia o tatou aso. O Iesu Keriso na tuuina atu lona faalagolago atoa i le Atua, ua faaolaina ai i tatou i lona maliu ma lona toetu manumalo mai le oti ma le tuugamau. Ia manuia le Aso Sa.

Uiga o Upu:

- | | | | |
|-----|------|---|--|
| i) | puao | - | puaoa, o le ao e mafua mai ona o le malulu o le tau. |
| ii) | mou | - | ua vave ona tea ese. |

GALUEGA FAATINO:

Sa tatou faalogologo lelei i le tatou mataupu na faamatalaina. Faamatala le amio mitamita lea e aumai i le tatou tusi faitau.

PESE: Pese ma Viiga 34

A'OA'OGA:

1. Ia manatua le Atua i au mea e fai.

2. Pule le Atua i lou ola.
 3. E faitau e le Atua ou aso.
-

ASO SA: **26 FEPUARI 2023**

MATAUPU: **LO MATOU TAMĀ O I LE LAGI**
(Our Father in heaven)

SINI: Ia malamalama le vasega, o lo matou Tamā o i le lagi, o lana upu na foafoa ai mea uma ua i ai le ola i le lagi i luga, ma le lalolagi i lalo nei.

TUSI FAITAU: Ioane 1: 14 – 18

FESOASOANI MO FAIAOGA:

O le tatou mataupu o lenei Aso Sa, “Lo matou Tamā o i le lagi.” O le uiga moni ma le natura o le Tamā, e mafua mai ia te ia mea fou, le matuā lelei ma le matagofie. E na te faavaea mai mea mautū, e le mafai foi e se mea ona faaleagaina. O lana Upu foi e nofo lelei ai ma fealofani le aiga. E na te faapaleina lona aiga ma lana fanau i le mamalu o lona alofa tunoa. O lana silafaga ma lona agalelei na te toe faaolaina ai i ona tagata ua puapuagaina i le amio mataga ma le agasala. E aapa mai ona lima alofa ma lavea’iina.

O le talitonuga lea o le tusitala o le Evagelia a Ioane, o le Atua, lo matou Tamā o i le lagi, o le Tamā lea o le foafoaga aoao. E moni e afio i le lagi, a o lana silafaga ma lona agalelei, e i ai faatasi ma ana mea uma na fai.

O le talitonu o tagata o le Feagaiga Tuai, o le Atua le Tamā o i le lagi, e leai se fesootaiga ma le lalolagi, auā o tagata agasala, o le mea lea ua mamao ‘ese ai o Ia ma le foafoaga, auā e le pa’i mai le Atua i mea o le tino nei ona ua leaga mea uma. E le mafai ona vaai se tagata i le Atua. Aua afai e vaai i ai, ma oti ai lava.

A o le mafuaga lea na tusi ai e le tusitala a le Evagelia a Ioane le Tala Lelei ia Iesu Keriso. Fai mai o le Atua, lo matou Tamā o i le lagi, na faia mea uma lava, e i ai faatasi o Ia ma ana mea uma na faia.

Ua fai mai Ioane, o le Upu a le Atua, o lo o i ai le paoa o le faatufugaga, o le malosi e faagaioria le tino mai o le foafoaga aoao. O le taiala o le faasino ala, o le upu e faatonutonu ai le foafoaga aoao. Na tuu mai ai ma faatonutonu le gasologa lelei o mea i le vateatea ma le lalolagi, ma tuuina le mafaufau lelei i le tagata, e na te fuafua tatau mea lelei mo lona manuia. O lenei mafaufau, e masani ai le ‘au fai mafaufau o tagata Iutaia ma Eleni.

Fai mai la le tusitala o le Evagelia a Ioane o le upu na foafoa ai le lalolagi o le mafaufau na te faatonutonu le tulaga lelei o le gasologa o mea uma ua tino mai i le tagata, na vaai i ai o matou mata faaletino, e le o le vaai faaleagaga. Afai tou te fia vaai i le Upu Foafoa o lo o faatonutonu ai le gasologa lelei ma le mafaufau o mea uma; pe faapei ona foliga i le tino, ia vaai ia Iesu le Nasareta. O se mea fou lenei i le au popoto o Eleni, e faapea foi i nisi o le ulua’i Eklesia. E le mafai ona liutino tagata le Atua, auā o le tino e agasala o lo o nofo i totonus le agaga e lelei atoatoa.

Ua tulai mai se talitonuga fou, e faapea afai ua liutino tagata le Atua e ala ia Iesu, o lona uiga o le tino faafoliga (seem), e ese mai i tino moni o tagata. Ona tulai mai lea o le talitonuga fou o taua o le Docetists.

Afai tatou te mafaufau loloto o le Atua le Tamā o i le lagi, o le alofa tunoa ma le alofa mutimutivale uma lava. Ua leai lava se tagata ma le auga perofeta na ia auina mai e mafai ona lavea’i ona tagata i le lalolagi, o lea ua afio mai ai i lona tino tagata e ala ia Iesu, e aumai lona mamalu ma lona alofa tunoa mo ona tagata i le lalolagi.

O le alofa tunoa, e le o se mea ua tatou maua, ona o so tatou faatuatua ma so tatou lelei. E le o se mea tatou te agavaa i ai, a o le alofa faatamā, o lo tatou Tamā o i le lagi, i ona tagata i le lalolagi. O lona faamaoni, ma lona amiotonu, ua fa’alia lava ia

Iesu lona Alo pele e toatasi, ina ia faaolaina ia te ia le fanau a tagata.

Ioe, o le uiga faatamā lea, o lo tatou Tamā o i le lagi, e na te saili mai, afai e maua i tatou ona ia sapasapaia lea i ona aao alofa i tatou ma avatu i tatou i le mafutaga ma Ia e faavavau.

Le fanau i lenei taeao, o le feau ua momoli mai mo i tatou, lo matou Tamā o i le lagi, o lenei alofa tunoa o lo o tatou ola ai. O lona alofa tunoa foi e tatou te popoto ai, ma iu manua o tatou lumana. O Iesu Keriso, o le alofa tunoa lava o le Atua ua faaolaina ai i tatou, e ala i lona Maliu ma lona Toetu mamalu. Ia manua le Aso Sa.

Uiga o Upu:

- i) upu - e tutusa ma le poto ma le mana
- ii) mamalu - alofa tunoa (grace)

GALUEGA FAATINO:

Tusi mai ni uiga faatamā se lima o le Tamā o i le lagi.

PESE: Pese ma Viiga 2

A'OA'OGA:

1. O le Tamā o i le lagi na faia mea uma.
 2. O Iesu o le Tamā o i le lagi lava lea, ua liutino tagata.
 3. Ia tatalo i le Tamā o i le lagi e foai mai le poto.
-

ASO SA: **5 MATI 2023**

MATAUPU: **IA FAIA LOU FINAGALO**
(Your will be done)

SINI:

Ia malamalama le vasega, e mana'o le Alii ia tatou faia lona finagalo.

TUSI FAITAU: Salamo 40: 4 – 8

FESOASOANI MO FAIAOGA:

O le Salamo lenei e 40, na faitauina e le tupu o Tavita, e tautino ai i le Atua, ua matuā sese lava o ia i le faatinoga o lona valaauna, e taitai lona nuu ma ona tagata i ona ala o le malamalama.

Ua lagona e le fai Salamo, ma vaai ifo ia te ia lava e le o ō gatasi lana faatinoga ma le finagalo o le Atua. Auā ua toe to manatu ifo, e tatau ia te ia ona faia ma le tonu, ma savali ma le sa'o i tulafono uma a le Atua. Ua talitonu foi Tavita o le Atua o le pule aoao o mea uma, e le mafai foi e ia, po o se tagata ona faoa le pule aoao a le Alii.

Ona tuuina atu ai lea e Tavita o lona loto ma lona tagata atoa i le tatalo ma le anapogi ma faatalitali ai ma le filemu, i le oo mai ia te ia o le amiontonu a le Atua. Ua ia mua'i fa'aamuia ai ia i latou ua maua'a pea lo latou talitonuina o le Atua. Ua latou le faasaga i e faamaualuluga ma e ua liliu ane i mea pepelo. Ua lagona e Tavita o ia ua lapelapea ai lana faatinoga o lana taitaiga o le nuu o le Atua. Ua tautino atu Tavita, "Le Alii e, lo'u Atua, e tele lava mea ua e faia, ou vavega ma ou manatu ia te i matou, e le mafai ona laulauina atu ia te oe, ou te fia faailoa ma tautala i ai, ae le mafaitaulia lava. E te le finagalo i le taulaga ma le taulaga i mea e ai, ua elia e oe ou taliga. Auā ia tatala lau faalogo ma ou usitai, ma faia lou finagalo. O le mea malie i lau silasila, ma nanamu manogi malie i ou fofoga ma lau silafaga.

E te le'i fetalai mai foi i le taulaga mo agasala ma le taulaga mu, a ia faia lou finagalo i le ola ua valaauna i au feau ua valaauna ai. Ona ou tautino atu ai lea, Faauta ou te alu atu, ua tusia a'u i le tusi taai. Lo'u Atua e ou te fiafia e fai lou finagalo, auā o lo o i totonu ia te a'u lau tulafono .

O upu a le tagata ua lagona, e tatau ia te ia ona atoatoa le loto, ma malosi e faatino ai lona valaauna, e fai ma tupu e na te taitaia tagata i ala o le Atua. O le faia lava lea o lona finagalo. Ua talitonu foi le Faisalamo, e faigofie foi lana galuega faataitai, pe a maua'a lona faatuatua i le Atua. E na te mautinoa foi e tele faigata ma puapuaga la te fetaiai i le faatinoga o lona valaauna. Ae afai e i ai le Atua faatasi ma ia, e mautinoa le faamanuiaina ma solo lelei.

Le fanau, ua tatou i ai i taimi tau faai'ui'u o le ola a'oa'oina, e tatau ona tatou faalogologo ma le filemu, i le galuega a le Agaga Paia, e na te musuia i tatou ia tatou faiga filifiliga i lo tatou ola valaauna, i feau ma galuega o lo o faatalitali mai. E mana'omia tele, le tatala o le faalogo ma lagona le fetalai o le Agaga o le Atua i a tatou faiga filifiliga. A oo foi ina valaauna i tatou ma faamanuiaina i galuega, e taua tele lo tatou fai o le finagalo o le Atua i le faatinoga o le tatou valaauna.

O lo tatou Alii Faaola o Iesu Keriso, e pei ona faamauina i le Mareko 4: 36, Ae 'aua le faia lo'u loto a o lou finagalo. O le finagalo lea o le Atua le Tamā, na faia ma faataunuina e Iesu i luga o le satauro ina ia faamagaloina a tatou amio leaga uma ma agasala. O lona Toetu mamalu ua faaolaina ai i tatou i le ola fou ma le ola atali e faavavau. Ia manuia le Aso Sa.

Uiga o Upu ma Fuaitau:

- i) ua elia e oe ou taliga - ua tatala le faalogo ina ia lagona mea lelei mai le Atua.
- ii) tusi taai - o le tusi e taai faalapotopoto
- iii) o i totonu ia te au au tulafono - o tulafono ua maua'a i le loto, e le galo e ola ai i aso uma.

GALUEGA FAATINO:

Ia faia lou finagalo. O le a le uiga o lenei faaupuga. Faamatala mai lou manatu i nei upu, pe faapefēa foi ona e faatinoina i lou olaga Kerisiano

- PESE:** Lo matou Tamā e o i le lagi
 Ia paia lou suafa ua lasi (pese a le Tiamaa)

A'OA'OGA:

1. Ia faia le finagalo le Atua i aso uma.
 2. Ia loto mama.
 3. Aua le tuinanau i mea o le lalolagi.
-

- ASO SA:** **12 MATI 2023**

- MATAUPU:** **MUĀTAPENAGA E FAAVAVAU**
(Eternal provision)

- SINI:** Ia malamalama le vasega o Iesu le areto ola, tatou te ola ai faavavau, pe a tuuina atu tatou mo Ia.

- TUSI FAITAU:** Ioane 6: 48 – 51

FESOASOANI MO FAIAOGA:

O le upu "muātapenaga" e pei ona i ai i le manatu autu o lenei Aso Sa, o lo o faa-Samoa ai le upu "provision" e pei ona i ai i le faa-Peretania (English). O le faamatalaina i se isi ona uiga faigofie i le Gagana Samoa, ma lona fa'aaogaina e le autu, "o le tuuina atu o meaai, o vai, po o meafaigaluega, e faapitoa mo se faigamalaga" (*supplies of food, drink, or equipment, especially*

for a journey). A tuu loa la i ai ma le “faavavau” e pei ona i ai i le mataupu o lenei Aso Sa, o lona uiga, **“o le tuuina atu o meaai, o vai, po o meafaigaluega, e faapitoa mo le faigamalaga e faavavau”.**

O meaai ma vai, o isi ia mo’omiaga mo le tagata soifua, ina ia fa’aaauauina ai le ola e ala i le malosi faatupuina. O vaega aupito sili foi ia ona mana’omia e le tagata, aemaise lava la i le tagata o le a alu malaga i aso ua mavae, auā sa savaval. O le siosiomaga na soifua ma ola a’e ai Iesu, o le areto (bread) lava le meaai mautu (stable food) e fa’aaogaina. O le ala foi lea o lo o tele ai lona fa’aaogaina e tala o le Tusi Paia. O lona uiga, o se meaai e moomia tele e tagata o lo o i lea vaega o le lalolagi. Peita’i, ua fai ma feteena’iga i mafaufauga o tagata Iutaia, ina ua fetalai Iesu, o Ia lava o le areto o le ola.... (I am the bread of life.....). Pe faapea foi i le uiga o le fetalai a Iesu, o Ia o le meaai o le ola, o le moomiaga o tagata e ola ai e faavavau.

O le mea o lo o tupu, e mafua ai le feteena’i o mafaufauga o tagata Iutaia, aemaise o le au fai tulafono o le nuu, latou te lē taliaina le fetalai a le Alii o Iesu, ona latou te lē o talitonu ma tali, o Iesu o le Alo o le Atua. O lo o manatu i latou, o Iesu, o le atalii o le kamuta, o le tama a le fafine o Maria, o le tagata. Po o le a lava la ni mea e tuusaunoa ai le Alii o Iesu e uiga i le mataupu tau i le Malo o le Atua, ma le ala atu o le tagata i le ola e faavavau, e latou te teena lava.

O nisi o tagata o le li’o o tagata Iutaia, o lo o manatu i latou, o lo o tumau i le talafaasolopito lefafagaina e le Atua o le nuu i meaai mai le lagi. O lona uiga, i le manatu o ia tagata, e lē fou le tala i le areto mai le lagi, e pei ona fetalai manino i ai le Alii o Iesu. Pau lava le faafesili, ona o le faapea mai o le Alii, o Ia lava o le areto mai le lagi. O le areto foi e na te avatua i le tagata, o lona tino lea. Ua fofola manino e le Alii, o Ia o le Faaola i le lalolagi. Ua na o Iesu foi, e maua ai e le tagata le ola faavavau. E lē o faa-lē-aogaina e Iesu le areto sa fafagaina ai e le Atua le nuu o Isaraelu i le taimi o Mose, a o malaga i le vao. Ua na o le faamanino i tagata, o meaai na i le faa-le-tino, auā sa feoti i le faa-le-tino.

O le pogisa lea o lo o i le tele o le au Iutaia, i le fa’aaauauina o le ola o le tagata faatuatua i tala atu o le isi ola, o le ola lea e faavavau. Talu ai, e lē o malamalamā i le mafuaaga o le i ai o Iesu i le lalolagi. O lo o atagia i le fetalai a le Alii, a fia ola le tagata i le ola faavavau, ona tausami lea i le areto o le ola, o Ia lava lea. E faapei ona moomia o le areto i le tausiga (meaai) o aso uma, ia faapena le moomia o Ia i le fa’aaauauina o le ola, e tagata Kerisiano uma. O lona uiga, o le tagata ua maua le Alii, ma ola ia Iesu i taimi uma o lona ola, o le tagata lenā e mautinoa lona ola e le gata i lenei ola, ae fa’aaauau i le ola faavavau.

Ma o le uiga tonu lea o le matupu o lenei Aso Sa. O le tapenaina e Iesu o le loto o le tagata faatuatua, e ala i le tuuina atu o le faamoemoe ola, o le areto o le ola, o Ia lava lea, ina ia mautinoa le i ai o le tagata i le ola faavavau. O le tuuina atu o le ola mo le Alii, o le taliaina lava lea o Iesu i le loto ia ola ai e oo i le faavavau.

GALUEGA FAATINO: Taliga Fesili

1. O ai Iesu e pei ona taua i le tala?
Tali: O le areto o le ola.
2. O le a le iuga o le tagata e ai i le areto o lo o ta’uina mai e Iesu?
Tali: E ola lava e oo i le faavavau, e lē oti.
3. Aisea e finagalo ai le Alii ina ia aai tagata i le areto, o lona tino lea?
Tali: Ina ia mafai ai e le tagata ona ola i le faavavau.
4. Faamatala mai le uiga moni o le mataupu o lenei Aso Sa, i sou lava manatu.
(Faasoa mai se iloa o le vasega)

PESE: Lo’u Atua e, ua ou fia ai ia e fafaga ia te a’u...
(Oh! Lord, I am hungry and I want to be fed)

A'OA'OGA:

1. Talitonu ma talia Iesu i lou olaga e te ola ai e faavavau.
 2. O lo o tapenaina lava e le Atua o tatou tagata mo lona malo e faavavau.
 3. Aua le masalosalo i lou Alii o Iesu.
-

ASO SA:**19 MATI 2023****MATAUPU:*****A IA LAVEA'I I MATOU MAI LE LEAGA* (But believer us from evil)****SINI:**

Ia malamalama le vasega, ua na o le Atua lava e mafaia ona faasaoina mai le tagata ai le leaga.

TUSI FAITAU: Salamo 56

FESOASOANI MO FAIAOGA:

O le mataupu o lenei aso Sa, o se tasi o laina o le vaega o le tatalo a le Alii (Lord's Prayer), e pei ona faamauina i le Mataio e 6 fuaiupu e 13. Ua faalogo soo i ai o tatou taliga, aemaise lava i le taimi e tataloina ai lea tatalo e pei ona fa'aa'oa'o mai e Iesu ia i tatou. E foliga mai, a oo ina feagai le tagata ma faafitauli, o faigata ma puapuaga, ona o le ita mai o le isi tagata, ma le taumafai o le fili ina ia faaoo mai le leaga, ona faalogoina lea o le augani po o le faatauanau i le Atua, ina ia lavea'i ma fesoasoani mai.

O lagona ia o lo o feagai ma le fai-Salamo o Tavita, ina ua itagia o ia e le to'atele o tagata sauā, e pei ona manino mai i le gagana o le Salamo lenei e 56. Ua feagai ma tagata o lo o lamalama mai, ma taumafai ina ia faasauā ia te ia. O le leaga lea o lo o naunau le fai-Salamo i le Atua, ina ia lavea'iina mai ai o ia. O le auga lava

ma le faamoemoe o le leaga, ina ia faaumatia ma faaleaga le tagata. O le taulamalama ma le faasauā mai, o lona mana'oga lava o le oti. O le upu moni, e lē mafaia e se tasi ona aveese mai le leaga mai le siosiomaga o lo o tatou i ai. E pau lava le ala e taumafai i ai le tagata, o le lavea'iina mai o lona ola mai le leaga. O le mataupu o lenei Aso Sa, o lo o manino mai ai, o le leaga o lo o faafeagai ma Tavita le fai-Salamo, o i latou o lo o taulamalama ma faasauā mai ia te ia.

Peita'i, a to manatu ia Tavita ma lona tagata, o ia o le tagata o taua. Ua masani i le sii taua i so o se taimi, i so o se nofoaga. Ae po o le a lava la le mea e popole ai fua?

E i ai se lagona i lenei mataupu, o le isi lea leaga o loo manatu i ai Tavita, e ao ona laveai'iina mai ai o ia. E foliga mai i le lagona o Tavita, e lē toe fia foi lona olaga i le sii taua, ma le fasiotiina o tagata e faasagatau mai ia te ia, e pei ona sa masani ai lona olaga. O lona uiga i le manatu o le fai-Salamo i le Atua, ina ia auina mai le filemu i lona loto, e faasaoina ai o ia. A o ona fili ma e taulamalama mai, ia faitalia le Atua, o lē o lo o ia faatuatua i ai.

O le feau ma se a'oa'oga lelei lea mo i tatou tupulaga i lenei aso Sa, ma lenei foi vaitau, a o feaigai ai ma le tau amata o aoga i lenei tausaga. Tele ia o leaga tatou te faafeagai i taimi uma. Ua faamanatu mai e le fai-Salamo ia i tatou, ua na o le Atua lava e na te lavea'iina mai i tatou uma mai ia leaga. Ia manatua, o le leaga lava ia ma lona faamoemoe, ina ia faaleaga le tagata lelei.

O le sa'o o le fuafuaga sa faia e le fai-Salamo po o Tavita, o le sa'o o lē na ia faasoa i ai, ina ia lavea'iina o ia mai le leaga. O le Atua lea. E mafua ona sa'o, ona o le tagata ua talitonu ma le faamaoni i le Atua, e ala i le faatuatua.

GALUEGA FAATINO: NOFOAGA O SULUFA'IGA

O nisi nei o vaega, po o nofoaga e mafai ona maua mai ai se fesoasoani, e lavea'iina mai ai o tatou tagata mai le leaga.

Matua

Faifeau

Foma'i

I ni au fuaiupu ta'i tolu, e faamatalaina ai nofoaga e 3 ua tuuina atu, a'o a foi fili ma ni leaga e mafai ona lavea'i mai ai oe.

PESE: Lo'u Alii ua faafetai (Jesus loves me this I know).

A'OA'OGA:

1. Ua na o le Atua e lavea'iina i tatou mai le leaga.
 2. Saili i le Atua i taimi o puapuaga.
 3. Ia tumau le faatuatua ma le talitonu i le Atua, pe a oo mai le leaga.
-

ASO SA: **26 MATI 2023**

MATAUPU: **LAFOA'I MEA TUAI MA
FAAULUFALAE MEA MEA FOU**
(Out with the old and in with the new)

SINI: Ia malamalama le vasega i le taua o le ola fou o lo o ia Iesu Keriso, ina ua talia ma talitonu faamaoni.

TUSI FAITAU: Mataio 24: 1 – 14

FESOASOANI MO FAIAOGA:

O le mataupu o lenei Aso Sa, ua talafeauga ma le lavelave o le galuega tala'i sa feagai ma le Alii Faaola. E vaaia pea le lē talia e Iutaia o Iesu ma lana feau tau momoli atu o le Mālo o le lagi ona o le tā mau pea o talitonuga tuai. O le tala a Mataio le Iutaia mo ona lava tagata lē talitonu, e fa'i o le gagau gatā o latou loto a o le pogisa pea o la latou vaai po o ai Iesu.

O le vaega lenei o le lauga a Iesu i le mauga o Olive. Ina ua ulufafo mai le malumalu, na faasee teisi atu ai i le tuasivi o le

mauga o Olive e lata ane lava i le aai o Ierusalema ma mafuta ai ma lona au so'o, faatasi ma e na mulimuli atu ia te Ia ina ua latou talitonu i ana a'oa'oga.

E foliga mai o le ulufafo o Iesu mai le Malumalu ma maliu ese, ua manatu nisi, e le'o to'afimalie lona finagalo i ta'ita'i o le lotu i lo latou faataumatatao pea i ana a'oa'oga o le Malo o le Atua. Ma o lana toe ulufale lea i le Malumalu a'o fotua'i mai ona puapuaga. Na ia valo'ia pe na fetalai ai i se faaaliga e uiga i le faatafunaina o le malumalu i Ierusalema.

O le malumalu, o le ogatotonu lea o le talitonuga ma tapua'iga a tagata Iutaia. E mafuta ai ma faanōnōmanū i le Atua. O le ulua'i malumalu na faia e le tupu o Solomona na faaleagaina foi i le taimi o sauaga a Papelonia i le 586 TLM, a'o lea foi ua toe valo'ia lona faatafunaina. A fua i taimi o Iesu, e foliga mai o loo fa'aauau pea le faia pea o ni galuega faaleleia ma le so'oso'oina o le Malumalu talu mai le taimi o le tupu o Kuresa, se ia oo i le taimi o le tupu o Herota le sili, le vaitaimi tonu lea o le galuega tala'i a Iesu.

O le faaleagaina o le Malumalu, a faafaigofie le fetalaiga a Iesu, e le toe iloa se tulaga o se Malumalu ua matuā faaleagaina. O le ata o le afio ese o le Atua ma lona nuu, ona ua le taliaina o Ia, a ua atua i talitonuga tuai ma fa'aauau pea lo latou liliu ese ma Ia.

O le finagalo foi o Iesu o lo o taumafai e faailoa atu i lona auso'o, afai e faatuatua mai ia te Ia, e tusa lava pe faatafunaina le malumalu, e le afaina, o Ia o le malumalu fou. E le toe manaomia se ulufale i le malumalu e mafuta ai i le Atua, e afio faatasi o Ia ma tagata uma e faatuatua ma talitonu i lona afio mai.

E le na o le malumalu foi na fetalai ai Iesu i lana lauga lea. E i ai foi ma fa'aaliga o mea o le a tutupu i le lumana'i ua latalata mai. O lea lauga, e foliga mai ai o se lapataiga, a o se taufagufagu foi ua tuuina atu mo le auso'o ma tagata Iutaia uma, mo le iuga o aso ua taulalata mai.

O le finagalo o Iesu, o le faamalumalu mai o le pulega lē taupulea a Roma, o le a matuā olopalaina ma tofotofoina ai le faatuatua o ona so'o, ma e maumau ai lava le soifua. E ao ina mautū ma tūtūmau le faatuatua o lona auso'o ma tagata faatuatua uma. E

faaseseina foi lo latou faatuatua aua o le a i ai ma perofeta pepelo. E oo foi i tagata sa talitonu ia te Ia, o le a mamulu lo latou faatuatua i faatosina a le Malo o Roma ma ana auala e taumafai e titina le talitonuga fou lea.

O le lē taliaina o Ia e tagata Iutaia ma lana feau o le Malo o le lagi, o se faanoanoaga tele i le finagalo o Iesu. Auā foi, ua avea le manatu faualuga o le toatele o tagata, ua le mafai ai ona pupula o latou mata faa-le-faatuatua, o Ia lava o le Mesia na valoia. O lona afio mai, e le o se ta'ita'i malosi e pei ona mafaufauina. O lona malo foi e le o se malo faa-le-lalolagi, a o le malo o le lagi. Na o le tagata lava la e faatuatua ma talitonu ma talia o Ia, e saofagā i le Malo o le lagi, tusa lava pe feagai ma faafitauli.

GALUEGA FAATINO: FAASOA SOU MANATU

Autu: “*O sē ua maua Iesu, o le tagata fou lea*”.

O le “Talanoa” o se tasi lenei o metotia (method) ua fa’aaogaina e le lalolagi, e faasoa ai i ni mataupu mo le sailia o ni manatu ma ni mafaufauga lelei ma aoga, mo le faaleleia o so o se mea.

Ia fa’aaogaina lea auala, e faasoa ai lau Susuga i le Faiaoga ma le vasega, e uiga i le autu ua tuuina atu.

PESE: Ta’u mai tala ia Iesu (Tell me the stories of Jesus)

A’OA’OGA:

1. Taofi talitonuga tuai ae talia Iesu e ola ai.
2. Tumau le faatuatua i le Alii pe a oo mai faigata o le ola.
3. Aua nei faaseseina oe e talaiga le faavaea.

.....

ASO SA:

2 APERILA 2023 (Aso Sa Laupama)

MATAUPU :

O LE MEAALOFA ATOATOA
(The Perfect Gift)

SINI:

Ia malamalama le vasega, o le meaalofa sili tatou te avatu mo le Alii, o le salamo ma faatuatua i lona Maliu ma lona Toetu.

TUSI FAITAU:

Mataio 26: 1 – 16

FESOASOANI MO LE MATAUPU:

A oo ina vailiili mea o lo o lalaga ai le upu meaalofa, ona tatou vaiaia ai lea o le matagofie o mea o lo o mafai ona mamanuina ai. O meaalofa o lo o ua vavala mai ai se mea ua ofo fuaina atu e aunoa ma se totogi, o se foai ua faia mai i le loto fuatiaifo e lelei, o se faatagaga o lagona e faia ai se mea lelei mo se isi tagata. Peitai e i ai le avanoa e mafai ai ona le so'o le atoaga o le meaalofa i nisi o taimi. E mafua mai ona o se tulaga o le le ausia, ia po o se alualua foi ua fai ma pona e pona'ia ai le faia o se meaalofa.

A o le meaalofa lava ia ua atoatoa. O le meaalofa lea ua atoali'o ai lagona o le tino mafaufau ma le agaga e ofoina atu ai. O le tafatolu lea a oo ina autasi finagalo ma malilie faatasi, ona mauti'eti'e lea o le nenea o le meaalofa ma ua faalagi o le MEAALOFA ATOATOA. O le mea ua ofoina ona o le alofa, ua tino mai i lona atoaga e tatau ona i ai, ua ofoina foi ma le malie o le mafaufau, a ua faia mai foi i totonu o le loto ua malie atoatoa. O lea ua i faitoto'a o Ierusalem le galuega fa'aauau o le Tala Lelei a Iesu ma ona so'o. Ua mavae nisi o faamalologa, a'oa'oga, ma le lasi o ala na faalia ai le mana silisili ese o Iesu Keriso. O gaioiga sa sila maimoa ai le auso'o, a o ni a'oa'oga foi sa tau faatotoga ai e Iesu ona so'o leaga e i ai le taimi e tuua ai na o latou. O faamalologa ma a'oa'oga a Iesu, e mafai ona faapea o nisi ia o ana meaalofa atoatoa mo le tagata e faalogo ma talia. A

o le aga atu o Iesu ma ona so'o i Ierusalem, o lo o mafai ona atagia ai nisi o meaalofa atoatoa. E le gata i le atoatoa i lona itu lelei, ae o lo o i ai foi ma le meaalofa i lona itu e le lelei.

Meaalofa atoatoa 1: Faaolataga e ala i le maliu o Iesu Keriso
: Tomua lava le mataupu sa faitauina ina ua tautino e Iesu lana meaalofa atoatoa i ona so'o. ...e tuuina atu ai le Atalii o le tagata ina ia faasatauroina. Le meaalofa atoatoa lea e ala i lona maliu, o lo o ua pei o se timu e see i tua o le pato i le faalogo a le au so'o. Aua o le upu moni, o lea ua faalologo ai le ausoo, ae le o lagona. O le uiga o le le lagona e le o malamalamama i le uiga moni o le fetalaiga a Iesu. E le o i ai so latou manatu e ono oti Iesu pe a oo i Ierusalem. Ua na o le manatu fia sili lagona o lo o laualuga i manatu o so'o ona o le pule o lo o ia Iesu.

Meaalofa atoatoa 2: Fafine ma le fagu Alapasa: f6-13 - o lo o manino ai le meaalofa atoatoa na faia e le fafine ina ua liligi le fagu alapasa taugata i lona ao. O le po na mapu ane ai Iesu ma ona so'o i le fale o Simona i Petania o le aai e latalata i Ierusalem, ao le taeao o le aso e soso'o ai o le aso Sapati lea. E sauni ai le malaga faatupu a Iesu i Ierusalem. Manino a i upu a Iesu, ai lava o le faatomuaga lea o lona tanuga ua faia e lenei tina e aunoa ma sona iloa.

O lo o i ai si eseesege o faamaumauga a le au sinopi i le fafine lenei ma le fagu alapasa taugata. Peitai o le 'auga lava o le meaalofa a lenei tinā, o se meaalofa ua ofoina ma le loto ua atoatoa. O le liligi ai e tusa ma le molimau a Mataio, e uiga faatasi lava ma le molimau a Mareko ina ua tata'e ma liligi e lenei tinā le fagu. O lona uiga ua liligi uma le uu manogi mo Iesu. Ua ave atoa le taugata ma le manogi mo Iesu. E leai se faamoemoe o lenei tinā e faatotoe se mea, aua o lea ua ta'e le fagu na i ai le uu manogi. E lei faapea lava na toe manatu pe manumanu foi lenei tina i le uu manogi. Leaga o le tiga o le auso'o ona o le gaioiga a lenei tinā, o lo o aumaia ai ni mafaufauga e faapea. O le manumanu i le suauu manogi, ma le tiga o loto ona o le galuega lelei ua faia e lenei tinā. O uiga faafiamitonu ia o le au so'o, lea ua latou fa'aaogaina atu ai nai tagata matitiva e ufiufi atu ai o latou mafaufauga sese. Peitai, e le i faanenefu i manatu o Iesu.

Ua leva ona latou nonofo ma tagata matitiva, e le taitai lava ona maumau ai se mea taugata faapea. O le meaalofa atoatoa, o le meaalofa e le manumanu e ave se mea taugata, e ave mea ua aupitosili ona lelei.

O lo o i ai foi ma le meaalofa e le atoatoa o lo o i ai i le faitauga o lenei aso. O le meaalofa lea o lo o au faatasi ai le au ositaulaga sili ma Iuta le Sekara. O le meaalofa o le taulamalama ma le fia fasioti ia Iesu. Ua ta'ua i manatu o le fai mataupu mea ia o le meaalofa. Ona ua manino ma malamalamama le galuega ua faia mai e Iesu mo i tatou, a o se mea e ofoina atu mo ia e pei ona faia e le fafine. O se meaalofa faatauvaa lea e tatou te taui ai lona alofa sili. Peitai ua alofa mai Iesu a o lea e ofoina atu ai e nei tagata le taulamalama ma le fia fasioti ia te ia. O se a'oa'oga foi lea mo tatou le fanau, ia faia a tatou meaalofa ma le atoatoa, ae aua le ofoina mea sese e fai ma au meaalofa. Toatele fanau o lo o talia e matua ni meaalofa atoatoa, peitai ua ese le meaalofa ua latou avatu.

Uiga o Upu:

- i) faanunununu - pisapisao ma faalavelave ai le nuu

GALUEGA FAATINO: Tusitusiga

E lua lava meaalofa atoatoa o lo o atagia i le mataupu o lenei Aso Sa, Ia toe faamatala mai i ni au lava upu meaalofa atoatoa nei e lua. Ia le silia ma le 800 upu

PESE: Pese & Viiga 73: E le Alofa o Iesu ua maliu talu ita nei.

A'OA'OGA:

1. O le a sau meaalofa mo nai ou matua
2. Ofoina lou ola e fai ma meaalofa
3. Fai meaalofa ma le fiafia.

ASO SA: **9 APERILA 2023 (Aso Sa Toetu)**

MATAUPU: **E TE LĒ SAVALI TOATASI**
(You never walk alone)

SINI: Ia malamalama le vasega, e manua mea tatou te faia i lenei ola, pe a mafuta ma savavali ma le Alii.

TUSI FAITAU: Luka 24: 13 – 35

FESOASOANI MO LE MATAUPU:

A oo ina alu ni osofaiga a se vaega tau (Team). O le upu lava lea a le Taitai e fai - *Stay together and move forward* O lona uiga ia potopoto faatasi ma savavali pea agai i luma. O le naunautaiga o le Taitai au, ina ia aua lava nei alu ese se tagata mai le vaega (Team), a ia savavali faatasi e maua ai lo latou saogalemu. O lona uiga e le tatau ona alu toatasi se tagata.

E faapena foi le savaliga a le Au Kerisiano, e le tatau ona savavali toatasi e aunoa ma le Atua. O la tatou savaliga e tatau lava ona soa i le Atua. O le Atua o le mafuaaga ua alai ona tatou savavali, o le Atua foi e faasinoala i le taunuuga o lo o tatou savavali agai i ai. Ae a manatu loa le tagata e savali e aunoa ma le Atua, ona mautinoa lea le tau i malaia.

O le Tusi sa faitauina o ni tagata se toalua na o ane i Ierusalem i le paseka, lea ua toe savavali e foi atu i Emau, pe tusa ma le fitu maila le mamao ma Ierusalem. Na tauia le omai mamao o nei tagata i le Paseka, aua ua la talitonu i le maliu ma le toetu o Iesu e pei ona faalogo ai. Na fetautalatala'i i laua i le ala, ma o le avanoa lea na iloa ai e le Keriso toetu, ua i ai le faatuatua i nei Taulele'a. Le ala lea na ia faalatalata faalilolilo atu ai i nei tagata. E manatu ai o le finagalo o le Keriso Toetu, ia faaaogaina nei taulele'a ia fesoasoani i le auso'o filifilia mo le talaina o le Tala Lelei i Emau.

O le i ai o i laua nei i le ala, na latou savavali faatasi ai ma Iesu, E lei faigata ona iloa e Iesu le faatuatua o nei tagata. E ui na faigata ona la iloa Iesu, peitai na faigofie ona la iloa Iesu ina ua latou fetautalatalai i upu a Perofeta. O le savavali faatasi ai o Iesu ma i laua nei, o le vaalaauina lava lea o i la'ua mo le talaiga o le finagalo o le Atua. Na faalogo nei tagata i le maliu ma le toetu o Iesu, a o lea ua la talitonu ina ua faalogo i le siufofoga o Iesu. Ae le gata foi i lea, lea lava na faapupulaina e Iesu o laua mata ina ua aai i le areto o le faatusa o le tino o Keriso.

Na ootia lagona o nei uso, ma ua mu o la loto ina ua la iloa mautinoa e moni lava o le Keriso Toetu na latou savavali faatasi mai i le ala. Ua toe foi atu i laua i Ierusalem ma ua tautino atu i ai le mea na faia e Keriso ia i laua. O le tagata lilo o Keriso na savavali ma nei tagata, o le ata foi lea o le tagata lilo o Keriso o lo o ia i tatou i taimi uma, O lona uiga e ao lava ona tatou savavali e tusa ma ala o Keriso, leaga o lea e molimau Keriso i la tatou savaliga i taimi uma o lo tatou ola. O a foi ni mea lelei ma ni manua tatou te tau atu ai i le ala i la tatou savaliga. Ia tatou manatua, e le o tatou e mafua ai a o Iesu Keriso o lo o tatou savavali faatasi.

GALUEGA FAATINO: TALIGA FESILI

1. O le a le fua o le mamao o Ierusalem ma Emau o lo o taua i le tala?
Tali: Fitu maila
2. O ai le igoa o le tasi o i laua?
Tali: Kaleopa
3. O le a le taimi na pupula ai o la mata ma iloa ai Iesu?
Tali: Tofitofi ai le areto ma avatu.
4. O a ni ala e atagia ai le tagata o lo o savavali faatasi ma le Alii?
(tali mai i ni au lava upu)

PESE:

Savali i le malamalama
O maia tatou uma ma mafuta fiafia
Savali, savali i le malamalama
Tatou fealofani ua toe tu mai o ia
Savali, savali i le malamalama
Savali tautala i le malamalama x 3
Savali faatasi ma le Atua

A'OA'OGA:

1. Aua nei o tatou faamoemoe i so tatou malosi
2. E le tuuaunoaina e Iesu le tagata faatuatua
3. Tatou savavali i ala o Keriso

.....

ASO SA: **16 APERILA 2023**

MATAUPU: **TOE AMATA (Starting over)**

SINI: Ia malamalama le vasega, pe afai ua tatou toilalo i le agasala, e finagalo le Alii ia tatou salamo ma foi atu ia te Ia.

TUSI FAITAU: Faamasino 2: 6 – 23

FESOASOANI MO LE MATAUPU:

Ua mapu ane si toeaina o Iosua i le tuugamau ina ua mavae atuvasa sa o la taitai ese mai ai ma Mose, le nuu o Israelu mai le nofo pologa i Aikupito. Ua omai tupulaga ma alu, ua mavae foi tupulaga sa o latou tauave mai le mea na a'oa'oina ai e Mose ma Iosua, e ala lea i le tumau i le Feagaiga ma le Atua. Ua agai lava le ituaiga latou i lo latou Tamā ua i ai i lea vaitau e tusa o ituaiga o Israelu. Ua fai lava le mea e loto ai le tagata latou, ma ua pei o

se lafu mamoe ua leai so latou Taitai le nuu o Israelu i lea vaitau.

Ua avea le leai o se Taitai ia Israelu ma ala ua tafili saunoa ai faiga filifiliga a tagata. Ua tuu saoloto lava le tagata ia i lana faaiuga fai i totonu o le nuu. Ua le toe manatua le Atua, ma ua avaga atu i atua ese o Paala ma Asaira. Ua matua tanumia le alofa fai paaga o le Atua na o ese mai ai mai le nuu sa nofo pologa ai. Ua taitaina faa i'a matau e isi malosi lo latou malosi, aua ua leai se Atua sa fai ma o latou aao taitai.

E foliga mai e tele a se galuega toe amata e toe faia mo le nuu o le Atua. Ua taape ma salalau solo ua taitasi ma le atua mate e mulimuli ai lava le tagata ia. O le mea faigata i le Atua, ona o lea lava o lo o i ai tagata sa faia le finagalo ma o latou iloa mautinoa le aao faaola ma le mana silisili ese o le Atua. Peitai lea e foliga mai ua sili atu atua e leai ni ola nai le Atua o le ola. E ui lava foi ina ua i ai faamasino e tau galueaina le nuu, peitai e foliga mai o lo o faasolo lava ina faigata le tulaga ua i ai Israelu. Ua sili atu le leaga o tupuluga o lo o gasolo ane nai lo o tuaa ua mavae.

E le faigata i le Atua ona aveesea atua mamate ua tosina ai lona nuu, peitai o le naunautaiga o le Atua o tagata o lona nuu ina ia latou iloa. E ui lava la i le tiga alofa o le Atua i lona nuu filifilia, ae lei avea lea ma ala e aveesea ai le olopalaina o Israelu e isi malosi. O lo o fa'aaogaina e le Atua isi malosi ese nei e tofotofoina ai le faatuatua o lona nuu ua uma ona a'oa'o ma ua vaavaai ai foi o latou mata.

I le va nonofo ai la o le Atua ma lona nuu o Israelu, e pei e foliga mai o lea ua tau toe amata ona tau a'oa'o le nuu i amio e tatau ona fai. Ae o le mafutaga ua uma ona tuu laupua mea uma e ala i le Fegaiga ua uma ona osi, ua uma foi ona fofola e le Atua le alafua o mea uma i le lotoifale o le Israelu. Lea o le a tau toe a'oa'o i le mea ua uma ona a'oa' o ai anamua. A fua faa le mafaufau i ai, o lea lava e iloa e Israelu le mea e tatau ona fai peitai ua le faia ona ua manumalo uiga sese. O se a'oa'oga foi lea mo tatou le fanau, ua uma ona a'oa'oina i tatou. Aua nei pei i tatou o le tamaitiiti faatoa fanau mai e tau toe amata ona a'oa'oina i le Atua ma le Tala Lelei.

GALUEGA FAATINO: Faafinauga Puupuu

Ulatala: Ua o ese Israaelu mai le Atua ona ua leai so latou Taitai?

Vaevae i vaega e Lua

Itu Tetee ma le Itu Lagolago
Ia le sili atu ma le 7 minute le faafinauga
Faamasino lau Susuga le Faiaoga

PESE: Ua ou filifili e mulimuli ia Iesu...

A'OA'OGA:

1. Aua nei galo le alofa o le Atua
2. Aua nei manumalo faaososoga ia i tatou
3. Ia tumau lo tatou faatuatua.

.....

ASO SA: **23 APERILA 2023**

MATAUPU: **O AI E ALU E MO I TATOU?**
(Who shall go up for us)

SINI: Ia malamalama le vasega, fiafia le Atua i lē na te faia lona finagalo ae to'asa i ē faia le agasala.

TUSI FAITAU: Faamasino 10: 6 – 11: 11

FESOASOANI MO FAIAOGA:

O le mataupu mo le Aso Sa lenei, o le fesili. A o le fesili o lo o ttauā i le mataupu muamua a o se vaega o le fuaipu1 o le tusi

lenei o Faamasino. O le fesili a le nuu o Israaelu i le Alii ina ua sauni e tau ma Kanana. “*Po o ai e muamua ona alu ae e tau ma tagata sa Kananā?*”

A o se fesili foi ua iloa ai e lei malamalama ma talitonu lava Israaelu i le Atua. Ua galo ia te i latou o le Atua na aveeseina mai latou a o sauaina ma nofo pologa ai i Aikupito. Sa muaau ma muliau le Atua i totonu o faigata ma tiga o le faimalaga umi i le nuu folafolaina. O le Atua sa tau mo i latou. Sa latou sopia le Ioritana ma ulufale i le nuu folafolaina ona o le Atua, a o lea ua fesili, po o ai e muamua atu e tau mo i latou.

A fua i le mea ua fesili ai le nuu, e foliga mai ua mananao e filifili se tagata e fai ma taitai, ae ua galo le Atua sa fai ma taitai sili i taimi o lo latou puapuagatia i le amataga. O le mafuaaga lea na tofia ai faamasino e taitai le nuu. Ae e lei avea taitaiga a faamasino ma mafuaaga na ola manuia ai le nuu.

O lo o manino lava i le vaega o le mataupu e 10, lea sa fai ma tusi faitau le toe foi o Israaelu i le ola agasala, a o le i valaauna Iefata e fai ma faamasino. “*Ona toe amio leaga lea o Israaelu i luma o le Alii.*” (f 6).

Ua latou auauna ma tapuai i atua o nuu ese. Ua latou tuulafoai i le Atua. Ae e le o se mea fou lea ia Israaelu. A oo i taimi e feagai ai ma puapuaga ma faigata, ona alalaga lea i le Alii mo se laveai. Ae a maua le filemu ma le toamalie, ona toe fulitua foi lea o o latou loto i le Atua, O le mafuaaga lea na toasa ai le Alii, ma ia filifilia ai Amoni ma Filisitia e aoai lona nuu. E 18 tausaga sa sauaina ai e Amoni ma Filisitia le nuu o le Atua.

Ona toe alalaga foi lea o le nuu i le Atua mo se lavea'i. E foliga mai e fai e Israaelu le agasala ma le mautinoa, e toe laveai lava i latou e lo latou Atua. E alofa le Atua, ae aua nei tofotofo e le tagata le faamaoni o le Atua.

I le f 14, o le mataupu e 10, o lo o aumai ai le tali a le Alii i lona nuu. “O ia na valaaū i atua ua outou loto i ai sei latou faaola ia te outou i ona po o lo outou puapuaga.”

Ae ui lava i le amio leaga o lona nuu, ae tumau pea le Alofa o le Atua mo Israaelu. Ua uma ona alalaga le nuu i le Atua, ona latou filifilia ai lea o Iefata e fai ma faamasino e taitai le nuu. Lea e

faamatala e le mataupu e 11. E lei filifilia e le Atua Iefata, ae o tagata o le nuu. A fua i upu o le savali a le nuu na o ia Iefata, na sese ai foi i luma o le Atua. E fesili i le Atua po o ai e auina atu mo latou, a o lea lava ua latou filifili le e avea ma o latou taitai. Ae ona o le faamaoni o le Atua i lona nuu na ia faatasi ai ma Iefata e ala i lona Agaga Paia. Na tau le tuua ma toilalo ai Amoni ma Filisitia i le taitaiga a Iefata. E mafua ona ua auauna Iefata ma le faalagolago i le Atua.

Uiga o Igoa ma Upu:

- i) Iefata - tatala
- ii) Amoni - o le ua gatia
- iii) Filisitia - o le ua faaleaga
- iv) muaau - muamua
- v) muliau - mulimuli

GALUEGA FAATINO: Taliga Fesili

Fesili ma Tali:

1. O le a le uiga o le faaupuga lea? “O ai e alu a'e mo i tatou?
- Tali: O le saili lea po o ai e taitaia le nuu o Israelu.
2. O fea le nuu folafolaina lea sa taua i le mataupu?
- Tali: O Kanana
3. Aisea na sola ai Iefata i ona uso?
- Tali: Na latou tulia Iefata, auā e le maua sona tofi i le aiga lona tamā.
4. O ai na filifilia Iefata?
- Tali: O le nuu o Israelu.

5. E tonu le filifilia Israelu?
- Tali: Leai
6. Aisea?
- Tali: Ona ua latou filifili le tagata ae le filifili le Atua.
7. E fia tausaga na sauaina ai Israelu e Amoni?
- Tali: 18 tausaga.
8. A o le i avea Iefata ma Faamasino o le a le mea sa tupu ia Israelu?
- Tali: Ua toe foi i le ola agasala.
9. O ai le nuu sa au ma Amoni?
- Tali: O Filisitia
10. O ai le igoa o le tama o Iefata?
- Tali: O Kiliata

PESE: 168 (Pese ma Viiga)

A'OA'OGA:

1. E manuia le ola auauna i le Atua.
 2. E faamaoni le alofa o le Atua.
 3. Amanaia lou uso.
-

ASO SA: **30 APERILA 2023**

MATAUPU: **UA MAVAE IOSUA (After Joshua)**

SINI: Ia malamalama le vasega, na faia e le fanauga a Israelu le amio leaga i luma o le Alii, ina ua mavae Iosua.

TUSI FAITAU: Faamasino 6: 1 – 10

FESOASOANI MO FAIAOGA:

E le o ttau Iosua i le tusi faitau o le mataupu o le Aso Sa lenei. E pei foi o le mataupu o le Aso Sa ua tuanai, ae o lo o ttau Iosua i le mataupu 1 fuaiupu 1 o le tusi a Faamasino. E foliga mai o lo o agai le mataupu i mea na tutupu i le nuu o Israaelu ina ua mavae Iosua. Ae po o le a foi le tulaga o le tulai mai o faamasino e taitai le nuu o Israaelu. Ae foliga ai foi o lo o tau faatasi Iosua ma faamasino lea e i ai Kitiona. E to'a 12 faamasino sa faasolo mai e taitai le nuu o le Atua ina ua mavae Iosua. O igoa nei o faamasino:-

- | | | | |
|----|----------|-----|----------|
| 1. | Otineru | 7. | Iairo |
| 2. | Euta | 8. | Iefata |
| 3. | Samekara | 9. | Ivisona |
| 4. | Tepora | 10. | Aluna |
| 5. | Kitiona | 11. | Apetonu |
| 6. | Tulaga | 12. | Samasoni |

E mavae atu Iosua ae tulai mai faamasino e lei iloga lava ona tumau Israaelu i le Atua. E femoumoua'i pea lo latou faatuatua i le Atua. O le mafuaaga lea o le tele o faigata e feagai ma le nuu. O Kitiona e lona 7 mai le faagasologa o faamasino, ma o mea ia na tutupu i le nuu i le taimi o Kitiona ina ua mavae Iosua. O le uiga o le igoa o Kitiona, o le toa malosi.

E pei lava o le mataupu o le Aso Sa ua tuanai o lo o faamatala ai le amio a le nuu o Israaelu. A mavae atu lea faamasino ona toe foi lea o Israaelu i le amio agasala i luma o le Atua. O le tala ia Kitiona, o le vaitaimi tonu lea na faatoilalo ai e Mitiana le nuu o Israaelu. E matautia le mea na oo i le nuu o le Atua ina ua faatoilalo e Mitiana. Fai mai le tala ua sosola Israaelu ma nonofo i lua ma ana i luga o mauga. Ua fai ai a latou faatoaga ma lafu manu. Ae o nei mea uma ua fai mo tagata Mitiana. Ua tele le mativa i le nuu ma le fia aai. Ua latou lagona le matautia o le ola

pologa. Ona alalaga a lea i le Atua mo se laveai. Na auina atu e le Atua le agelu i le nuu, ma toe faamanatu i le nuu mea uma na faia e le Atua mo i latou, mai Aikupito seia oo i Kanana. Na laveai e le Atua lona nuu mai ona puapuaga ina ua filifilia e le Atua le toa malosi o Kitiona.

O le mea o lo o ttau i le tala lenei, e le o le lavea'i mai i puapuaga, ae o le mafuaaga e mafai ai ona oo puapuaga i le nuu o le Atua. E le o mafai lava e Israaelu ona tautino lo latou amio sese i luma o le Atua. O le mea lea e le mafai ai ona latou maua se ola fiafia ma faatumau ai pea le ola pologa. E le fou le ola pologa o Israaelu, ae ua le fou foi le le faalogo ma usitai i le Atua. Na lavea'iina le nuu ina ua faatoilalo e Kitiona ma lana au tau Mitiana. Ae e lei lavea'iina lava loto o le nuu i le ola femoumoua'i i luma o le Atua. E alalaga na o laugutu i le Atua, a o loto e toilalo pea i le leaga. E tiga ona o le ola pologa, ae tiga le Atua ona o le faatafea so' o o o latou loto mai le Alii.

O le uiga la o le mataupu o lenei Aso Sa – “Ua mavae Iosua,” ae le mavae le ola agasala o Israaelu. Ae po o le a lava le ola agasala o le nuu, e le mafai ona mavae le alofa o le Atua.

GALUEGA FAATINO: Translation (Faaliliu)

Faaliliu mai le parakalafa faa-Peretnia i le faa-Samoa.

“Also I said to you, I am the Lord your God, do not fear the Gods of the Amorities, in whose land you dwell. But you have not obey my voice.” (Faamasino 6 fuaiupu e 10)

Fesili ma Tali:

1. E fia faamasino na taitaia Israaelu ina ua mavae Iosua?
Tali: E 12
2. E lona fia Iefata i faamasino?
Tali: Lona 7

3. O ai le uluai faamasino tamaitai?

Tali: O Tepora

4. O ai le faamasino muamua o le nuu?

Tali: O Otinelu

5. O ai le faamasino mulimuli?

Tali: O Samasoni.

6. O a nofoaga na nonofo ai Isaraelu, ina ua tafea i Mitiana?

Tali: O lua i mauga, o ana ma olo.

7. O le a le mea na tupu i faatoaga a Isaraelu na foi i Mitiana?

Tali: Na faataumaoi e tagata ese.

PESE: 91 (Pese ma Viiga)

A'OA'OGA:

1. Tautino ma le faamaoni sese i le Atua.

2. E le mavae le alofa o le Atua ona o le agasala.

.....

ASO SA: **7 ME 2023**

MATAUPU: **TAPUAI I TOTONU O LE FALE IE**
(Worship in a tent)

SINI: Ia malamalama le vasega i le taua o le faleie i le ola tapuai o le nuu o Isaraelu.

TUSI FAITAU: Esoto 33: 1 – 11

FESOASOANI MO FAIAOGA:

Ina ua o ese mai Isaraelu i Aikupito ua agai atu i le nuu folafolaina, o se faigamalaga umi sa feagai ma i latou. E 40 tausaga o le faigamalaga. E nonofo umi i se nofoaga e feofeo'a'i solo (nomadic). O le mafuaaga lea e fa'aaoga ai e le nuu fale fetafai, o fale e mafai ona feaveai. A mapu i se nofoaga ona faatutu lea o pou ae ufiufi i ie, lea e mafua ai ona faaigoa o fale ie (tent). E 15m le mauluga ae 10m le lautele. O lanu o ie e ufiufi ai le fale, moana (blue) lanu viole (purple) ma le lanu mumu (scarlet). Ae mamanu i ata o kerupi po o agelu. Ae ala ona taua le fale ie ona e tuu ai le atolaau a le Alii ma avea ma malumalu e tapuai ai Isaraelu i le Atua.

O le tala sa faitauna, o le taimi lea ua uma ona toasa le Atua i lona nuu ina ua latou fausia le tupua auro (povi) na ifoifo i ai. Ona faatu ai lea e Mose o le fale ie e fai ma nofoaga e faapotopoto ai le nuu. Ina ua ulufale Mose i le fale ie, ua vaaia ai e le nuu le ao faaniutu i luga o le fale ie, o le faailoga ua auai le Atua. A o totonu o le fale ie, o lo o faafesagai ai Mose ma le Atua. O le fale e saili ai e Mose le toamalie ma le filemu o le Atua mo lona nuu.

O le mea ua tupu, ua amata foi ona faitio ma tomumumu le nuu ia Mose. Ua alu Mose i le fale ie po o le falefetafai e talanoa ma faasoia i le Atua mea ua mafatia ai lona loto i le nuu. Ua alu e saili fesoasoani i le Alii. O lona uiga o le fale ie, o se nofoaga e saili ai e Mose lona mapusaga ona o le faigata o lana galuega. O le nofoaga e Afio ai le Atua. O lona uiga pe a tuu mai ia i tatou i le taimi nei o faleie i taimi o Mose o le falesa i lo tatou vaitaimi. Lea ua fai ma fale tatou te tapuai ai i le Alii i Aso Sa taitasi. Ae po o le falesa po o se fale ie e tapuai ai, ae a le Afio ai le Atua, o lona uiga e le o tatou tapuai ma le loto faamaoni i le Atua. O le fale sili lava mo le Atua, o le loto o le tagata ia afio tumau ai le Alii.

Ua fetalai Iesu – “*Tou te le iloa ea o outou o le malumalu mo le Alii.*”

GALUEGA FAATINO: Tusiga Tala

Ulutala - “Taua o le falesa”

Faatonuga – Tusi mai sau tala e faatatau i le ulutala o lo o i luga. Ia 2 parakalafa o le tala. E mafai ona faamatala le taua o le fale ie ia Israelu, ona faasoa mai lea i le taua o le falesa i le taimi nei o tatou.

PESE: Pese 2 (Pese ma Viiga)

A’OA’OGA:

1. Toaaga i le lotu.
2. Ia avea o tatou loto ma nofoaga e afio ai le Alii.

.....

ASO SA: **14 ME 2023 (Aso Sa o Tinā)**

MATAUPU: **UPU O LE OLA (Words of Life)**

SINI: Ia malamalama le vasega, o Afioga Paia a le Atua, tatou te maua mai ai Upu o le Ola.

TUSI FAITAU: Mataio 7: 1 – 12

FESOASOANI MO FAIAOGA:

O le Upu lava ia, o se auala lea e faailoa mai ai se finagalo po o se mea o i le loto o se tasi. A tatou mafaufau toto’ a i ai, e tele ma anoanoai ituaiga o upu, o upu malie, o upu lelei, o upu faatupu vevesi, o upu taufaifai, o upu faaviivii, o upu taufaasee, ma le anoanoai o isi o ituaiga o upu. Ae o le tatou mataupu i lenei taeao, O UPU O LE OLA. O upu aogā tatou te maua ai le ola, e le gata i le tino, mafaufau, ae sili i le ola faaleagaga. O upu mai le

Afioga Paia a le Atua e tatau ona tatou olaina, e pei o le faia lea o le mea sili i le isi tagata, faapei ona e manao e fai mai e le isi tagata ia te oe, aua o le atoaga lea o le tulafono ma le au perofeta, lea e ta’ua o le tulafono auro, (golden rule).

O le Upu foi, ua mafai ona faauiga mai i le gagana Eleni i le upu o le Logos, ua faailoa mai ai le finagalo o le Atua mo i tatou. Lea e pei ona faailoa mai foi i le (Ioane 1: 1) e faapea, “Sa i le amataga le Upu, sa i le Atua le Upu, o le Atua foi le Upu”, ma o le Afioga Paia foi ia a le Atua. O le fa’aaliga manino lea o le finagalo alofa o le Atua i le tagata, lea na liutino tagata mai i le lalolagi, e ala mai ia Iesu lona Alo (incarnation), aemaise o lana galuega faamisionare, atoa ai ma lona alofa tunoa, e ala i le faaolataga na ia saunia mo le lalolagi uma. Ae le gata i lea, o le Upu foi o le mana silisilise lea o le Atua na Ia fausia ai le lalolagi ma mea o i ai, auā na o na Ia fetalai lava ona i ai lea o mea uma.(Eperu 11:3)

I le faitauga la o lenei vaiaso, mai le Evagelia a Mataio mataupu e 7 e oo i le mataupu e 9, o le fatu lea o le galuega e pei ona faailoa mai i le mataupu e 4 e oo i le mataupu e 16, lea e faatatau i a’oa’oga ma galuega faamalolo a Iesu i le nuu o Israelu, faatasi ai ma lo latou teena o Ia. Ae, i le tau amataina mai o le Eklesia, o le Evagelia muamua lea i le faasologa o Evagelia ua fauina ma taitaiina loto o tagata kerisiano i ala o Iesu Keriso.

Ua faatatauina lenei Evagelia mo le faapotopotoga o tagata Iutaia le talitonu, atoa ai ma tagata o nuu ese, e tusa ma lo latou iloa ma lo latou faalagolago i Tusi Paia Eperu, faatasi ai ma lo latou faanaunauga ia Iesu, o Ia o le Mesia o tagata Iutaia, ua faataunuina ai le finagalo o le Atua sa valoiaina.

E pei la ona faia i le tau-amamatataina mai o le Eklesia, o lo o faapena lava ona fa’auau seia oo mai lava i le taimi nei, ona faailoa mai le Tala Lelei ia Iesu Keriso, o ana feagaiga, faatasi ai ma ana afioga, o le sulu i o tatou vae ma le malamalama i o tatou ala. O upu o le Ola.

O se faamanatu foi lea o le tatou mataupu i lenei taeao, o lo tatou olaina ma le taliaina o Upu o le Ola, o lo tatou mulimuli lava lea i ala o le Alii o Iesu, e aofia ai le ofoina atoa o lo tatou talitonuga

ma le faatuatuaga i le Atua, o le faamaoniga lea o lo tatou faatinoga o lona finagalo. E ao ai i so o se kerisiano ona agalelei atu i isi uso, ae aua le faamasino atu, a ia ofo atu so o se mea e manaomia i e o moomia ia tulaga uma. Ia mata'u ma ava i mea e paia, ia atagia ma iloa lea i taimi e saunoa ai, faatasi ai ma ana mea uma e fai. O lea e tatau ai i so o se kerisiano ona naunau ia ola ma le loto atoa i le alofa mutimutivale, alofa tunoa, ma le auai faatasi o le Atua, i le taimi nei ma so o se mea e le aunoa, aua o lona alofa lava lea na Ia afio mai ai i le lalolagi ina ia tatou maua le ola, ma maua atili ai lava, pe afai ua tatou olaina ma savavali ma le atoaatoa i Upu o le Ola.

Uiga o Upu:

- i) utupoto - O se laau lapoa e fa'aaoga i fale Samoa.
- ii) uli - maile, taifau.

GALUEGA FAATINO: TUSITUSIGA

Tusi mai ni faataitaiga o Upu o le Ola mai le vaega o le Tusi sa faitauina mo le mataupu.

PESE: Laulau mai pea ia tei matou.....(Pese ma Viiga)

A'OA'OGA:

- 1 Ia tatou filifili i Upu o le Ola tatou te savavali ai.
 - 2 E le na o Upu, ae ia faatino ma ola ai.
 - 3 Toaga e fai tau le Tusi Paia, e maua mai ai Upu o le Ola.
-

ASO SA:

21 ME 2023

MATAUPU:

Ō ATU IA E FAAMALOLŌ MA FAASA'OLOTO O'U TAGATA.

(Showing up in the Arena)

SINI:

Ia malamalama le vasega, o le valaauna e Iesu o ona so'o mo le galuega faamisionare, o lona finagalo foi lea mo i tatou uma.

TUSI FAITAU: Mataio 10: 1 – 15.

FESOASOANI MO FAIAOGA:

E foliga mai o lo o faatāua i le mataupu o lenei taeao le au-so'o e toa 12, o le tatou Alii o Iesu e pei ona Ia vaalaauina ai i latou, mo le galuega faa-misionare aemaise o le folafolaina o le Tala Lelei, Ō ATU IA E FAAMALOLŌ MA FAASA'OLOTO O'U TAGATA. O le fuaiupu e 2 e oo i le 5 lea o lo o faailoaina mai ai o latou suafa po o igoa. Ae i le tatou lalolagi nei, e pei e tatau a ona faailoa mai na o i latou na aogā mo le faia o le galuega folafola o le Tala Lelei ia le aofia ai ma Iuta. Peitai e le o le faamamafa lea a Mataio. E fa'aaoga uma lava e Ia tagata e oo lava ia Iuta e ui e le i taunu lelei lona faatinoina o le galuega folafola o le Tala Lelei ia Iesu. Ae e faapea foi se ata o le finagalo o le Atua mo i tatou. E le faatāuina e le Alii le viia na o i latou o e lelei i le faatinoina o galuega, ae e aofia ai lava ma i latou uma na loto atu e ofoina le auaunaga ma le tautua mo le galuega folafola. E silafia lava e le Alii, o le auso'o foi ia ua na o ni meafaigaluega faatauvaa, e leai a se tasi e atoaatoa. A o le agaga taua lea, e le avea foi le latou le atoaatoa, e faavaivaia ai lo latou taumafai, aua o lea lava sa o latou ofoina atu i latou mo le galuega folafola o le Tala Lelei. I lenei la vайасо, ua tatou vaavaai ai i auala ua a'oa'o mai e Iesu ina ia tatou ola ai, e ui e ono fai foi ia ma luitau ma mea faigata i lo tatou ola. Peitai, o le mea e pito

sili ona taua, ia tatou iloa, o le alofa o le Atua e le fuaina i a tatou mea e fai. Faapei foi o le au-so'o, e faapena foi ona manatua pea ma faamauina o tatou igoa i le tala o le galuega folafola o le Tala Lelei, ina ua tatou ofo atu lo tatou ola mo lo tatou valaauna ua aumai e le Atua tatou te faatinoina. O le fesili o le a le valaauna? O le tali, **Ó ATU IA E FAAMALOLŌ MA FAASA'OLOTO O'U TAGATA.**

Ioe o se faamanatu lea mo i tatou le fanau, o le tatou galuega lava lea ma le valaauna mai le Atua faapei foi ona fetalai tuusa'o ai lo tatou Alii i ona so'o, latou te o e faatino. Ia manatua, o le galuega faamalolo ma le folafolaina o le Tala Lelei o se galuega alofa e faasaoloto ai tagata ua saisaitia i le malosi o le agasala. E faailoa ai lo tatou alolofa i isi o tatou uso, aemaise ai o lo tatou alolofa i lo tatou Alii. Faapei foi ona faia e Iesu le faaolataga mo i tatou, o le faailoga lava lea o lona alofa silisilese mo i tatou uma, ma e tatau foi ona faapea ona tatou faia.

Uiga o Upu:

i) aposetolo – o le ua auina atu mo le galuega.

GALUEGA FAATINO: FAATALANOAGA.

Ia faatalanoa tamaiti, ia latou taitasi ma faailoa mai le tele o faatonuga eseese na poloai ai Iesu i ona so'o e o e faaatino, e uiga i le galuega ua vaalaauina ai i latou e pei ona aumai i le Tusi faitau o le tatou mataupu i lenei taeao.

PESE: Alaga le siufogga o le leoleo mamoe..... Gospel

A'OA'OGA:

- 1 Ia ofo atu lou ola mo le Tala Lelei ia Iesu Keriso.
 - 2 Alofa i lou uso ma alofa i le Atua.
 - 3 Ia fesoasoani atu i ē mama'i.
-

ASO SA:

28 ME 2023 (Aso Sa Penetekoso)

MATAUPU:

TALA LELEI MO E SAUAINA.
(Good news for the Oppressed)

SINI:

Ia malamalama le vasega o le Tala Lelei, e mafai ona avea lea ma faamalosi'au mo e ua sauaina.

TUSI FAITAU: Isaia 61: 1 – 3

FESOASOANI MO FAIAOGA:

O le mataupu o lenei taeao (Tala Lelei mo e sauaina). A o le taeao foi lenei o le Aso Sa Penetekoso. O le aso Penetekoso, na atoa i ai le 50 aso talu ona maea le toetu manumalo mai o Iesu, ua afio o Ia i le lagi, ae sa faatalitali i ai le auso'o i Ierusalem i le afio ifo o le Agaga Paia e faatumuina ai i latou, aua le galuega folafola o le Tala Lelei. O le aso foi lea sa faailogaina e tagata Iutaia mo faiga-taulaga o uluai fua o seleselega o faatoaga, (festival of weeks), ma o le aso lea foi ua fai nei ma aso fanau o le Ekalesia, aua na amataina ai le uluai Ekalesia i le lalolagi. O le Tala Lelei faakerisiano, o se tala fiafia, o le tala i le alofa o le Atua, o le tala e uiga i le malo o le Atua, faatasi ai ma Iesu Keriso lona Alo. O lona Maliu ma lona Toetu manumalo mai le oti ma le tuugamau mo le faamagaloina o agasala a le lalolagi.

E femolimaua'i lava le Feagaiga Tuai ma le Feagaiga Fou o Afioaga Paia a le Atua. O le tele a o valoaga a perofeta mai le Feagaiga Tuai, lea lava ua taunuuma i le Feagaiga Fou. O le tusi foi lea a le perofeta o Isaia sa o tatou faiatina, o lea foi e toe fa'aaoga mai e Iesu i le Feagaiga Fou, (Luke 4:18,21). E faapei foi o le soifua mai o Iesu i le lalolagi, lea foi sa valoia e perofeta e pei o Mika,5:2 Sakaria,9:14 Isaia,7:14. E faapena le tatou mataupu i lenei taeao. Tala Lelei mo e sauaina, ae e agavaa lava foi i ai ma so o se tagata i le Tala Lelei o le alofa tunoa o le Atua.

O le tusi faitau la o lenei aso, o lo o i ai le amataga o le faitauga a Iesu i le sunako i Nasareta, lea na ia faailoaina ai i lona nuu e faapea, O le aso nei ua taunu ai ia te au afioga uma e pei ona outou faalogo ai, “*Ua i ou luga le Agaga o le Alii, auā ua na faau mai ia te au e folafola le Tala Lelei i e matitiva, ua auina mai au e ia e faamalolo i e loto momomo, e talai le saolotoga i le tafeaga, ma ia pupula mata o e tauaso, ma tuu saoloto i e ua sauaina*” (Luka 4:18,21). O i na faailoa ai e Iesu i lona nuu, o le Tala Lelei ua aumaia, o le toe faafoisia lea o le saolotoga mo e saisaitia ma sauaina, ma e ua le maua atoaatoa le soifua manuia. Ioe, o le Tala Lelei, e faaliliuina ai lē ua sauaina, ma lē o faia sauaga. O le Tala Lelei, o le avatu lava lea o le ola i so o se vaega o le foafoaga faapei ona finagalo ai le Atua.

O le tatou talanoa ai la i ē sauaina ma ē o faia sauaga e faapea, e foaiina atu ia te i latou le matagofie e sui ai le lefulefu, o le olioli e sui ai le faanoanoa, o viiga e sui ai le loto faavaivai, o le tatou talanoa lava lea i le faamagaloga, ae a le togiola na faia e Iesu mo i tatou uma. Ioe, o se faamanatu mai foi lea o le tatou mataupu aemaise o le Tala Lelei mo i tatou le fanau, ia tatou iloa ona alolofa ma faamagalo i isi o tatou uso o mafatia ma aafia i sauaga ma puapuaga. Ia ofoina i ai le fesoasoani aemaise o le faailoa i ai o le Tala Lelei e uiga i le alofa o le Atua, ia faaolaina ai i e ua sauaina ma so o se tasi o ola pea i le pogisa i latou o faia pea sauaga leaga ma sauaga mataga.

Uiga o Upu:

i) talileleia – talia atoatoa.

GALUEGA FAATINO: Faatalanoaga.

Fetufaa le faiaoga ma le vasega – Pe aisea ua taua ai le galuega na faia e Iesu Keriso, e ala i lona Maliu ma lona Toetu – “O le Tala Lelei”?

PESE: Pese ma Viiga 247

A'OA'OGA:

- 1 Alofa i le Atua ma le lua te tuaoi.
 - 2 E le fiafia le Alii i e faia sauaga i isi.
-

ASO SA:

4 IUNI 2023

MATAUPU:

UA TANUMIA E IOSEFA LE TINO O IESU (Joseph buries Jesus body)

SINI:

Ia malamalama le vasega, o le alofa e ave'eseina ai pa vaeloto o le fefe ma le popole.

TUSI FAITAU: Ioane 19: 38 – 42

FESOASOANI MO FAIAOGA:

Fa'atalofa atu i le tatou vasega i lenei taeao fou. O le tatou mata'upu fou mo lenei taeao, “Tanumia e Iosefa le tino o Iesu” O le vaega o le tusi lea sa tatou faitauina, o le taualuga lea o le fa'asatauroina o Iesu. E tusa ma le tala a Ioane, ina ua maliu Iesu, a'o le taimi lea ua latalata i le itula e fa'amamalu ai le Sapati a Iutaia. Ua silafia e tagata Iutaia ua maliu lava Iesu, ona latou fa'atoga lea ina ia ave'ese Iesu ma pagota sa fa'asatauroina fa'atasi ma ia, ia ave'ese ma satauro o lo o tautau ai, ona o lea o le a o'o i le Sapati.

Ona sau ai lea o Iosefa le Arimataia, ma fa'atoga atu ia Pilato, ina ia aumai ai se fa'atagana na te ave'eseina mai ai le tino o Iesu mai le satauro. O Iosefa le Arimataia, o se tasi o so'o o Iesu. Pau lona e pei ona ta'ua i le tusi faitau, o ia o le so'o e fa'alilolilo e le fa'aiolaina, ona o le fefe ia Iutaia.

Ua le gata la ia Iosefa, ae ua i ai foi ma le tasi tagata ua fesoasoani ia Iosefa. O le tagata e igoa ia Nikotemo, o le faresaio.

O le tagata lea na alu fa'alilolilo ia Iesu i le po, e pei ona taua i le Ioane 3. E ui ina sa alu fa'alilolilo ia Iesu i lena taimi ona o lona fefe, peitai o lea ua maua lona lototele e fa'aali atu ai lona alofa ia Iesu. Lea e pei ona ta'ua, ua ia ave foi o le muro fefilo ma le aloe, ua u'u ai le tino o Iesu. Ona la ave lea o le tino o Iesu, ma teu i le tu'ugamau.

O le mea o lo o atagia mai i le tala tamaiti, e foliga mai o le auali'i ia, sa taumafai e natia o la tulaga i totonu o le sosaiete o tagata, ona o le fefe ia Iutaia. Peitai, ina ua tupu le alofa ia Iesu, e le'i toe lagona e i laua se fefe, ae ua la o atu ma le loto tetele, e fa'atino le galuega lelei mo Iesu.

O lona uiga sa faigata ona fa'atino e le auali'i ia se galuega ona o le fefe ma le popole, peitai ina ua lagona e i laua le alofa ia Iesu, o i'ina na fa'atea'eseina ai lo laua fefe ma le popole, ae auauna loa ia Iesu, e ala i le galuega lelei na o laua faia. Ua la teuteu le tino o Iesu i mea manogi, ma ua la ave foi i le tino o Iesu ma tu'u i le tu'ugamau fou e le'i fa'aaogaina muamua e se tagata.

Tamaiti, o le fe'au o lo o fa'aata mai e lenei tala mo tatou, o le fefe e fa'avaivaia ai tatou e fai galuega lelei. O le fefe foi, o le au'upega lea a le tiapolo e taofia ai i tatou mai lo tatou auauna atu i le Atua. O lona uiga e lē se mea lelei le fefe, ae ao ona tatou alolofa ma le loto fa'amaoni i le Atua, tatou te maua ai le lototetele ma le fa'amalolosi, e auauna atu ai ia te Ia, e ala i le faia o galuega lelei e ola ai isi tagata.

GALUEGA FAATINO: Taliga Fesili.

1. O ai Iosefa le Arimataia e pei ona ta'ua i le tala?

Tali: O ia o le so'o fa'alilolilo o Iesu.

2. O le a le uiga o le so'o fa'alilolilo?

Tali: O le tagata ua ia talia Iesu i lona loto, ae e le manao e iloa e se tagata ona o mafua'aga e pei o le fefe ma isi.

3. A o ai Nikotemo?

Tali: O le faresaio

4. O le a le mea taua o lo o ta'u mai i le tala?

Tali: O le alofa e le fefe e le fa'alilolilo foi.

PESE: 231 (Pese ma Viiga)

A'OA'OGA:

1. Aua le fefe e fa'ailoa lou alofa ia Iesu
2. Fai sau galuega lelei mo Iesu, e ala i au fa'atinoga o aso uma.
3. O le alofa na te sosofa tuaoi ma pa vaeloto o le fefe ma le popole.

.....

ASO SA: **11 IUNI 2023**

MATAUPU: **UA ALU ESE ATU LE MAMALU O LE ATUA (God's glory departs)**

SINI: Ia malamalama le vasega, o le faia o le agasala o le fa'ailogia o le alu ese o le mamalu o le Atua mai le tagata.

TUSI FAITAU: Esekielu 10:1 – 22

FESOASOANI MO FAIAOGA:

Toe fa'atalofa atu foi ia te outou le fanau i lenei taeao. Malo le onosai ma le fa'amalolosi i aoga o lena foi vaiaso. O le tatou mata'upu fou mo lenei Aso Sa e fa'apea, "Ua alu ese atu le mamalu o le Atua" (God's glory departs)

Se'i muamua lava ona tatou talanoa ma fesili po'o le a le mamalu o le Atua? What is the glory of God? O le upu moni tamaiti, e le mafai e so tatou malamalama pu mo'omo'o ona tatou malamalama ma iloa atoa le uiga o le mamalu o le Atua. Ae mo

se tau fa'apulapulaina o le mamalu o le Atua, e mafai ai ona tatou fa'apea, "O le mamalu o le Atua, o lona malamalama susulu, (radient), o lona lelei atoatoa, (perfection), o lona malosi, (weighty), ta'uta'ua, (prominence), ma le tele lava o isi upu e mafai ona fa'amatalaina ai le mamalu o le Atua.

Peitai e ui i le tele o nei mau upu e tau fa'amatala ai le mamalu o le Atua, ae le mafai lava ona atoatoa ai le fa'amatalaina o le mamalu o le Atua i sona atoaga. Ae e mafai ona ta aofai nei fa'amatalaga uma i le upu e tasi, o le ALOFA. O lona uiga, o le Atua o le alofa lava Ia.

O le mata'upu lea e 10 o le tusi lenei i le perofeta o Esekielu, o lo o tusia i se gagana fa'afa'aaliga, po o tusitusiga fa'alilolilo, (apocalyptic writings). O ni tusitusiga o lo o fa'aata mai ai se mea o lo'o natia e uiga i le Atua.

E pei la o le mea o lo'o fa'aata mai i le fa'aaliga lenei, o le va'aiga i le mamalu o le Atua sa i ai i le malumalu i Ierusalem, o le mitamitaga o so o se Isaraelu. O le talitonuga o Isaraelu, o i i le malumalu o lo o afio ai lo latou Atua e le va'aia. O le toatele foi o perofeta ma ositaulaga, sa vala'auina lava ma tofia i latou e le Atua i totonu lava o le malumalu. Lea foi e pei ona vala'auina ai le perofeta o Isaia, Ieremia ma isi.

O le mea lea e pele ai i so o se Isaraelu le aai Paia po o Siona lea e tu ai le malumalu. Peitai, e ui i so latou mitamita i lea mea, ae e le'i fa'apea na atoatoa ai ona latou auauna i le Atua na o latou osi feagaiga. E ui foi ina latou tapuai i le malumalu i Ierusalem, ae sa latou tapuai lava ma le fa'aleiloga.

O le ala lea latou te ola ai pea i le agasala ma soli tulafono a le Atua. Ae ina ua tumu le fua ma ua le mafai lava ona taofia lo latou ifo i tupua, ona fa'asala ai lea o i latou e le Atua, ma ua ave fa'atagata o taua ai i latou ma fa'atafea i nu'u ese. Ua o'o lava la i le malumalu lea na manatu i latou o i o lo o afio ai le Atua, lea ua fa'atafunaina ma ua lepetia.

O lona uiga o le malumalu sa i ai le mamalu o le Atua, lea ua fa'aleagaina, ina ua alu ese le mamalu o le Atua. O le fa'ataua o lo'o afifi i totonu o le mata'upu lenei e 10, o le va'ai. Le va'ai a

le tagata agasala ua na leiloa atu le Atua ma lona mamalu, ma le silasila mai a le Atua na te silafia mea uma lava.

Lea la ua alu ese le mamalu o le Atua ma le mea na mitamita ai le Isaraelu, ma ua latou nonofo ai loa i le pologa ma le malaia. Peitai, e ui ina ua lepetia le malumalu ma ua alu ese le mamalu o le Atua sa i ai, ae le o alu ese ai le alofa o le Atua i ona tagata. Lea ua o ese Isaraelu mai Ierusalem ma fa'atafea i nu'u ese, alu ese le mamalu o le Atua mai le malumalu, ae mulimuli i ona tagata ua ave fa'atagata o tauaina i nu'u ese. Aisea? Ona o le Atua o le alofa lava Ia.

GALUEGA FAATINO: Taua o mafaufauga (battle of the mind)

*Sipela fa'asa'o upu o lo o taua i lalo.

- | | | |
|----|-----------|--------------|
| 1. | iukrep | (kerupi) |
| 2. | arfasia | (safaira) |
| 3. | asaulu | (sa'alu'u) |
| 4. | atavaleva | (ta'avavale) |
| 5. | amumal | (mamalu) |
| 6. | atua | (Atua) |

PESE: "Le Ali'i e le Atua" (Pese 5: Pese ma Viiga)

A'OA'OGA:

1. Ia tumau le mamalu o le Atua i o tatou olaga.
2. E alofa fa'amaoni le Atua i e alolofa ia te Ia.
3. O le Atua o le alofa lava o Ia.

.....

ASO SA: **18 IUNI 2023**

MATAUPU: **FAIA LE FINAGALO O LE ATUA**
(Doing the will of God)

SINI:

Ia malamalama le vasega, o ē faia le finagalo o le Atua, o tagata na o le aiga o le Atua.

TUSI FAITAU:

Mareko 3: 31 – 35

FESOASOANI MO FAIAOGA:

E muamua foi ona fa'atalofa atu i le tatou vasega i lenei taeao fou. Fa'afetai i le Atua ua tatou aulia lenei Aso Sa ona o lana tausiga alofa ia i tatou. Ae o le tatou mata'upu fou mo lenei foi Aso Sa e fa'apea, "Faia le finagalo o le Atua".

O le tala lenei o le tala ua masani ai la tatou fa'alogo ma le faitau. Peitai, e le fa'aitiitia ai lona a'oa'o mai pea mo tatou i aso uma. E tele ni mea taua o lo o afifi ai i totonu o lenei tala. E pei foi la o le fa'amamafa ua aumai i lenei taeao.

E pei ona fa'amatalaina mai e Mareko, le nofoaga lea sa i ai Iesu, o le malumalu. O lona uiga o le isi lea fa'aa'oa'o ua aumai e lo tatou Ali'i mo tatou, ia tatou fiafia e ō i le fale o le Alii, po o le falesa.

E tusa la ma le tala a Mareko, na fa'alogo pe na logo tala le aiga o Iesu i mea ua faia e Iesu ma ana a'oa'oga, ona manatu lea o i latou, ai ua fa'aletonu le mafaufau o le Ali'i, o le ala lea na latou ō atu ai e saili ia te ia ma le fa'amoemoe, ina ia fa'afai mai o ia i lo latou aiga.

O tagata ia e ta'uua o le aiga o Iesu, o lona tina o Maria, ma ona uso. E taunu'u atu la i latou nei o lo o i totonu o le fale Iesu ma ona so'o atoa ai ma le motu o tagata e to'atele ua fa'atumulia ai le fale. Ona tutū lea o i latou i fafo ma tauvala'au ia te ia. Ona tau atu lea e le motu o tagata ia Iesu, o lona tina ma ona uso o i fafo. O i la na manino ai loa le mata o le vai i le finagalo o le Ali'i. Ma ua pei ai e foliga mai o se fete'ena'iga i le va o le aiga fa'a-le-tino ma le aiga fa'a-le-agaga. Aua o lea ua ta'u atu e tagata ia Iesu lona aiga moni, o lona tinā ma ona uso, o le so'otaga pito sili

lea ona felata'i i le aiga, peitai o le tali a Iesu na iloa ai, e i ai le isi aiga e sili atu nai lo le aiga lea fa'a-le-tino.

Faimai le tali a Iesu, "O ai ea lo'u tinā, o ai foi o'u uso?" O se fesili e matua ogoga i lagona fa'a-le-tagata pe a fai e fesili fa'apea se tasi i totonu o le lio o se aiga. E foliga mai i le fesili lea, e le o malamalama Iesu i ona sootaga faiā toto, ivi ma a'ano. Peitai e le o lena, o lo o malamalama lelei le Ali'i i le so'otaga lea, ae o le mea o lo o tau fa'apupula e le Ali'i, ia aua le fa'ataua le so'otaga lea fa'a-le-tagata, ae ia fa'ataua le so'otaga fa'a-le-Atua.

Aua o le so'otaga lea fa'a-le-tagata, e mavae, peitai o le so'otaga aupito sili ona taua, o le mafutaga ma le so'otaga o tagata i le finagalo o le Atua. Ia iloa e tagata uma le so'otaga lea, ma ia malamalama tagata o le so'otaga lea e tumau, pe a o'o ina talitonu i ai tagata uma.

O lona uiga e ao ona fa'alogo ma usitai tagata uma ma faia le finagalo o le Atua, aua na pau lea o le auala e mafai ai ona auai le tagata i le aiga lea o le Atua.

Tamaiti e le itiiti le taua o ō tatou so'otaga i totonu o ō tatou aiga. Tatou te fa'alogo ma usitai i o tatou matua, ma mafanafana atili ai le alofa o matua ia i tatou. Ae fa'apea foi i tatou i matua. Ae o lena foi le finagalo o lo tatou Ali'i o Iesu. E ao lava tatou fa'alogo ma usitai i le Atua, ma fai lona finagalo, e saga mafanafana atili ai lo tatou so'otaga lea ma Ia i lona aiga faa-le-lagi.

Aua a mautu le so'otaga lea i le aiga o le Atua, ona mautinoa lea o le malosi o lo tatou so'otaga fa'a-le-tagata i totonu o aiga. Manatua, o lē faia le finagalo o le Atua, o ia lena o le suli moni o le aiga o le Atua.

GALUEGA FAATINO: Mafaufauga lautele.

*Ia talanoa ma tamaiti i le aiga Samoa ma lona faatulagaina. E amata mai i le matai ma fa'asolo ifo ai i isi vaega.

* Ia talanoa foi i le tafatolu o le aiga, e amata i le tamā, tinā, ma le fanau.

*Ona silasila lea i le aiga o le Atua e pei ona ta'ua i le tala, ma fa'afeso'otai ma aiga e pei ona ta'ua i luga, pe ua manino ai le a'ano moni o le fetalaiga a le Ali'i, "Na o lē na te faia le finagalo o lona Tamā o i le lagi, o lona tinā ma lona tamā ma lona uso ma lona tuafafine".

PESE: A i ai Iesu i se aiga.

A'OA'OGA:

1. Ia fa'alogo ma usitai i le finagalo o le Atua.
 2. Ia avea i tatou ma suli o le aiga o le Atua, e ala i lo tatou faia o lona finagalo.
 3. O i tatou o uso ma tuafafine o Keriso e ala i lo tatou fa'atuatua ia te Ia.
 4. Fiafia e faalologologo i tala ia Iesu.
-

ASO SA: **25 IUNI 2023**

MATAUPU: **FAAMASINOGA I Ē TUAOI.**
(Judgement on the neighbours)

SINI: Ia malamalama le vasega, e leai se tasi e mafai ona alo mai le faamasinoga amiontonu a le Atua.

TUSI FAITAU: Amosa 1: 1 – 2: 3.

FESOASOANI MO FAIAOGA:

O le masani i faamasinoga, e lua lava itu e i ai. O le itu tagi ma le itu teteet, faapea ai ma le ua fai ma faamasino na te faia se faaiuga tatau e fua i luga o molimau e folasia e itu e lua. O faamasinoga masani ia o lo o faia i Mulinuu mo so o se solitulafono, faapea foi

i mataupu tau i fanua ma suafa. E le gata i Samoa nei, ae o lo o faatino foi i so o se atunuu lava.

Peitai, ua le o lea le faamasinoga o lo o faatatau i ai le mataupu o lenei Aso Sa, o lo o talanoa i le faamasinoga fai toatasi a le Atua i lana pule fai toatasi i le tagata na Ia fai. E le o faatatau i se faamasinoga a le tagata i ona tuaoi, ina ua sopo le isi i tuaoi o fanua po o tofi tuufaasolo mai i tuaa. O le faamasinoga a le Atua ia Iuta ma Isaraelu, faapea ai ma o latou nuu tuaoi. O lea o lo o faailoa mai i le tusi lenei a le perofeta o Amosa. O le tusi lenei a Amosa o lo o matamata tetele ai le faailoa e le perofeta o le aso o le Alii. I lona faauigaina, o le aso faamasino po o le aso e oo mai ai lona toasa e pei ona folafolaina ia Iuta ma Isaraelu, faapea foi ma nuu tuaoi; e pei ona amata ai lava le tusi i le aumai taitasi ai o nuu ma o latou agasla ma le sala e oo ia te i latou. E foliga mai ai o lo o ua tuu faatasi ai e le Atua Iuta ma Isaraelu ma nuu faapaupau i se fua faatatau e tasi ua lanutasia uma. Peitai e tasi foi le auala ua manatu le Atua ina ia faamamaina ai faatasi i latou uma faatatau ia latou agasala. O se faiga ua faailoa mai ai e le Atua, e leai lava se tasi e mafai ona fai se 'alofaga mai lana faamasinoga amiontonu e oo lava ia Iuta ma Isaraelu i lo latou ifo i tupua ma o latou ala le amiontonu. O faiga ia ua alia'e ia Iuta ma Isaraelu ona ua latou faitaaga i tu ma aga faapaupau a nuu tuaoi, ua afua ai faiga le tatau ua faia e o latou taitai. O le faamamafa ai la e lenei aso sa o faamasinoga i e tuaoi, ua aumai manino ai i le finagalo o le Atua, ia faailoa atu i nuu tuaoi, o Ia o le Atua mo tagata uma. O lana faamasinoga foi e mo tagata uma ma atunuu uma, aua o Ia lava na faia le foafoaga i le amataga.

O se feau taua foi lea mo i tatou le fanau, ia tatou ola ma le mautinoa, e leai lava se tasi e mafai ona maua se 'alofaga mai le faamasinoga amiontonu a le Atua. E leai se tasi e tu mo i tatou, ua na o i tatou lava ma le faamasinoga a le Atua soifua. Ia faia le amiontonu ma savali i ala o le Atua, ona mautinoa lea ua lava tapena i tatou mo lea faamasinoga pe a oo mai. O Iesu lava ua Ia aumaia le taiala moni e tapena ai lo tatou ola ina ia oo mai le faamasinoga a le Atua a ua tatou lava tapena.

GALUEGA FAATINO: FA'AALIGA O MANATU.

Ia tapena mai sau tala tusitusia e faailoa ai ou manatu e uiga i le tatou mataupu e pei ona faamatalaina e le faiaoga. Ia lava le itulau e tasi. E fautuaina foi le fesoasoani a lau susuga i le faiaoga.

PESE: Tulai, tulai, ua valaau Iesu ina tulai.

A'OA'OGA:

1. E leai se tasi e mafai ona alo mai le faamasinoga amitonu a le Atua.
2. Ia tatou tapena ma sauni nei oo mai le aso faamasino.

.....

ASO SA:

2 IULAI 2023

MATAUPU: *VAAI MA LAGONA LE OO MAI O SUIGA FOU A LE ATUA.*
(See and hear God's coming revolution)

SINI:

Ia malamalama le vasega, e le mafai ona iloa e mata o le tagata ma lagona i lona lotu suiga fou a le Atua, pe a le avea ma eleele lelei.

TUSI FAITAU: Mataio 13: 1 – 17.

FESOASOANI MO FAIAOGA:

O le fesili tele lava i le mataupu o lenei Aso, o a suiga fou a le Atua o lo o talanoa i ai le autu. Po o ni suiga i le vaaiga masani i le siomiaga o le tagata, e pei o mea o le foafoaga. Pe o le a avea le sami ma vai magalo, po o se tasi mea e ese mai vaaiga masani

o aso uma. Aemaise ai, pe faapefea foi ona iloa ma lagona e le tagata le oo mai o nei suiga fou. Pe faailoa mai i le iliina o se pu, pe tataina ni logo; aua a tatou mafaufau loloto i ai i le fa'aaogaina o le upu vaai ma le lagona. O veape e faatinoina ma galueina e mata ma taliga sei tulou. Ioe, o le upu moni lava e leai, e tasi lava le faamoemoe ma le auga o suiga fou a le Atua, e mo le tagata ina ia fai ni suiga lelei i lona soifua talitonu i le Atua.

O le tala sa faitauina mai le Tusi Paia, o le faataoto a Iesu i le tagata lulu saito. Na pauu isi i le auala ma aina e manu. Pauu isi fatu saito i le mea papa, ua velasia i le la ma magumagu ai ona ua leai ni ona aa. Ua pauu isi i le mea o i ai le vao tuitui, ona fetinaiina ai lea, a o isi ua pauu i le eleele lelei ona fua mai ai lea e taiselau i nisi, taionogafulu i nisi, ma taitolugafulu i nisi. O le lulu saito, o Iesu lea ma lana fatu saito; o ana a'oa'oga eseese i le malo o i le lagi. O ituaiga eleele, o ituaiga tagata eseese ia ua faalogologo ma vaavaai i mea e tele ua faia e Iesu i lana galuega talai. O lo o faamatala ai le taua ma le manulauti o le galuega na afio mai ai Iesu. O le naunautaiga lea o lo o taoto i totonu o lenei faataoto, ina ia faia se galuega i isi eleele ina ia suia e faia ma eleele lelei. A o le silafia foi lea o lo o i ai ia Iesu i le toatele o le motu o tagata; o lo o i ai tagata eseese ia e pei ona Ia faatusaina i eleele eseese o lo o taua i le faataoto. O le ala foi lea o lana tali na tali atu ai i le fesili a le au so'o; pe aisea ua Ia fetalai atu ai ia te i latou i faataoto. O le uiga o le manatu i le tali a Iesu, ina ia matua tatalaina la latou faalogo ma ia matua vaa'i o latou mata ma lagonaina i o latou lotu uiga loloto o ana fetalai e uiga i le malo o le lagi. E foliga ai, ua tuu atu e Iesu le galuega i le tagata lava ia ina ia galue ai le tagata mo le faaleleia o lona tagata ina ia atagia ai suiga fou mai le Tala Lelei ua Ia aumaia e fai ai i latou ma eleele lelei mo le malo o i le lagi.

E faapea foi mo i tatou; ua tatou iloa le Tala Lelei ua i o tatou laufanua, ua tatou faalogologo i tala ia Iesu, ae le o mafai ona faafouina ai lo tatou ola i suiga fou mo le ola o le tagata o lo o aumaia i le Tala Lelei. O lo o manino mai ai le vaa'i o tatou mata faale-faatuatua ae tatou te le iloa. Ua faalogologo foi o tatou taliga ae lē lagonaina i o tatou lotu le uiga moni o suiga fou ua

aumaia e le Atua mo i tatou e ala i le Tala Lelei, ina ia avea ai i tatou ma eleele lelei mo le malo o i le lagi. Afai e le o i tatou o ni eleele lelei, ia toe sasaa le fafao e ala i la tatou amio ma le faatinoina o lo tatou ola galulue mo le Tala Lelei ina ia faailoa ai ua tatou talia ma lagoina i o tatou loto suiga fou ua finagalo le Atua e faafouina ai lo tatou ola faale-faatuatua. O le faafouina lava lea o i tatou na afio mai ai Iesu ma aumai le faaolataga mo tagata uma, ina ia salamo ma avea ma eleele lelei mo le Atua ma lana feau.

GALUEGA FAATINO: TUSIGATALA

Tusi mai sau tala e faatatau i le mataupu o lenei Aso Sa ma faailoa mai ai se suiga fou o lo o e manatu e faia mo oe ma lou olaga. Ia le sili atu ma le laupepa e tasi.

PESE: Fai mea tonu o mea lelei.

A'OA'OGA:

1. Ia fai se suiga lelei i lou olaga.
 2. Ia lagonaina i o tatou loto le suiga fou mai le Atua.
 3. Ia avea i tatou ma eleele lelei.
-

ASO SA:

9 IULAI 2023

MATAUPU:

VAAI MO NI FAAILOGA
(Looking for signs)

SINI:

Ia malamalama le vasega, o le tagata ua matua talitonu ma tumau i le faatuatua i le Tala Lelei ia Iesu, e le toe tau saili mo ni faailoga ma ni faamaoniga.

TUSI FAITAU: Mataio 16: 1 – 12.

FESOOASOANI MO FAIAOGA:

O faailoga, o ni faailoilo o lo o faailoa mai ai ni mea o le a tutupu po o ni mea o le a oo mai. E pei ona i ai le tele o talitonuga a le atunu. A mumu ataata o le taeao o le lagi ona i ai lea o le manatu o ataata fasia. A faauli mai ao o le lagi ona manatu lea o le a i ai ni timuga ma le tele lava o isi mau faailoga ua talitonu i ai le atunu. O faailoga e faamaonia ma faamautinoa ai le moni ma le faamaoni o mea ua talitonu i ai tagata.

O faailoga foi nei e vaiaia i le foafoaga na molimau ai foi tagata o Iutaia a o i ai faatasi ma Iesu e pei ona ia fetalai ai foi. Peiseai o le uiga o le fetalaina lea a Iesu, aisea e mafai ai ona latou faitauina faailoga mai vaaiga e faailoa mai e le gasologa o mea o le foafoaga, ae le mafai ona latou talia faailoga o lo o vaai ai i vavega na te faia. Peitai, e tasi lava le mafuaaga o lo o nanau i ai le au Faresaio ma le au Satukaio mo se faailoga; ina ia faamaonia ai o Iesu o le Tupu, o Ia o le Alo o le Atua, aemaise o le pule o lo o faia ai e Iesu le tele o vavega. Peitai na o le faailoga ia Iona le perofeta na tuuina atu ai e Iesu ia te i latou. O le faailoga lea i le tolu ai o po, tolu ao o lo o i ai Iona i le manava o le i'a ae le uma ai lona ola. E peiseai ua fetalai Iesu i le au Faresaio ma le au Satukaio ina ia to manatu po o le pule a ai na tupu ai ia mea. Pe le o ala tutusa ma mea o lo o vaai ai i vavega o lo o faia e Iesu i lea vaitau. O uiga taulamalama ia o le au faresaio ma le au satukaio ina ia aveesea ai Iesu mai totonu o le sosaiete aua ua toatele tagata ua mulimuli ia te Ia ae faaleaogaina ai lo latou tulaga faataitai o tagata Iutaia. Peitai ua oso ai ma masalosaloga a le au so'o, ina ua fetalai atu Iesu ia te i latou ia matua alo ese ma le mea faafefete a le au faresaio ma le au satukaio. A ua latou manatu i le le aveina o ni areto peitai ua le o lea le mea faafefete o lo o fetalai ai Iesu. O le amio taulamalama ma le loto leaga o lo o fa'aalia e le au faresaio ma le au satukaio ia latou aloese ai. Ua manino ai le le atoatoa o le faatuatua o le au faresaio ma le au satukaio ua latou teena ai le talaiga a Iesu ma fesiligia ai se

faailoga e faamaonia ai o Ia o le Alo o le Atua. E faapea foi i le au so'o ma le latou mafutaga ma Iesu, na ona mafuta ae latou te le matua tumau ai i le tele o vavega na faia e Iesu e fai ma faailoga ia te i latou, e moni ma faamaoni o Iesu lea ua afio mai, o le Mesia ma le Faaola mo tagata uma.

Ua faamanatu mai foi lenei tala mo i tatou le fanau ma i tatou uma. O lea ua fai i tatou ma tagata faatuatua i le Tala Lelei ia Iesu Keriso le Alii ma le Faaola. Afai ua tumau lo tatou ola faale-faatuatua, aisea tatou te saili ai mo nisi faailoga e faamaonia le moni ma le faamaoni o le Tala Lelei ua aumaia e Iesu mo i tatou. E pei lava ona fetalai Iesu ia Toma; amuia e le vaai mai ae talitonu mai pea. E faapea se lagona mo i tatou, ia tatou faia faapea e pei ona aumaia i le uiga o le upu faatuatua; faalagolago ma faamoemoe i mea e le vaaia. Ioe, tatou te lei mafuta ma Iesu ae ua lava tala o le Tusi Paia e fai ma faailoga ma molimau mausali i lo tatou ola faale-faatuatua.

GALUEGA FAATINO: Tusigasolo

Tusi sau solo i le autu; “O IESU LE ALO O LE ATUA” ia le silia ma le fa fuaiupu, ae ia tai fa laina i le fuaiupu. Faamatala mai ai ou lagona ma lou talitonuga ua i ai i le autu e pei ona aumaia i le tatou mataupu.

PESE: O Iesu o le vine moni.

A'OA'OGA:

1. O Iesu o le Alo o le Atua soifua.
 2. Ia alo ese mai le tau faaleaga.
 3. Ia tumau lo tatou ola faale-faatuatua i le Tala Lelei ia Iesu.
-

ASO SA:

16 IULAI 2023

MATAUPU:

ALOFA E TUMAU (Steadfast love)

SINI:

Ia malamalama le vasega, e tumau pea le alofa o le Atua ia i tatou i taimi uma ma aso uma

TUSI FAITAU:

Salamo 33

FESOASOANI MO FAIAOGA:

O le Salamo e 33 o lo o vivii ai le fai Salamo i lona Atua ona o lona alofa e tumau ma e moni ma faamaoni lana tausiga i le tagata i aso uma. Ua matua talitonu ma le loto atoa le fai Salamo i lona Atua, le ala lea o lona naunau ai pea e vivii ma faafetai i aso uma e sulaina ai le pule aoao ma le matautia o le Atua. O le Atua mai lava i le amataga ina ua Ia foafoaina le lagi ma le lalolagi, sa na ona fetalai atu lava ona i ai lava lea o le sami, le lauelele ma le vanimonimo atoa ai ma lona faia o manu ma laau ma le tagata ola. Le alofa tumau lava lea o le Atua na te tausia ai ma le faapelepele lana foafoaga aemaise lava i le tagata. Ia tatou lagonaina le loto tele ma le fiafia aua po o a lava luitau ma faafitauli e tutupu i lo tatou ola, o le mea ia tatou mautinoa o le silasila mai fofoga alofa o le Atua mo tatou. E le lilo i tatou i fofoga alofa o lo tatou Atua aua o Ia na te faamalosiau mai ma lavea'i i tatou mai le matapoto a le fili ma le tiapolo. O le mea lea ua faamanatu mai ai e le fai Salamo ia i tatou, e tatau ma onomea ona tatou vivii atu ma faafetaia le Atua aua ua Ia taitai saogalemu le ola o le tagata mai totonu o le lavelave o fita ma tiga o le ola. Po o fea lava tatou te o i ai, o lo o faasaga mai pea le Atua ma alo mai ona fofoga e puipui ma laveai le tagata e sulu atu ia te Ia mo se mapusaga.

Ua matagofie foi le faamanatu o lenei Aso Sa mo tatou le fanau i le tele o le mau faafitauli ua siomia ai tatou i nei onapo. Ua tatou vaavaai pea i le lolofi mai o suiga o le soifuaga ua aafia ai le va o

matua ma fanau, ma ua tele ai ina malepelepe aiga, toatele fanau le aooga, tele fanau solitulafono ma ua le maua ai ni lumanai manuia. O le mafuaaga – ua tau mamao matua ma le Atua i le a'oa'oina o fanau, ua leai se alofa i matua ma ua leai se upu e a'oa'oina lelei ai fanau. Fanau, ia tatou mautinoa o a faafitaui e tutupu ia te outou, o lo o faasaga mai lava fofoga alofa o le Atua mo tatou. Po o le a lo tatou faia pea o mea sese i le tele o taimi, e tumau pea le alofa o le Atua i taimi uma ma aso uma. Ia aua nei galo, e ao ona tatou salamo mai a tatou agasala ma taumafai e sailili i ala o le Atua i totonu o aiga, aoga, nuu ma le Ekalesia ina ia o tatou maua pea le mafanafana o le pai mai o le alofa o le Atua. O mea uma na ia faia i lana foafoaga, o ana galuega na saunia ma lona alofa faamaoni i le tagata, ina ia tatou tumau i le amiontonu e fesootai ai ma Ia.

Uiga o Upu:

- i) napeli - e foliga i le kitara ae telē atu
- ii) taupulepulega - fuafuaga

GALUEGA FAATINO: TUSIGA SOLO

Tusi mai sau solo e 2 fuaiupu ae tai 4 laina i le fuaiupu e tasi e faatatau i la tatou matapu o lenei aso *ALOFA E TUMAU*

PESE: Pese ma Viiga – 73

A'OA'OGA:

1. E tumau le alofa o le Atua mo tatou
 2. Ia tatou faamaoni ia tatou galuega.
 3. E ao ona tatou viia ma faafetaia le agalelei o le Atua
-

ASO SA:

23 IULAI 2023

MATAUPU:

FAATALITALI FAAMAONI
(Faithful waiting)

SINI:

Ia malamalama le vasega, o lo tatou faatalitali ma le faamaoni i le faasinoga a le Agaga o le Atua, e tonu ai ma sa'o mea tatou te fai.

TUSI FAITAU: Luka 2: 36 – 38

FESOASOANI MO FAIAOGA:

O Ana o le perofeta fafine, mai le itu aiga o Asera, o le afafine o Fanuelu. O lo o taua, e tusa ma le 84 ona tausaga. Ua matua lava lona soifua a o lo o nofo lava i le malumalu e tatalo ma anapogi. I le fuaiupu e 25 o lo o taua ai le toeaina o Simeona le faitaulaga, o le tagata amiontonu ma o lo o faatalitali o ia i le faamafanafanaina (consolation) o Israaelu. O Ana ma Simeona e mafai ona tatou faapea o ni sui vaaia o le au matutua o le nuu o Ierusalem, sa o la faatalitali ma le onosai, ma le tatalo ma le anapogi, seia oo mai le Faaolataga, po o le faataunuina o le Togiola mo Israaelu, e ala ia Iesu Keriso le Mesia. Ua o'o le taimi ua atoa ai le 8 aso talu ona fanau Iesu, ua ave o ia e ona matua i le malumalu seia faataunu le Tulafono o le faamamaina, e pei o tu ma le aga a Israaelu i ana tama tane e fananau mai. O le malumalu lava lenei o lo o tatalo ma anapogi ai Ana, o le malumalu fo'i lenei sa taitaiina ai e le Agaga o le Atua ia Simeona, ua vaaia ai e Simeona ma Ana le FAAOLATAGA, o Iesu le Mesia, o le na te aumaia se suiga tele mo Israaelu, ma ia faia se togiola ma se laveaiina mai le olopalaina o Israaelu e pulega sauia a Roma i lena vaitaimi. O lo'o aumai fo'i lenei tala mo i tatou le fanau, e ao ona tatou faatalitali ma le faamaoni i le Atua na te auamai faamanuiga mo i tatou. Ia tatou onosa'i i

aoga, usitai ma faalogo i matua, faifeau ma toaga i le lotu ma le aoga Aso Sa ona faamanuia mai lea o le Atua ia te i tatou.

GALUEGA FAATINO: FAATALATALANOAGA

E talosaga atu i lau susuga le faiaoga e ao ona faatalatalanoaina lenei mataupu ma le fanau ma tu'u i ai se avanoa e faaali ai ni o latou manatu ina ia iloa ai lo latou malamalamaaga i le tusi faitau.

Fesiliglia tamaiti ina ia aumai so latou manatu, po o le a na faatalitali ai Simeona ma Ana i le fanau mai o Iesu.

PESE:

Le alofa o le Atua e ofoofogia x3
Le alofa silisili lea mo a'u
E mauluga ou te le a'eina
E maulalo ou te le mouluina
E lautele ou te le opoina
Le alofa silisili lea mo a'u

A'OA'OGA:

1. Ia tatou faatalitali ma le faamaoni i le faasinoga a le Atua
2. Toaga e tatalo ma anapogi.
3. Ia maua le onosa'i ae le o le fiu gofie.

.....

ASO SA:

30 IULAI 2023

MATAUPU:

IOSEFA, TUUINA ATU I AI LE MALOSI TELE (Joseph entrusted with great power)

SINI:

Ia malamalama le vasega, o le malosi o le Atua na mafua ai ona pule Iosefa i Aikupito

TUSI FAITAU: Kenese 41: 33 – 46

FESOASOANI MO FAIAOGA:

O le tala ua tatou faitauina mo lenei Aso Sa, o le faaeaina lea o Iosefa i totolu o le malo o Aikupito ina ua tofia o ia e Farao e fai ma alii sili e pule i le malo atoa. O lenei tofiga ua tuuina atu ia te ia, ona o lona mafai ona faamatalaina o miti a Farao. Ua pule ma fa'aaloalogia Iosefa e tagata uma o Aikupito, ma ua ia galue foi e atiae le malo atoa ina ia tapena e teu ma faaputu saito mo le fa'aaogaina pe a oo mai tausaga e fitu o le oge. O Iosefa o le tama Eperu sa faamaoni ma faalagolago i le Atua, lea lava ua oo ai ina faaeaina ma faamanuiaina lona olaga i totolu o nuu ese. O ala ia e lei mafaufauina e Iosefa aua sa feagai o ia ma le tele o faafitauli, mai lava i totolu o lona aiga i le va o ia ma ona uso, ae faapea foi i Aikupito ina ua tuuina atu o ia i le falepuipui.

A o i tatou te iloa ai le malosi tele o lo tatou Atua sa auauna ma faalagolago i ai Iosefa. Le malosi lea na Ia tuuina atu ia Iosefa na mafai ai ona ia tetee atu ma faatoilaloina ai faafitauli na tutupu ia te ia, a o le malosi lava lea na mafai ai ona ia faamatalaina miti a Farao ma faaeaina ai o ia e pule i Aikupito atoa. E ese le malosi tele o le Atua sa auauna ma tautua i ai Iosefa, aua o lea lava ua fa'aalia lana pule aoao e le gata o Israaelu ae faapea foi i nuu ese. Le malosi tele lea sa i le loto o Iosefa na mafai ai ona ia onosaia tiga ma faaosoosoga na oo ia te ia, aemaise ai o lona tumau pea lea ma faalagolago i lona Atua ma lona talitonuga, e leai se mea e faigata ia te Ia.

Fanau, e ese le matagofie o lenei tala e uiga ia Iosefa ma mea uma na faia e le Atua ia te ia. O lea ua tatou mautinoa nei o le malosi tele na tuuina atu e le Atua ia Iosefa, na mafai ai ona malosi lona loto e tumau pea i le Atua, ma ia faatoilaloina ai faaosoosoga a le tiapolo na semanu a fano ai lona ola. Lea lava na oo ina faaeaina e Farao e fai ma pule o Aikupito atoa, ona o lona faamaoni ma lona loto tele. O a faafitauli e tutupu i lo tatou ola, manatua le Atua o lo o faatasi mai pea mo tatou i taimi uma ma aso uma. Na te le tuulafoaiina i tatou pe afai tatou te faamaoni

ia te Ia i aso uma o lo tatou ola. Ia tatou toaaga e mafuta ma faalagolago i le Atua e ala i le tatalo, toaga i le lotu ma le Aoga Aso Sa faapea Aoga o lo o aooga ai. Faalogo ma usitai i matua, faifeau ma soo se tasi lava. A tatou faamaoni i nai mea iti ia, ona aumaia lava lea e le Atua o le malosi tele i o tatou loto e mafai ai ona tatou faia so o se mea lelei ma faaeaina ai i tatou i faamanuiaga eseese e foa'iina mai e le Atua.

Uiga o Upu:

- | | | | |
|------|--------------|---|--------------------------|
| i) | tausaga mau | - | vaitaimi e tele ai meaai |
| ii) | oge | - | leai ni meaai |
| iii) | fano | - | feoti |
| iv) | Sapenapaenea | - | o le fa'aali o mea lilo |

GALUEGA FAATINO: TALIGĀ FESILI

Tali mai fesili nei e tusa ma lou malamalamaaga i le tala:

1. O le a le tofiga ua filifilia i ai e Farao Iosefa?
2. Faamatala mai uiga o tausaga mau e fitu ma tausaga oge e fitu
3. O ai foi le isi igoa o Iosefa, a o le a foi lona uiga?
4. O ai le igoa o le avā a Iosefa?
5. E fia tausaga o Iosefa ae tofia loa e Farao?

- PESE:**
- | | |
|----|--|
| 1. | O lo'u malosi x3
Malosi x4
O lo'u malosi x3
E aumai e le Atua |
| 2. | O lo'u ola x3
Lo'u ola x4
O lo'u ola x3
E aumai e le Atua |

A'OA'OGA:

1. Tatou te mafaia mea uma i le faatasi mai o le Atua
 2. E aumai e le Atua le malosi e faatino ai a tatou galuega
 3. E pule aoao le Atua i mea uma.
-

ASO SA:

6 AOKUSO 2023

MATAUPU: O LE ATUA NA TE FAIA (The God who will)

SINI: Ia malamalama le vasega e pule aoao le Atua i mea uma.

TUSI FAITAU: Kenese 3: 1 – 15

FESOASOANI MO FAIAOGA:

O se tala manino ma le malamalama i le ulua'i agasala a le tagata i le amataga o le foafoaga. O le mea moni, na matua'i manino lava le fetalaiga a le Atua ia Atamu ma Eva i le amataga. Peita'i ina ua ōia le va nonofo ai o Atamu ma Eva faapea ma le Atua, o iina na taunu'u ai loa ma lana fa'amasinoga. Ina ua fa'aosoosoina i laua e le gata e aai i le fua o le laau na fa'asaina e le Atua. Le sa'olotoga ma le tofotofoga a le Atua na tu'u i le tagata i le amataga, aua o Ia o le Atua na Ia faia mea uma.

Ae ui i lea ina ua o la aai le fua o le laau, fai mai le tala na pupula ai o laua mata, ma ua laua iloaina ua le lavalava. O le taimi a na aai ai i laua i le fua o le laau, o le taimi foi lena na agi malie mai ai le matagi i totonu o le faatoaga, ma ua la iloaina ua i ai le Atua. Ua lagona le fefevale ma le popole, ia Atamu ma Eva. O le Atua e na te silafia mea uma, e ati lana silafaga i totonu o le tagata. Ae afai o le Atua e na te silafia mea uma, aisea na ia valaau ai ia

Atamu po o fea o ia? Ua leva ona silafia e le Atua le mea o lo'o i ai Atamu.

Ae na fesili le Atua, se'i tofotofu ia Atamu po o le a sana tali. Ae sau le tali o lo o i le fuaiupu e 10 "Na ou faalogo atu i lou siufofoga i le faatoaga, ona ou fefe ai lea, aua ua ou lē lavalava; ona ou lafi ai lea". E ese lea ituaiga pepelo na pepelo ai e Atamu le Atua. O le tali a le tagata le mautonu. E le i ai lava ma se taimi na faatoese ai Atamu i le Atua ona o lona sese ma le mea ua tupu. Afai na fesili le Atua, e tatau i le tagata ona lagona lona sese ma lona salamo, peita'i e le i lagonaina e Atamu ona ua manatu ua fia atua o ia. Ua tu'ua'i e Atamu i le Atua ona o le fafine na Ia aumai. Ua tupu lona to'asa, ma ua Ia fetalai tu'u sa'o i ai o le a ia faatupuina le feitaga'i ia te i laua, faapea fanau e tutupu mai ai ia te i laua.

E le i manatu Atamu ma Eva e faatoese i le Atua ona o lo laua agasala, ae foliga mai o lo o sa'i i le Atua ona o le Atua na faia i laua ma mea uma o lo o i ai. Ua tau tu'ua'i i le Atua, toe tu'ua'i i le gata o le afuaga lena o le tupu ai o le faa'fitauli. Ae le o le finagalo lena o le Atua. O le finagalo o le Atua o Ia na faia le tagata, o Ia e pule. O le pule a le Atua ma lona malosi e ao ai ia Atamu ma Eva ona vivii ma viia pea lona Suafa e faavavau. Peita'i ua 'olegia le Atua, ma ua leai se salamo ma se loto maulalo e faatoese ai.

O le feau foi lea mo le tatou vasega i lenei taeao, o le Atua na faia i tatou o Ia foi e puleaoao i mea uma lava. O le fesili mo oe le tama ma le teine aoga, o le a la sau tali atu i lena alofa? E ala lea i lou faalogo ma usitai i ou matua, ona maua ai lea e i tatou o le mea lelei. O le Atua na Ia faia i tatou, o i tatou o tagata tautua, tatou te faia lona finagalo ma viia lona Suafa mammalu.

GALUEGA FAATINO:

Faamatala uiga o fuaiupu o le a ta'ua i lalo:-

Fuaiupu 7 – "Ona pupula ai lea o laua mata, ua la iloa ua le lavalava i laua; ona la fatu ai lea o lau o le mati ua fai mo laua titi"

Fuaiupu 15 – "ou te faatupuina le feitagai ia te oulua ma le fafine, o lau fanau foi ma lana fanau; na te tuimomomoina lou ulu, a o oe e te tuimomomoina lona vae"

PESE: Le Alii e, le Atua e, (Pese ma Viiga 5)

A'OA'OGA:

1. E pule aoao le Atua i mea uma lava
2. Faalogo ma usita'i i le fetalai mai o le Atua ia i tatou
3. 'Aua nei se'etia gofie i tatou i auala a le fili e ono lamatia ai le ola

.....

ASO SA: **13 AOKUSO 2023(Aso Sa o Tamā)**

MATAUPU: **O LE MOE GASE A ATAMU**
(Adam's deep sleep)

SINI: Ia malamalamalama le vasega i le Silisili Ese o galuega mamana na faia e le Atua

TUSI FAITAU: Kenese 2: 21 – 25

FESOOASOANI MO LE FAIAOGA:

O le molimau lava ia a le au Eperu, o le isi lea uiga o le moe o le oti. E mafua ona o le taimi o lo o fai ai le malologa, e ta'oto ai i lalo ma malolo. Ua gagase atoa le tino ma ua le toe mafai ona minoi o lo o malolo po o ua (*relax*). Le ala lena fai mai a moe e pei lava o le tagata ua oti ua noa lava le mafaufau ma ua le toe i ai se faamoemoe. Atonu e tau faapena le moe na moe ai Atamu, o le moe a le tagata ua leai se faamoemoe. Peita'i o le moe a Atamu, e le gata ua moe, ae na fa'amoegaseina e le Atua.

O lona uiga e mafai ona aumai ai se ata e faapea, a o'o ina moe le tagata e faamoe e le Atua. O lo o taoto ai le pule fai toatasi a le Atua, aemaise o le gasologa o mea o le foafoaga. E faapena le taimi na moe gase ai Atamu, ae se'i fa'aali le silisili ese o le Atua. Na fa'aalia e ala i le faia o Eva ina ia fai ma fesoasoani mo Atamu.

O lo o manino lava le fa'ataotoina e le Atua o ana fuafuaga tu'utu'u mamao. Ina ua la faamoegase ia Atamu ona toina a'e lea o lona ivi asoaso ma na faia ai Eva. O le fesili e ao ona faatupu manatu pea, pe aisea lava ua le faia ai Eva i le eleele e pei ona mua'i gaosi ai e le Atua Atamu. Ae aisea foi le ivi mai le itu ae le mai se isi vaega o le tino? O le faailoga o le fesootaiga ua feululufai, o le faailoga o le mafutaga fesootai ma le vavalalata a le tane ma le fafine. Ae ua ala foi ona fa'aaoga le ivi mai le itu, ina ia o tutusa, aua nei pule i le tane, pe pule ai le tane.

Fai mai le molimau a se tasi o scholar "*Eve was made by God not out of his head to rule over him, nor out of his feet to be trampled upon by him, but out of his side to be equal with him, under his arm to be protected by him, and near his heart to be loved by him.*"

O le taua lena o fesootaiga faa-le-tagata, o mafutaga e faatino ai le alofa o le tasi i le isi, o fesootaiga e fesoasoania'i ai le tasi i le tasi, e faamalosiau ai i le ua faavaivai, e faalototole foi i le ua palaii, ae faapea foi la ma le faamama avega i le ua tigaina. Aua foi o mea ia e afua mai ai le filemu moni pe a oo ina mafanafana ma mausali le ola mafuta ma le ola fesoottai o le tasi i le isi. O le uiga lena o le moe gase a Atamu, faamoegase e le Atua, ae faatino lona finagalo paia. Lona finagalo na Ia soso'o ai le mafutaga a Atamu e ala i le faia o Eva mai lona ivi asoaso, o le ivi o ona ivi. Na moe o toatasi ae ala ane ua toa lua; o le a le uiga o lea mea. O le faailoga o so'otaga vavalalata ua mafutaina i le alofatunoa o le Atua.

O le filemu o le ola fesoottai lea na faatino ai le galuega faaola a Keriso. Po o le a lava le mamafa ma le faigata, o a foi tiga ma puapuaga, na le foi ai lava, auā na ia maua pea le filemu ma le

loto tele mai le Atua e faatino ai le faaolataga e ala lea i lona mafuta ma fesootai atu ia te Ia i le tatalo.

GALUEGA FAATINO: Fetufaa'iga

Manaia ae vaevae le vasega i ni vaega se lua pe tolu foi, ona faa talanoa ai lea o fuaiupu taitasi ma faamatala o latou uiga. Ina ia malamalamala atili ai le autu, aemaise lava i le moe gase a Atamu ma le fesootaiga o le toe faia ai e le Atua o Eva e tusa o le pule fai toatasi a le Atua.

PESE: My God is so big

A'OA'OGA:

1. E fai e le Atua mea silisli mo le tagata.
2. O so'otaga vavalalata e afua mai so'otaga o le tasi i le isi e ala i le alofa.
3. O le faamoe gase a le Atua, na tupu ai se moemoe fou e ala i lana foafoaga.

.....

ASO SA:

20 AOKUSO 2023

MATAUPU:

LAGONA O LE FAAGAE'ETIA?
(*Feeling overwhelmed?*)

SINI:

Ia malamalamala le vasega, i le lagona faagaeetia o le tagata pe a faamafanafanaina e le Atua

TUSI FAITAU:

2 Korinito 1: 1 – 14

FESOASOANI MO LE FAIAOGA:

O a foliga vaiaia o le tagata pe a o'o ina faagaeetia? O le a le taimi e tupu ai le faagaeetia? A o le a foi le uiga o le upu faagaeetia? O le faagaeetia e mafai ona faamatalaina o le ola fafia, o se olaga sa'oloto ua faatupuina ai pea le olioli i se tagata sa saisaitia i lalo o se puleaga malosi a se isi tagata.

O le manatu autu ua avea o se fesili mo le tagata faatuatua, lagona faagaeetia? E foliga mai i le fesili, e peiseai o lo o i ai se mea o loo saisaitia ai le tagata. E faapena se lagona o lo o i le aposetolo o Paulo e tusa o lana molimau i le 2 Korinito 1 e pei ona i ai le faitauga o lenei aso. O le mea moni e tusa o le molimau a le Aposetolo, e leai se vaipanoa o le ola pagatia ma le pologa e na te le i o'o i ai. E le gata o ia o le aposetolo aemaise i tagata kerisiano o loo talitonu pea ma mulimuli ia Iesu Keriso.

O lo o taua i le fuaiupu 8, le fa'aaoagaina e Paulo o le vaega o le gagana o le upu "Matou" faapea mai "Aua le au uso e, **matou** te loto ina ia outou iloa lo **matou** puapuaga na oo mai ia te i **matou** i Asia, sa silisili ona mafatia tele ai o i **matou**, e le i au i ai lo **matou** malosi, na oo lava ina **matou** masalo ai a **matou** oti". O i o lo o ta'u mai ai, e le na o Paulo la lea e pagatia i le vala lea. Masalo o lo o faasino ia Paulo ma nisi o misionare faapea le au faatuatua kerisiano uma o lo o mulimuli ia Iesu Keriso.

A o le vaitau tonu o le malosi o sauaga i totonu o le malo o Roma, na matua'i iloga ai lava ona sauaina ai tagata kerisiano. O le taimi o sauaga mo le au faatuatua, o le taimi foi lena na pa'i mai ai le aao lavea'i o le Atua e faamafanafana i le tagata. Ua faamafanafanaina le tagata mafatia ona o le Suafa o Iesu Keriso. E pei e teena e tagata Korinito le Iesu toetu, aua foi o lo latou talitonuga e le maliu se Iesu. Manatu o le ala lea na matua'i tete'e ai tagata Korinito ia Paulo aemaise o le talaiga o le Tala Lelei ia Iesu.

E le i faigofie le galuega o feagai nei ma Paulo, peita'i na i ai le talitonuga o le aposetolo e le mafai ona tuulafoaiina e le Atua o ia. Lea e pei ona taua le fuaiupu e 3 i le 7 le faamafanafanaga a le Atua mo le tagata puapuagatia. O le uiga o le faamafanafanaga a

le Atua, e lavea'i ma faamafanafana faatasi ai ma le faamoemoe ina ia toe atoatoa le tagata. E faamafanafana le Atua i le tagata, e faapena foi ona ofo atu e i tatou mo le isi uso a tagata o loo manaomia le fesoasoani. E puapuagatia le tagata ona o Iesu Keriso ma lana Tala Lelei, a o le Atua e na te faamafanafanaina i tatou.

O le uiga foi lea o le mataupu mo i tatou le Vasega Matutua, o le fesili Lagona faagaeetia? O le tali; Ioe, e lagona faagaeetia le tagata kerisiano pe a pa'i mai aao alofa o le Atua e faamafanafana ia i tatou. Ua faamafanafanaina o tatou tiga ina ua o tatou faia mea e tusa o lona finagalo aemaise o lana valaau mai ia i tatou. E aveesea e le Atua o tatou faafitauli uma, pe afai tatou te talitonu ma faatuatua ia te Ia e faavavau.

GALUEGA FAATINO: Taliga Fesili

1. E mafai ona e faamatalaina foliga o le tagata ua faagaeetia?
2. O ai na tusia le tusi o 2 Korinito?
3. O le a le uiga o le upu Aposetolo?
4. Aisea ua sauaina ai Paulo?
5. Faamatala po o ai o lo o faatatau ai le upu "Matou" i le tusi na faitau?
6. Tusi mai i lalo i ni au lava upu le fesootaiga o le manatu autu o le aso nei ma le Tusi Faitau 2 Korinito 1: 1 -14.

PESE: Ua ou viivii ma Faafetai (Pese ma Viiga – 71)

A'OA'OGA:

1. E faamafanafanaina i tatou e le Atua i taimi o puapuaga
2. Ia viia le Atua pe a o'o ina faagaeetiaina i tatou
3. Lagona le faatauvaa ma le loto maulalo pe a o tatou faia le finagalo o le Atua.

.....

ASO SA: **27 AOKUSO 2023**

MATAUPU: **FAANOANOAGA FAA-LE-ATUA?**
(Godly sorrow)

SINI: Ia malamalama le vasega o le faanoanoaga
faa le Atua e tupu ina ua agasala le tagata

TUSI FAITAU: 2 Korinito 7: 2 – 16

FESOASOANI MO LE FAIAOGA:

A o'o ina tutupu faafitauli i le soifua ma le ola o le tagata, o lona uiga ua i ai le sasi i le va nonofo ai. E pei foi ona i ai i le amataga o le foafoaga ia Atamu ma Eva, lea na agasala ai le uluai tagata, atonu na faanoanoa le Atua ona o le mea ua tupu.

E faapena foi le agaga o le mataupu i le faanoanoa ai o le Atua e pei ona molimau ai le aposetolo o Paulo i lana tusitusiga. Lea e fai mai le fuaiupu e 10 "Aua o le tiga e tusa i le Atua e tupu ai le salamo e o'o i le faaolataga e le toe saafi ai; a o le tiga faalelalolagi e tupu ai le oti". Mafua ona tupu le faanoanoa o le Atua ona o amio a le tagata. E pei foi ona molimau ai o le fuaiupu e 10, a o'o ina faanoanoa le Atua ona salamo a lea o le tagata e tusa o lana agasala. A o le agasala foi lena, a le mafai ona salamo ma fulitua le tagata mai le leaga, e le mafai lava ona faaolaina ma e le maua ai lava se fiafia.

Fai mai Paulo a o le tiga faalelalolagi e tupu ai le oti, o lona uiga o mea uma lava e tutupu i le lalolagi o mea e faia i lalo nei, o mea e pala. O lona iuga o le oti, a o mea faalelalolagi nei ua fai ma ala ua nanau tele ai le loto o le tagata, ona avea lea ma faanoanoaga sili i le Atua. E faapena le lagona o le Atua o i ai i le tusi atu o le aposetolo o Paulo i Korinito. Aemaise ai o le tulaga o i ai a'oa'oga e faatatau ia Iesu Keriso. Peitai e le i mapu le aposetolo e tauologologo atu, lea lava na fa'aalia e ala i lana molimau i le o'o mai o Tito ma faamafanafana ia i latou. O se lagona faatupu malosi i le tagata faatuatua e ui i le agasala.

E le gata i lea o le fiafia o le aposetolo o Paulo ina ua mafai ona faamafanafanaina loto o tagata mafatia. Aemaise ai o le talaiga o le loto salamo, ina ia mafai ona maua uma e tagata o i Korinito. Aua pau lea o le auala e mafai ai ona liliu le faanoanoa o le Atua, o le tagata ua salamo moni ma foi atu i le Atua. Le ala lea na mitamita ai Paulo ona o Tito ma lana galuega na faia i Korinito lea ua saga faamausali ai lava le faatuatua o tagata. Fai mai le fuaiupu e 13 "O le mea lea na faamafanafanaina ai i matou i le faamafanafanaina o outou; sa matua tele lo matou olioli; ua atili ai ona o le olioli o Tito, aua sa toofilemu lona loto ia te outou uma"

O le uiga foi lea o le tatou mataupu i lenei aso, faanoanoaga faa le Atua. O le faanoanoa o le Atua ina ua tupu le agasala i le va nonofo ai ma le tagata. Faanoanoa ina ua sese le faatinoga a le tagata, ma ua le savali i le ala e ao ona mulimuli i ai. Ae le tumau ai pea le tiga o le Atua, e i ai lava le taimi e faamafanafana mai ai ma pa'i mai lona Agaga ina ua maua e le tagata le loto salamo moni ma le faatuatua moni i le Atua.

GALUEGA FAATINO: Faamatala uiga o upu o lo o taua i lalo

Salamo, puapuagatia, faamafanafana, olioli, faatiga, faalelalolagi, faaolataga, agaleaga, faatuatua, mitamita, to'afilemu

PESE: Fai mea tonu o mea lelei (Pese ma Viiga -)

A'OA'OGA:

1. Ia maua le loto salamo moni i le Atua
2. E alofa le Atua ia i tatou i taimi uma
3. O le faanoanoa o le Atua e mafai ona liua pe a talitonu ma faatuatua moni ia te Ia.

.....

ASO SA:

3 SETEMA 2023

MATAUPU:

O LE Ā SE ANAPOGO E TALIAINA?
(What is an acceptable fast?)

SINI:

Ia malamalama le vasega o le anapogi, o lo tatou tatalo faatasi lea i le Atua mo le fesoasoani ia i latou o feagai ma mafatiaga eseese i lenei ola.

TUSI FAITAU:

Isaia 58: 3 – 11

FESOASOANI MO FAIAOGA:

O le mataupu o lenei Aso Sa ua aumai o se fesili. O le ā se anapogi e taliaina? E atagia i le fesili, e lē tasi se ala e faatinoina ai le anapogi. E tofu foi le tagata ma lona talitonuga e uiga i le anapogi.

O Israuelu ma lona tala faasolopito, tasi lea o auala sa o latou faatinoina e fesoota'i ai i le Atua. O le anapogi e ala i le tatalo, o le lē ai, ma le lē inu, ae tu'u atoa le loto i le Atua, ia manuia le feagai ai o Israuelu ma taua.

O le tasi auala e faatino ai le anapogi, o le nofo i le efuefu ma le ie talatala, o le faailoga o le loto ua tuu atu i le Atua, ona ua lagona le salamō faamaoni mai agasala ma le leaga sa i ai. O le tagata ua mo'omia le faamagaloga.

Peitai ua ese le faataua a Isaia e uiga i le anapogi, o lo o ia naunau i ai mo Iuta, ma tagata o le Atua. Ua faasoa Isaia ia iloa e tagata ona olaina tigā o isi. Ia fetausia'i le fanau a le Atua, ina ia maua e tagata uma le filemu.

Afai o le faamoemoe o le anapogi, ina ia alofa ma manatu mai le Atua i lana tagata, ia maua le manuia ma le filemu. Ia faapena foi ona amata i le tagata. Ia muai faatino lou agalelei atu i le isi uso o mo'omia le fesoasoani. Ia e faatupu le filemu, ma ia fefaamagaloa'i, ma ia maua le fefaamafanafanaa'i.

O le taua lena o le anapogi o lo o molimau i ai Isaia. O le anapogi, o le avanoa ma le laolao lelei e mafuta ai le tagata ma lona Atua, i le loto ua faamaulalo, ma le salamō faamaoni. O le faamoemoe ia tumau faamanuiaga, ma ia maua pea le filemu o le Atua.

O le uiga lea o le anapogi ua manatu i ai Isaia ia a'o'a'oina ai le fanau a le Atua. E leai se aoga e anapogi ai, ae lē mafai ona galulue faatasi, leai se filemu e maua i le va ma le isi tagata, lē maua le alofa faasoa, ma le alofa e maua ai le mafanafana o le uso o saisaitia.

O le ituaiga anapogi lea e taliaina e le Atua. O le galuega e faatino i le loto atoa ia maua le filemu ma le manuia mo tagata uma. O le ola ofoina mo le manuia o isi tagata. O le anapogi e tusa ma le molimau a Isaia, o galuega alofa e te faatino mo le manuia o isi tagata. O le ū faatasi o lau tatalo i le Atua ma le ofoina atu o lou ola e auauna ma galue, mo le manuia lautele o le fanau a le Atua.

GALUEGA FAATINO: Faatalanoaga

Faamatala mai le uiga o le anapogi i lou lava malamalama, ma le faatinoina o se anapogi ua e silafia.

PESE: Pese 122 (Pese ma Viiga)

A'OA'OGA:

1. Ia faamaoni i le Atua.
2. Ia ū faatasi le tatalo ma galuega.
4. Ia iloa ona ola faasoa.

.....

ASO SA: **10 SETEMA 2023**

MATAUPU: **TULAFONO FAIGATA MA LE ALOFA TATAU.** (Tough law and proper love)

SINI: Ia malamalama le vasega e finagalo le Atua ia faia mea uma i le alofa.

TUSI FAITAU: Mataio 19: 1 – 15

FESOASOANI MO FAIAOGA:

O lo o tatou i ai i le lalolagi, ma le tele o le mau tulafono o lo o i ai, o tulafono i le nuu, o le atunu, Ekalesia, aoga, falefaigaluega, ma so o se faapotopotoga lava. O le fesili e i ai se aoga o le tulafono i le soifuaga o le tagata.

O upu masani, e leai lava se tagata e sili atu i le tulafono, o lona uiga o tagata uma e tutusa i le vaai a le tulafono. E leai foi se faamoemoe o tulafono ina ia pologa le tagata, ae ia tutusa tagata uma, ia saoloto ma maua le filemu.

Ua le faapea le tulafono o lo o talanoa i ai le au faresaio ia Iesu. Ua omai ma le fesili e olegia ai Iesu ma ana a'oa'oga. Pe sa ea i se tasi ona faatea i lana avā ona o mea uma? O lea ua fetalai manino Iesu o e ua faatasia e le Atua, aua nei faate'aeseina e se tagata. Ua lava le tali lea e iloa ai le finagalo o Iesu.

Peitai, ua le uma le fia iloa ma le faufau leaga o le tagata. Ua latou ta'u mai Mose ma le tusi alei e fai ma molimau ia Iesu, e mafai ona faate'a i le avā. O le tulafono faigata lea o lo o fai ma sasa i nai tinā o le sosaiete, o le tulafono ua fai mo le manuia o isi, ae ua amo e isi o le sosaiete le pologa ma le tusi esea, ona o le vaai maualalo ma le faailoga tagata.

O manatu ia ma lagona o le au faresaio, ua avea o latou tulaga ua faamaualuluga ai, ma ua manatu ai ua sili ona latou iloa le Atua. Ua fiafia e tausi tulafono, mo lo latou lava lelei ae taotaomia ai tagata o lo o mo'omia le fesoasoani. O tulafono o le faamoemoe ia tutusa ai tagata uma, auā e fusia i le alofa, e amanai'a ai tagata

uma e aunoa ma se faaituau. Peita'i ua le o lea le tulafono o loo manana'o i ai le au Farasaio ma ta'ita'i o le lotu Iutaia. Ua leai se alofa e tatau e tutusa ai tagata uma ae ua fa'aaoga le tulafono e fai ai lo latou sa'olotoga ae ua leai se alofa i le ua saisaitia.

Faaiu e Iesu ana a'oa'oga i fanau po o tamaiti. "Ia tu'u mai o tamaiti ia te ia, ae aua le vavao ia te i latou, auā faapei o i latou nei o i le malo o i le lagi. O le au faresaio o taitai, ae ua faigata ona talia Iesu faatusa i le fanau iti e mama o latou manatu, e faigofie ona talia ma talitonu ia Iesu ma lana Tala Lelei.

GALUEGA FAATINO:

Faasoa manatu e uiga i le tatou mataupu.

- 1) O le a Tusi alei?
- 2) O le a e finagalo i ai Iesu i le vao ulugalii?

PESE: 370 (Pese ma Viiga)

A'OA'OGA:

1. Ia faia mea uma i le alofa.
2. Ia faia tulafono i le amiotomu.
3. O le Atua o le alofa lava ia.

.....

ASO SA: **17 SETEMA 2023**

MATAUPU: **E I AI LE TAUSAMAAGA MAUA FUA**
(There is such a thing as a free lunch)

SINI: Ia malamalama le vasega e le faailoga tagata le Atua.

TUSI FAITAU: Mataio 22: 1 – 14

FESOASOANI MO FAIAOGA:

O le tatou mataupu o lenei taeao, ua peiseai o se valaaupu alofa, o le valaaupu ua manino ai o lo o i ai le avanoa mo tagata uma. Ua lē faapito mo ē tauoloa, ae ua oo lava i le ua leai se tupe, lea ua maua le avanoa, auā o lo o i ai le tausamaaga maua fua.

Ae o le ata lea o le malo o le Atua, o lo o taumafai e faailoa ma folafolaina mai, o le malo o le Atua, o le malo mo tagata uma, o ē talia Iesu ma talitonu faamaoni ia te Ia.

I le vaega o le tusi sa faitauina, o lea ua fa'aaoga e Iesu le faataoto e faamalamalama ai le malo le Atua, ma i latou e sao atu i lea malo. O le valaaulia mo le tausamaaga tele, o le faailoga lea o le alofa mai o le Atua, auā ua ia tapena mea uma lava. Peitai, ua le tutusa ma le tali atu o ē na muai maua le valaaupu. O ē na muai valaaulia o taitai o le lotu Iutaia.

O tagata ua faamaualuluga i o latou manatu. Atonu ai ua manatu o i latou o tausi tulafono, o taitai, o tagata filifilia e le Atua. Ae o lea ua afio mai Iesu e talai lona malo, ae ua lē talia le valaaulia. Ua faigata ona talia i o latou loto le uiga moni o le afio mai o Iesu.

O le lē taliaina e tagata Iutaia o le valaaulia, o le avanoa ua latou tatala mo tagata o nuu ese e maua ai lea valaaupu alofa. O e saisaitia ma ta'u maualaloina i le sosaiete lea ua agai i ai le valaaupu. Ae o le valaaulia ua talia lelei i le loto faafetai. O tagata sa lē amanaia ae o lea ua fai ma malo fa'aaloalogia i le pule a le tausamaaga.

E lē o le ata lea o le faaolataga na manatu i ai Iutaia, auā ua latou iloa, ua na o i latou o le nuu na filifilia e le Atua. Peitai e leai, o lea ua afio mai Iesu ma aumai le ata o le malo o le Atua, ua na o i latou e talia, usitai ma faatuatua i le Atua.

E leai se avanoa e toe maua mo ē faamaualuluga ma faasausili i o latou manatu. O i latou ua tete'e ma lē talia le valaaupu mai o le Atua, o lo latou taui o le tau-faitagiaue ma le malaia.

GALUEGA FAATINO:

Tusi sau solo (2) lua fuaiupu (4) fa laina i le fuaiupu.

AUTU: O LE MALO O LE ATUA.

PESE: Lo'u Atua e, ua ou fia ai
Ma e fafaga ia te au.

A'OA'OGA:

1. E pule aoao le Atua.
 2. E tutusa tagata uma i le Atua.
 3. Faalogo ma Usitai.
-

ASO SA: **24 SETEMA 2023**

MATAUPU: **TAPENAGA A LE ATUA**
(God's provision)

SINI: Ia malamalama le vasega e faamaoni le tapenaga a le Atua mo le manuia o tagata.

TUSI FAITAU: Salamo 65: 9 – 13

FESOASOANI MO FAIAOGA:

A talanoa i le tapenaga a le Atua, e manatu le taofi e lē lava upu e faamatala ai le tapenaga a le Atua mo le manuia o le tagata. Mai le nunumi, gaogao ma le pogisa sa i ai le amataga, e tusa ma le molimau a Kenese, ae na foafoa mai ai e le Atua se lalolagi manaia ma le matagofie, ina ia ola manuia le tagata i mea uma.

Le tapenaga lea a le Atua o lo o sapi ma manuia ai le lalolagi uma. O le tamaoaiga o le sami, tainane o le lauelele i manu, o faatoaga i mea toto, ae le gata i lea, o le ea ma vai e tele, ma le

uaga e faasūsū le eleele ina ia maua pea le ola i aso uma. O manuia ia o le Atua, o lea e pese ai le fai Salamo i le mataupu na tatou faitauina. O le tapenaga a le Atua, e afua ai ona maua e le tagata manuia, ae o le ata o le alofa tausi o le Atua e le mavae mo lana tagata na fai.

O le Salamo na faitauina e i ai le talitonuga o le Salamo o le loto faafetai ma le soifua vivii o Israaelu i le Atua, ona o faamanuiaga a le Atua ua afua ai ona seleselē tagata i manuia. O le seleselē ua lava ma totoe ona o faamanuiaga a le Atua i le laueelele. O le faatusaina o le Atua i le vai e faasūsūina ai le laueelele, o le vaitafe e saunia ai saito. O le faailoga lea o le Atua o le ola. O le Atua o le pogai ma le afuaga o mea uma lava.

O le molimau ola lea o le loto faafetai o le fai-Salamo i le Atua. O le tapenaga lea a le Atua, o lo o alaga ai Tavita, o le alofa ma faamanuiaga, ua seleselē ai le tagata i manuia e tele, aua ua le mativa le tagata i meaai o lea aso ma lea aso.

O lona uiga afai o le tapenaga lea le Atua o lo o fai i aso uma o lo tatou ola, e tatau ona tatou lagona le loto faafetai i le Atua, ona ua tatou le fiaaai ona o faamanuiaga ma lana tausiga i aso uma o lo tatou ola.

GALUEGA FAATINO: Tusitusiga

Tusi sau tatalo e faafetai ai i le Atua ona o lona agalelei ma lana tausiga i aso uma o lo tatou ola.

PESE: 92 (Pese ma Viiga)

A'OA'OGA:

1. O le Atua le pogai o faamanuiaga.
2. E tapena e le Atua mea lelei uma mo lo tatou ola.
3. Ia iloa ona faafetai i le Atua.

.....

ASO SA:

I OKETOPA 2023

MATAUPU:

I TULU'IGA O LE LALOLAGI
(To the ends of the earth)

SINI:

Ia malamalama tamaiti, o le galuega tala'i e leai sona muta'aga.

TUSI FAITAU:

Galuega 1: 1 – 11

FESOOASOANI MO FAIAOGA:

E tatou te talanoa loa i le tulu'iga o le lalolagi, ua tatou talanoa i le muta'aga. Ua tatou talanoa i le mea e gata ma pau mai ai le lalolagi. Ua tatou talanoa i le faatausiusiuga. O lona uiga, e leai lava se faamoemoe e toe fa'aauau, mo se isi laasaga po o se isi faaopoopoga le tele o le lalolagi. O lona uiga, e peiseai e foliga mai, o mea uma lava e i ai lona mutaaga.

Peitai o le molimau maumaututu a Luka i le tala sa faitauina, o lo o atagia mai ai, o le Tala Lelei ma le galuega tala'i, e leai sona gataaga ma sona mutaaga. E fa'aauau pea ma faaauau pea.

O le Tusi faitau o lenei taeao, o lo o faamatalaina e Luka o le mafutaga faaiu a Iesu Keriso ma ona so'o. O lea ua oo i lona ituaso e tatau ai ona foi atu i le Tama. Peitai, o lo o mamafa pea i lona finagalo le galuega fa'aauau lea o le a tuuina atu nei i le auso'o latou te fa'aauauina.

Ae ala ona atugalu le Alii Faaola, ona foi o lea lava e silafia lelei e Iesu le tulaga faaletonu o lo o i ai le ola faatuatua o lona auso'o. A lea na matua aliali lava i le taimi na puapuagatia ai le Alii, i le ola faafiti, ma le tutu mamao, atoa ai ma le lalafi i totonu o se nofoaga vaapiapi ina ua maliu Iesu.

Le ala lea na ia toe fetalai faamalosi ai i lona au so'o. "O le a maua e outou le mana, pe a afio ifo le Agaga Paia i luga ia te outou; e fai foi outou ma molimau ia te au i Ierusalem, ma Iutaia uma lava ma Samaria, e oo lava i tuluiga o le lalolagi."

O le upu moni lava, e le oge auala le Atua, e le mafai foi ona mate so o se faamoemoe e finagalo i ai le Atua. Aua foi, o le mea e gata ai le malosi o le tagata, o iina e amata ai le malosi o le Atua, o le mea e muta ai le iloa o le tagata, o iina e amata ai le silafia ma le silisili ese o le Atua. Lea lava ua fetalai manino le Faaola, e le tuu aunoina i latou, ae e maua e i latou le fesoasoani, e maua e i latou le mana, le malosi ma le agavaa e fa'auau ai le galuega e pei ona tapenaina ai i latou e Iesu i aso e tele.

Peitai, e ao lava ina faatali ma le onosai. O le poloaiga lea a Iesu, “ia le tuua Ierusalema, a ia faatali i le mea na folafolaina e le Tama.” O le a lea mea? Le papatisoina o i latou e le Agaga Paia. Aisea? Leaga o le Agaga Paia lea e latou te maua ai le malosi ma le lototeli, e faatino ai le feau ma le galuega a le Alii, e aunoa ma sona muta’aga.

Le fanau e, o le faamanatu foi lea mo i tatou. E leai se mea e gata mai ai lo tatou malosi, pe afai e ‘au i tatou ma tatou faamoemoe i le Agaga Paia o le Atua, e na te fesoasoaniina i tatou. O a mea e gata mai ai lo tatou iloa ma lo tatou malosi, ia tatou manatua lelei, o le mea e gata mai ai lo tatou poto ma lo tatou iloa, e amata ai iina le silisili ese o le Atua soifua.

Manuia tele outou le fanau i le feagai ai ma galuega ma a’oa’oga o lenei vайасо. ‘Aua nei galo, tatou faamoemoe i le Agaga Paia o le Atua, e fesoasoani i so tatou vaivai.

Uiga o Upu:

- i) tulimatai - vaavaai pea i ai
- ii) toe fuatai - toe amata/toe faafou
- iii) tuluiga - muta’aga/faaiuga

GALUEGA FAATINO: Taliga Fesili

1. O ai le fesoasoani o lo o faatalitali i ai le au so’o?
- Tali: O le Agaga Paia

2. O fea latou te faatalitali ai i lona afio ifo?
- Tali: O Ierusalema

3. O ai le tusitala o le tusi?
- Tali: O Luka

PESE: 114 (Pese ma Viiga)

A’OA’OGA:

1. O le Agaga Paia o lo tatou fesoasoani sili.
 2. Ofolina lo tatou ola e fai ma molimau o le Tala Lelei.
 3. ‘Aua nei muta le faamoemoe i le Atua.
-

ASO SA: **15 OKETOPA 2023**

MATAUPU: **SAUNIGA MA LE USIUSITA’I; TEPA I LE ATUA**
(Ritual and obedience: glimpsing God)

SINI: Ia malamalamama tamaiti, o le talitonu ma le faatuatua i le Atua, e tutupu ai vasega i lo tatou ola.

TUSI FAITAU: Luka 2: 21 – 35, 39

FESOASOANI MO FAIAOGA:

O sauniga o nisi ia o vasega tāua i le soifuaga o le tagata, e ao ona tausia pea ma faamamaluina. A o sauniga ia e i ai le talitonuga o so o se tagata Kerisiano, o se avanoa e faanōnōmanū ai le tagata ma lalafo i le Atua pule aoao ona manaoga, ina ia faia pea i ai lana pule faitoatasī.

E foliga faapea se vaaiga o lo o alia'e i totonu o le tala sa faitauina. O le molimau a Luka i se tasi o tu ma agaifanua ua masani ai tagata Iutaia; e faavae mai lalo o le faasinoga o le tulafono a Mose i le Feagaiga Tuai – (Levitiko 12: 1 – 8).

O lea ua oo i le aso e peritome ai Iesu ma tuuina atu ai o Ia i luma o le Alii, e tusa ma le tulafono, *o tama ulumatua uma e taua i latou e paia mo le Alii*. Ona o ai lea o ona matua e ave ia te Ia i Ierusalem.

A o i tonu lava i Ierusalem o lo o i ai le tagata e igoa ia Simeona o lo o faatalitali atu o ia i le faamafanafanaina o Israelu. O ia o se tagata amiotonu ma le mata'u i le Atua, ma ua i luga foi ia te ia le Agaga Paia.

A o le Agaga Paia lea na faailoa ia te ia, e le oo ia te ia le oti seja muia iloa atu e ia le Keriso le Alii.

Fai mai le molimau a Luka, ina ua taunu ane Iesu ma ona matua i Ierusalem, ona faailoa loa lea e le Agaga Paia ia Simeona lea tulaga. Ona alu ane ai lea o Simeona ua sii ma sapai ia te Ia, ma faapea nae, “*Le Alii e, e te tuuina atu nei lau auaua ia alu ma le manua, pei o lau afioga; aua ua iloa e o'u mata le faaolataga mai ia te oe, ua e saunia i luma o nuu uma lava, o le malamalamalama e faamalamalama ai nuu ese, ma le mamalu o lou nuu o Israelu.*”

O upu ia na tautala ai Simeona ina ua ia vaai tino i le faaolataga ua tapena e le Atua mo ona tagata. A o upu foi na matua'i ofo ai Iosefa ma Maria, aua faatoa la iloa foi lea o le tagata e igoa ia Simeona, aemaise lo la ofo i mea ua ta'ua faatatau ia Iesu. O Ia o le Faaolataga ma le malamalamalama ia Israelu ma nuu uma.

Le ala foi lea na faamanua ai Simeona ia te i laua, ma fai atu ia Maria, “*Faauta, ua tuu le tama nei e paauu ai ma toe tutu ai tagata e toatele o i Israelu, e fai foi ma failogga e faaleagaina; e tu'ia foi lou lava loto ia ati i le pelu, ina ia faaalia mai ai manatu o loto o tagata e toatele.*”

O feau foi lea mo i tatou le fanau, e tutupu vavega i lo tatou ola, ina ua o tatou talitonu ma le mautinoa i le Atua. Feagai ai foi o tatou ma aoga, aemaise o le aga atu i suega faaiu o lenei tausaga, o le faamanatu lava lea, o le ola talitonu i le Atua e mafutaina ai i

tatou e lona Agaga Paia, tatou te maua ai le poto ma faia mea lelei ma le tatau e finagalo i ai o Ia.

Uiga o Upu:

i)	peritome	-	faamamāina
ii)	muai	-	taimi muamua
iii)	pauu	-	faatoilaloina
iv)	tutu	-	faaolataga

GALUEGA FAATINO: Tusiga Solo

Tusi mai sau solo e faatatau i le **Tāua o le ola talitonu i le Atua.**

Ia lua fuaiupu ae tai fa laina i le fuaiupu

PESE: 368 (Pese ma Viiga)

A'OA'OGA:

1. O le ola talitonu i le Atua, e manua ai se faamoemoe.
2. Ia maua le onosai e faatalitali ai i le taimi a le Atua.
3. Mafaufau i le Atua i taimi o sauniga lotu.

.....

ASO SA:

22 OKETOPA 2023

MATAUPU: *O SE FAFINE TETE'E*
(A woman resists)

SINI:

Ia malamalamalama tamaiti e le o se mea lelei
le ola tete'e.

TUSI FAITAU: Eseta 1: 1 – 22

FESOASOANI MO FAIAOGA:

A faamatalatala auiliili le uiga loloto o le upu ola tete'e, e lasi ona uiga. Auā e mafai ona toe faauiga faapea o le ola le usiusitai; lē amanaaina se faatonuga po o se tuualalo. Ao ia la uiga uma, e le tau mate lava lona taunuuga, ma e i'u lava i le malaia.

E foliga faapena le tala lea na faitauina. O le ola tete'e o le masiofo o Vasati i le faatonuga a le tupu o Asueru po o lona alii. I le amataga mai o le tala, e uiga ese le tulaga ua oo i ai le mitamita ma le fiafia o le tupu o Asueru ona o le matagofie o lona malo. E le gata i lea ae o le telē ma uiga ese o le mea e pau mai ai tuaoi o lo o i lalo o lana vaavaaiga.

Atonu o le ala lea na tapenaina ai e le tupu se fiafia tele ma ia valaaulia ai tagata e toatele. Ua oo lava foi i alii sili o le malo o Peresia ma Metai, o alii ma alii o itu malo uma. Ua ia faaali atu ai foi lona sosia ma lona mamalu, aemaise o le silisili o le matagofie o lona malualii i aso e tele.

Ua matagofie tapenaga o le maota, “ua tautau ai ie lino sinasina; o ie lelei ma ie uli, na faamauina i maea vavae ma le pāuli i mama ario ma pou sesa; na i ai moega auro ma ario i luga o paepae o paata.” O mea matagofie uma ua tapenaina ai le maota o le tupu, i le aso o le tausamiga.

Ina ua oo i le aso fitu o le fiafia, ona fai atu lea o le tupu i ana eunuka, ina ia latou aumaia lana masiofo o Vasati i ona luma, atoa ai ma luma o le au valaaulia, ina se ia faailoa atu ai ia i latou na molimauina lenei faamoemoe; le lalelei tele o Vasati lana masiofo.

Peitai, ua le o gatasi le mitamita o le tupu i lana masiofo, ma le tulaga ua faia e lana masiofo ia te ia i luma o alii sili ma le au valaalia; ina ua lē talia e Vasati le fanoga o le tupu, ae ua ia tete'e ma le amanaia. A o le itu e aupito sili ona le manuia, ona o lo o filogia le fiafia i alii sili ma tagata maualuluga o le malo, atoa ai ma le anoano o le au valaaulia.

O le tulaga ua faia e Vasati, o lona faalumaina lava lea o le tupu o Asueru i luma o tagata. Ua le gata i lena, pe afai e oo atu lea tala a le masiofo i fafine uma, ona inosia foi lea e i latou a latou tane.

Ae i le faaiuga o le tala, ua tonu ai le manatu o nisi na i ai i lea aso, atoa ai ma le tupu, ina ia toe sailia se isi masiofo a le tupu, e sui ia Vasati. O lona uiga ia tulieseina Vasati mai le lotoa a le tupu, ona ua tete'e i le manao o le tupu.

Le fanau e, o le faamanatu lea mo i tatou. E tāua lo tatou amanaaina o so o se faatonuga ma so o se tuualalo mo i tatou i se tulaga tatou te iloa e lelei ma talafeagai ma i tatou. Aua tatou te le iloa lava, po o i tonu lea ua ui mai ai manuia mo i tatou. A o le ola tete'e ma le faatuiexe, e leai se mea lelei e maua mai ai. Na o le malaia lava ma le inosia, aemaise o le lē toe amanaaina o i tatou i se feau lelei ia fai.

Uiga o Upu:

i)	malualii	-	mamalu
ii)	sosia	-	manuia
iii)	tausamiga	-	taligasuaga
iv)	ie lino sinasina	-	ie paepae mama

GALUEGA FAATINO: Taliga Fesili

1. O ai Vasati?
Tali: Masiofo a Asueru
2. O le a le iuga na oo ia Vasati?
Tali: Le toe avea ma masiofo a le tupu
3. O a ni lagona o le tupu o Asueru ina ua le talia e Vasati lona manao?
Tali: Lagona lona maasiasi ma lona faanoanoa tele ia Vasati.
4. Aisea e matautia ai le ola tete'e? (Tali mai i au lava upu)

PESE: 134 (Pese ma Viiga)

A'OA'OGA:

1. 'Aua le ola tete'e
 2. Amanaia tagata uma
 3. Fai le mea e alofagia ai tatou.
-

ASO SA:**29 OKETOPA 2023****MATAUPU:****O A'U LENEI, IA FAIA LEA**
(Here I am: let it be)**SINI:**

Ia malamalama tamaiti, a valaau le Atua ma fa'aaogaina i tatou, ia tatou usiusitai ma talitonu i ai.

TUSI FAITAU:

Luka 1: 26 – 38

FESOASOANI MO FAIAOGA:

E eseese fa'aaogaina o lo tatou ola e le Atua. O nisi e avea ma fomai, o nisi e avea ma tausi aiga, o nisi e avea ma faifeau ao nisi foi e avea ma palemia. E eseese uma, a o le mea tāua e ao ina iloa ma malamalama ai tatou, o a valaauina ma tofiga ua fa'aaoga i ai e le Atua lo tatou ola, ia o tatou talia ma le agaga faafetai; auā o i na o lo o auala mai ai lo tatou manuia.

E faapea se agaiga o lo o atagia mai i le vaega o le evagelia a Luka na o tatou faitauina nei, o lo o amata lava Luka i le faamatalatala mai ai o le faasinomaga o Maria. O Maria o le tagata mai i le aai o Kalilaia i Nasareta, o le taupou mai le aiga o Tavita, ua faufautane ia Iosefa.

Na afea o ia e le agelu a le Atua ma faapea atu, "Si o'u alofa ia te oe le ua alofaina, ua ia te oe le Alii; "(amuia oe i fafine.)"

O se saunoaga na matuai faateia ai Maria, aemaise ai o le faatoa ia vaai lea ua asiiasi atu se agelu ia te ia ma faailoa atu le mea o le

a tupu. Le ala lea na ia atuatuvalo ai ma ua tautomanatu pe se a ea le uiga o le mea ua tupu.

Masalo ai ana o i tatou lea e tupu ai lenei fa'aaliga, ailoga tatou te talia lea ituaiga fa'aaliga.

Peitai tatou te le tau masina faatasi ma le finagalo o le Atua, le ala lea na fetalai ai le Agelu; "*Maria e, aua e te fefe; auā ua alofaina mai oe e le Atua, faauta foi, o le a to oe, ma e fanauina se tama tane, e te faaigoa ia te ia o Iesu. E sili o ia, e te ta'ua foi o le Alo o le Silisili ese; e foai atu e le Alii o le Atua ia te ia le nofoaiga a Tavita lona tamā, e fai o ia ma tupu i le aiga o Iakopo e faavavaau; o lona malo foi e leai sona gataaga.*"

O upu e faateia ai manatu ma lagona o le tagata. A o upu na lagona ai e Maria lona faatauvaa i luma o le Alii, ma ia faapea ane ai, "*Faauta o a'u nei o le auauna a le Alii; ia faia ia te au e tusa ma lau fetalai.*"

O lona uiga, e peiseai o le lagona o Maria, o lo o faailoa mai ai lona talia o le finagalo o le Atua, e auala mai ia te ia le faaolataga mo le lalolagi atoa.

O le faamanatu foi lea mo i tatou le fanau, e i ai taimi e finagalo ai le Atua ina ia fa'aaogaina lo tatou ola i so o se feau ma so o se galuega ua finagalo i ai. A o le faafitali, e le o lelei la tatou faalogo, ma tatou lagona foi, ae ua tatou faatutugata e faatino ma faataunu. O le toe fafagu, ia lelei la ta faalogo i le valaau mai o le Atua. Ia tatou augofie e ofo atu le ola mo le Alii, e auauna ai ma fa'aaoga le ola mo Ia.

Uiga o Upu:

- | | | | |
|------|--------------|---|----------------------------|
| i) | taupou | - | teine e lei faia se tane |
| ii) | taumanaunatu | - | tau faasolosolo mafaufauga |
| iii) | faamalumalu | - | tumau i ona luga |

GALUEGA FAATINO: Fa'aaliga manatu

Fa'aali sou manatu i se mea tāua ua mafai ona e a'oa'oina mai lenei mataupu

PESE: *Here I am Lord*

A'OA'OGA:

1. 'Aua le masalosalo i le valaau mai o le Atua
2. Talitonu ma le loto faatuatua
3. Ia lagona le faatauvaa i luma o le Atua.

.....

ASO SA: *5 NOVEMA 2023*

MATAUPU: *E TAUUAU INA ITIITI O A'U*
(I must decrease)

SINI: Ia malamalama le vasega, e ao ina fa'asilisili Iesu i mea uma na te faia, ae ia lagonaina lona fa'atauvaa ma le lē atoatoa.

TUSI FAITAU: Ioane 3: 28 – 31

FESOASOANI MO FAIAOGA:

O le tatou matā'upu i lenei taeao tamaiti: **TAUUAU INA ITIITI O A'U.** O se fuaitau o lo o atagia ai le lagonaina e le tagata o lona fa'atauvaa. E iloa ai le tagata e lē fa'amaualuga i ona manatu ma ni ona lagona, e lē se'etia gofie fo'i i ni vi'iiga, pe mitamita vale i sona tulaga maualuga ua i ai. Ae o se **ta'utinoga** e iloa ai, e lē o sona lava poto ma se malosi, ae o le Atua na āfua ai.

O le tusi faitau o le tatou matā'upu i lenei taeao, o le **TA'UTINOGA** a Ioane le Papatiso, se'i tali atu ai i se finauga a isi ona so'o ma le tasi Iutaia, e uiga i le papatisoga o lo o fai fo'i e Iesu i Iutaia. Pe foliga mai, o lo o taumafai e fa'alotoleagaina Ioane, ona ua i ai fo'i lē isi tagata ua ia faia lana galuega o le

papatiso atu. Lea la ua ia ta'utino ai lona fa'atauvaa i lo la va feagai ai ma lona Ali'i Fa'aola o Iesu. O lo o iloa lelei e Ioane lona tulaga ma lona vala'auina. E lē sili atu lava ia iā Iesu. Ua ia aumai ai le ata o se fa'aipoipoga. E le o ia o se tama fa'aipoipo po o le fa'ato'afaiāvā, a'o ia o le uō a le fa'ato'afaiāvā po o le uō sili. E le o ia e autū ai le galuega; o Iesu lava. O lana lea fa'aeaea iā Iesu. Ua ia manatu ai, ia fa'atuputeleina pea le fa'asilisiliina o Iesu, ae ia itiiti ia. Ua na o ia o se 'au'auna. Lea iloa i le fuai'upu e 31. Ua ta'utino ai Ioane, o Lē maliu mai lugā, e sili o Ia i mea uma, o Iesu lea. A o lē mai le lalolagi, e tautala fo'i o ia i mea o le lalolagi, o Ioane lea. O se ta'utinoga, e iloa ai le tagata o lo o ia lagonaina lona fa'atauvaa i le fa'atinoina o lona vala'auina. E le'i fia fa'atautavā ia Iesu, ae na taulamua i le fa'amaualugaina o le Suafa o Iesu.

Vasega Matutua i lenei taeao, lelei Ioane na ia iloa lelei lo la va feagai ai ma Iesu. Ae ana se isi o tatou, e lē mana'o ia itiiti, ae mana'o fo'i ia sili atu ia. O le fe'au, o so o se mea lelei tatou te faia ma ta'uleleia ai tatou, 'aua e te mitamita, ae ia fa'afetai i le Atua, auā o Ia na mafua ai. O lou fa'aeaea fo'i lenā iā Iesu, ae tumau pea lo tatou fa'atauvaa.

Uiga o Upu ma Fuaitau:

- | | | | |
|------|------------------------|---|---|
| i) | fa'ato'afaiāvā | – | o lo o fa'atauvaa iā Iesu.
(o le alii faatoa faaipoipo) |
| ii) | uō a le fa'ato'afaiāvā | – | o lo o fa'atauvaa iā Ioane.
(o le uō sili a le tama faaipoipo) |
| iii) | molimau | – | tagata o lo o fa'amaonia se manatu. |

GALUEGA FA'ATINO:

Fai se su'esu'ega i Molimau a le Au Fai-Evagelia: Mataio, Mareko ma Luka, i le ese'esega o lo latou fa'amauinā o le **TA'UTINOGA A IOANE.** Fa'asoai le vasega, po o atagia ai le tatou matā'upu: **TAUUAU INA ITIITI O A'U.**

Mataio 3: 11-12
Mareko 1: 7-8
Luka 3; 15-17

PESE: Pese ma Viiga 74 (To'atasi Lē ua sili)

A'OA'OGA:

1. Ia iloa ona fa'afeti i le Atua, ona o mea lelei ua ia saunia mo i tatou.
2. 'Aua le fia vi'ia.
3. Tāua le lagonaina o le fa'atauv'a ma le lē atoatoa.
4. Fa'amoemoe i le Atua e manuia ai mea uma tatou te fai.

.....

ASO SA: **12 NOVEMA 2023**

MATAUPU: **TIOATA UA FA'APOGISAINA**
(Grey-tinted glasses)

SINI: Ia malamalama le vasega, o le talitonu ma le fa'atuatua i le Atua, e manino ai le tioata e iloa ai lona alofa tunoa tele i lo tatou ola.

TUSI FAITAU: Mareko 8: 14 – 21

FESOASOANI MO FAIAOGA:

O le tātou matā'upu i lenei taeao tamaiti, o lo o aumai i se ata fa'a-fa'atusa, e tau fa'amatalaina ai mea o lo o māfua ai ona le manino la tatou va'ai atu i le alofa tunoa o le Atua. O le fa'amoemoe lava ia o le tioata po o le matatioata, ia manino ai lau va'ai. A o lea fai mai le tatou matā'upu, **Tioata ua fa'apogisaina**. Ua lē mālamalama pe kilia le tioata, ae ua pogisa.

O lona uiga, ua lē mafai ona manino le va'ai, pe iloa lelei atu ni mea o fia va'ai atu ai.

E fa'apēnā se ata o lo o atagia i le tusi faitau o le tātou matā'upu i lenei taeao. I le molimau a Mareko, fa'ato'a ma'ea lava ona faia e Iesu le vāvega i le fagaina o le motu o tagata i nai areto ma nai i'a lauiti, ma totoe ai toe 'aiga ua fu'e ma tutumu ai 'ato e 7. A o lea ua i luga o le va'a fa'atasi ma Iesu, ae ua popole, ona ua na o le tasi le areto o lo o iā te i latou, ua galo ona ave ni areto. Lea la na apoapoa'i i ai Iesu; *'Ia outou, ia matuā 'alo ese i le mea fa'afefete a le 'au faresaio, ma le mea fa'afefete a Herota.'* (fuaiupu 15) O le fetalaiga lea a Iesu ua iloa ai, e lē o le leai o ni areto o lo o fai ma fa'afitauli, 'ae o le lē talitonu ma le lē fa'atuatua o le au so'o. O mea ia ua fa'apogisaina ai a latou tioata, latou te iloa lelei ma mālamalama ai iā Iesu o lo o latou mulimuli ai. O le mea fa'afefete a le au faresaio ma Herota o lo o tā'ua e Iesu, o le mumusu latou te iloa o Iesu o le Alo o le Atua. Lea āfua ai ona tupu pea le mana'o, ina ia sā'ilii nisi fa'ailoga mai le lagi e faia e Iesu. Auā ana fa'atuatua ma talitonu le au so'o, semanū latou te lē popole, e mafai lava ona fai e Iesu se vavega i le areto e tasi na iā te i latou. E le'i **lava ma totoe** le vāvega na faia e Iesu, e talitonu ma fa'atuatua i ai le au so'o. Lea la na toe fa'amanatu i ai e Iesu i le fuai'upu 17 i le 21.

O le fe'au o lo o aumai e le tatou matā'upu i lenei taeao tamaiti, o mea lelei uma ua tatou molimauina i lo tatou ola i aso uma, pei o le ola ma le mālosi, o le poto ma le atamai, o le alofa o nai o tatou mātua ma isi lava mau mea, ua **lava ma totoe** lea tatou te iloa ai le alofa tunoa tele o le Atua ia i tatou.

Uiga o Upu ma Fuaitau:

- | | | |
|-----|---|---|
| i) | mea fa'afefete a le au -
faresaio ma Herota (f.15) | latou te taliaina Iesu. O le māfua'aga lea o lo o tupu ai pea lo latou manana'o mo nisi fa'ailoga mai le lagi e faia e Iesu.
o 'ato lalaga lapopo'a. |
| ii) | 'ete (f.20) - | |

GALUEGA FA'ATINO:

Tusi sau fa'amālosia'u fa'aleagaga mo tamaiti aoga uma, a o sauni atu ai mo su'ega fa'ai'u o lenei tausaga.

Tusi Faitau: Mareko 8: 14-21

Manatu Autu: LAVA MA TOTOE

PESE: Pese ma Vi'iga 180 (E lelei mea uma)

A'OA'OGA:

1. Ave'ese mea o lo o fa'apogisaina ai lau va'ai atu i le alofa tunoa o le Atua.
 2. 'Aua le popole, ua lava ma totoe Keriso mo i tatou.
 3. 'Aua le mana'o tele.
-

ASO SA: **19 NOVEMA 2023**

MATAUPU: ***TULAFONO O LE OLA MAMĀ – O LE TULAFONO E FA'AALIA AI LE ATOATOA O LE ATUA* (Moral law – the law displays God's perfection)**

SINI: Ia malamalama le vasega, o tulafono uma lava, e lē o se fa'apologaina o le tagata, ae ia fai ma fa'amanatu iā i tatou lo tatou va feagai ai ma lo tatou Atua.

TUSI FAITAU: Teuteronomie 5: 1 – 33

FESOOASOANI MO FAIAOGA:

O le 'auga lava ia ma le fa'amoemoe o tulafono e 10 na tu'uina ifo e le Atua ia Isara'elu, ina ia tausi ai le Feagaiga ma lo latou Atua. E lē o ni tulafono sauā, a o fa'atonuga ua aumai e ola lelei ai tagata Eperu. Ia fai ma ta'ita'itama, ina ia sa'o ma tonu le tali atu a le tagata i le Atua, ina ia fai Isara'elu ma nu'u pa'ia. O lona uiga, o tulafono auā le ola mama o tagata, ae o lo o atagia ai le atoatoa o le Atua.

O le tusi faitau o lenei taeao, o le toe fa'amatalaina e Mose iā Isara'elu o tulafono e 10, e ta'iala ai le olaga ma le va feagai ai o le nu'u ma le Atua. O le uiga tonu lea o le 'upu '**Teuteronomie**'. O le toe faitauina fa'alua o le tulafono. O le toe fa'amanatuina o tulafono, ua uma ona aumai muamua (*Esoto 20*). O le fa'amoemoe o le toe faitauina o tulafono e Mose, se'i toe fa'amanatu iā Isara'elu le latou va feagai ai ma lo latou Atua, a'o le'i ulufale atu i le nu'u folafolaina.

E i ai le mea tāua o lo o fia ta'u atu e Mose i le nu'u, e fa'atatau i tulafono. Lea e i ai le tatou matā'upu o lenei taeao. **'O tulafono o le ola mama – o tulafono e fa'aalia ai le atoatoa o le Atua.'** Fai mai Mose, e le o ni tulafono na fau ona o sona fia fai tulafono (*fuai'upu 2-6*). Ia latou manatua, o tulafono uma nei, na tu'uina mai e le Atua mo Isara'elu, o se vāega tāua o le galuega lavea'i a le Atua mo latou, mai le nofo pologa ai i Aikupito.

Vaevaeina o tulafono: o tulafono nei, e lē gata o tulafono o le va feagai ai o le tagata ma le Atua (*tulafono muamua e 4*); a o tulafono fo'i i le va feagai ai o lē isi tagata ma lē isi tagata (*isi tulafono e 6*). O le toe fa'amanatu e Mose o tulafono uma i le nu'u, o se fafagu lea e lē gata o latou tiute fai mo le Atua, a o tiute fai i le la te tua'oi.

Tamaiti, o le fa'alogo ma usita'i, o le tausiusi ma fai, o le tiute lea o le Isara'elu i lona Atua lea na toe fa'amanatu e Mose. O le ta tiute fo'i lenā, ona tatou manuia lea.

Uiga o Upu:

- i) tulafono – o ni fa'atonuga e fai ma ta'iala ia ola lelei le tagata.
- ii) Feagaiga – maliliega i le va o le Atua ma le nu'u o Isara'elu. 'E fai outou mo'u nu'u, e fai fo'i a'u mo outou Atua.'
- iii) 'ana'ana – fa'aete'ete

GALUEGA FA'ATINO:

Ia a'o fa'atauloto e le vasega tulafono e 10. Ia latou iloa ma mālamalama o tulafono muamua e 4, o tulafono i le va feagai ai o le tagata ma le Atua. O tulafono mulimuli, o tulafono i le va feagai ai o lē isi tagata ma lē isi tagata.

PESE: Fa'alogo ma usita'i.

A'OA'OGA:

1. Ia avea oe ma se tamaitiiti po o se teineitiiti fa'atuatuaina.
 2. Ola fa'alogo ma ola usita'i i le finagalo o le Atua, ona manuia lea.
 3. O le tauis i poloa'iga a le Atua, o le ola mama lava lea.
-

ASO SA:

26 NOVEMA 2023

MATAUPU:

O SE MALOSIAGA FAANATURA
(Sepela ma Pu'a)
(A force of nature [Shiphrah and Puah])

SINI:

Ia a'o a'o le vasega ia malamalama, o le matata'u ma le loto tetele o fafine faatosaga, na faasaoina ai pepe tama tane a Isaraelu.

TUSI FAITAU: Esoto 1: 15 – 21

FESOASOANI MO FAIAOGA:

Ua a'o a'o mai mo i tatou le tāua o le avanoa e faasoa atu ai le alofa mo isi. Auā e lei avea lava le malelega a le tupu, e fai ma mea na taofia ai sootaga o le alofa, i le ola e tatau ona faaauauina e laveai ai le tagata fou.

O le faatonuga e fasiotia tama tane uma, o se ata ua fa'aali mai ai le solia lea e le tagata o le tulafono a le Atua, "Aua le fasioti tagata." E pogisa i le tagata ua leai se alofa, ae manino i le Atua pule aoao galuega alofa a nei tinā o Sepela ma Pu'a sa fai. O nei tinā faatosaga, sa gafa ma le faafanauina o fafine Eperu. O tagata e matata'u i le Atua, e lē usitai i se mea sesē. O lo o ia i laua le ola ma le oti o tamaiti Eperu ina ia manuia o la faiva. A o le faitotoa e gafa ai le tagata ma le malosiaga faanatura a le Atua, e aputiputi ma faafaillele pepe fou o meaalofa mai le Atua.

Na faatonu i la'ua e le tupu o Aikupito o Farao, ina ia fasioti uma pepe tama e fananau mai i fafine Eperu, ae faaola a latou pepe teine. O togafiti leaga a Farao, ina ia tuu itiitia ai le faatoateleina o le nuu o le Atua. Peitai o ala o le Atua, e le o ala ia o le tagata. Finagalo le Atua e lē tatau ona tupu se mea faapea.

O le mea moni, ana lē matata'u Sepela ma Pu'a i le Atua, e leai se Mose ma se Arona. Ana lē matata'u Sepela ma Pu'a, e lē saoloto le nuu. Talofa i le tupu ma lana malelega. Aua ua faasili le mata'u i le Atua. Ua sili le faataua o le avanoa e alofa ai nei, nai lo le faatali mo taeao. O la le fai-Salamo; "Faauta o le fanau, o le tofi lea mai le Alii; o e ua fananau mai, o le taui lea mai ia te Ia." O le finagalo o le Atua, e agalelei i nei fafine, ona o fanau.

Ua faamanatu mai le feau o lenei Aso Sa, tu'u, aua le faia pe a le ō gatasi ma le finagalo paia o le Atua. Ua a'o a'o mai nei tinā, ina ia avea i tatou ma faatosaga o le Tala Lelei. Ia atagia i o tatou olaga le alofa fesoottai e faia galuega lelei, e faavae i le ava ma le mata'u i le Atua.

GALUEGA FAATINO: Taliga Fesili

Fesili ma Tali:

1. O ai Sepela ma Pu'a?
2. Aisea ua lē usitaia ai e Sepela ma Pu'a lo laua valaauiina?
3. E sa'o le faatonuga a le tupu o Farao, e tusa ma aiaiga o le tulafono paia?

PESE: Pese 368 (Pese ma Viiga)

A'OA'OGA:

1. Ia tatou loto tetele e fai le mea sa'o.
 2. 'Aua nei tatou usita'i i faatonuga sesē.
 3. Ia faatino galuega lelei.
-

ASO SA: *3 TESEMA 2023 (Aso Sa o le Etiveni)*

MATAUPU: *VAEGA O SE TALA ATOA*
(Part of a bigger story)

SINI: Ia malamalama le vasega, o le ta'uua ai o i tatou o Kerisiano i le Ekalesia a Keriso, ia tatou iloa ona faafetai ma viia le Atua i mea uma.

TUSI FAITAU: Efeso 1: 1 – 10

FESOASOANI MO FAIAOGA:

Tasi lea o faitauga a le au-kerisiano e mafaufau loloto ai i le sauni atu i le fanau mai o le Mesia. O ni tapenapenaga e matala ai faitotoa o le fiafia e talimalo mo valaaulia fegasoloa'i i lea itu ma

lea itu o le lalolagi. O lea ua tatou sauni atu i le taunu mai o se tagata aloaia, ia po o se mea pito sili ona tāua, lea pei ona i ai lo tatou tapenaga o fai, e faamanatu le taunu mai po o le liutino tagata o le Atua e ala i le pepe o le kerisimasi.

O le Tala Lelei ua tatou mauaina mai le Atua; ae ua tino mai ia Iesu Keriso le Alo pele e toatas. Ae a saili le va nonofo o le Atua ma le tagata. O le isi lea igoa o le Atua e iloa ai o Ia. O le Atua o le Ola, O le Atua o le Matagofie, O le Atua Malosi, O le Alii o le Filemu.

O le tusi a Paulo ia Efeso e aofia ai ni a'oa'oga ma le faamoemoe o le Atua mo le faaolaina o le tagata ae le i faavaeina le lalolagi faatasi ai ma auga o lea faamoemoe. Po o fea lava foi se paganoa e agai ai le tagata, e afio ai lava le Atua. A o le faalavelave o lo o faamanatu mai e Paulo, tatou te lē o iloa le Atua.

O le a'oa'o mai a Paulo, o le silasila lea a le Atua i le faaolataga o le tagata e amata mai i le filifilia e le Atua o le tagata ma lona fuafuaina o le faaolataga. Pei ona i ai se vaega o le fuaiupu 6, “*ina ia viia ai lona lava alofa tunoa ua silisili...*” E faamanatu mai ai le faamoemoe tutasi i le faaolaina o le tagata, o le ave ai o le viiga i le Atua ona o lona Alofa Tunoa.

O se tala e atoa ai le avea o i tatou ma tagata faatuatua faakerisiano, po o le tautua faa-aposetolo, po o le tautua faasoo ia Iesu Keriso, a o le mea sili faimai Paulo, e oo ai le viiga i le Atua. Fanau, e lē o le poto ma le atamai, a o le usitai, faalogo ma mata'u i le Atua.

GALUEGA FAATINO:

Manaia ae fai se faatalatalanoaga a le vasega, e faamanatu ai le taua o le feagai ai ma a'oa'oga i le amataga o le tausaga seia oo mai le faaiuga. Ae o le a foi le galuega a le Agaga o le Atua.

PESE: Pese 82

A'OA'OGA:

1. O le Atua silisili ese, o Ia lava e atoatoa lona alofa mo i tatou.
 2. Na faia e le Atua mea uma o lona atoatoa matagofie ina ia tatou ola manuia ma fiafia ai.
-

ASO SA:**10 TESEMA 2023****MATAUPU:**

**E MAFAI E LE ATUA ONA FA'AAOGA
SO O SE TAGATA E FOLAFOLA
LANA UPU** (God can use anyone to preach his word)

SINI:

Ia malamalama le vasega, e fa'aaogaina e le Atua tagata uma mo Lana galuega.

TUSI FAITAU:

Efeso 3: 7 – 13

FESOASOANI MO FAIAOGA:

“O sē lē ave lona satauro, ma ua lē mulimuli mai ia te au, e le mafai ona fai o ia mo'u so'o.” O le ala tatau lea i so'o se tagata, ona fa'aaogā tatau avanoa tāua, ua totofī ma filifilia ai, aua a faatamala, pe fa'atalalē, ona moni ai lea o le upu, *ua mele manu*. O tofiga uma foi, ua i ai laina taiala e faatonutonufolau ai le tiute tauave a le tagata. Tasi lea o aiaiga tupito e pei ona toe faamanatu mai e le apostolo o Paulo. O le apostolo ua filifilia, e amo le satauro o Iesu Keriso ma mulimuli i tulaga aao o Iesu.

E peiseai ua toe faamanatu mai e Paulo i lenei faitauga, taimi o lona laititi. Aemaise o lona sauāina o le au-kerisiano seia oo i le fa'aaogaina o ia e le Atua e folafola Lana Upu ma faailoa atu le Tala Lelei i tagata uma. O le tautinoga lea a le apostolo ua faailoa atu i le Eklesia i Efeso, i le galuega a le Atua e

fa'aaogaina ai lo tatou itiiti ma amanaiaina ai lo tatou faatauvaa. O lona uiga, e tāua le fuafua tatau, taga'i lelei, ma mata'alia. Oe le *tama* ma le teine aoga, e itiiti oe ae tāua i le Atua. O le finagalo o le Atua, ia faamaoni i nai mea itiiti, e manuia ai lau aoga, e manuia ai lou aiga, aemaise lau Ekalesia.

O le feau lea mo tatou fanau, e fa'aaogaina e le Atua lo tatou itiiti ma le faatauvaa. Ae ala na lē fa'aaogaina e le Atua, ona o i tatou lava. Tatou te faamaualuluga. Tatou te fia malolosi. Tatou te faamaumau taimi. Iesu Keriso sa le manatu i sona mamalu, ma sona lava lelei, ae ua faatino lana auaunaga mo lo manuia i lona malo e faavavau faavavau lava.

GALUEGA FAATINO: Fa'aaliga Manatu.

Tusi mai sau aotelega (summary) o le Tusi Faitau o lenei aso, e faailoa mai ai ou lagona i le mataupu o lenei Aso Sa.

PESE: Pese 259 (Pese ma Viiga)**A'OA'OGA:**

1. Ia e faamaoni i lou valaauina.
 2. E leai se mea e faigata i le Atua pe a talitonu i ai.
 3. Ae faamaoni I mea itiiti, e te pule i mea e tele.
-

ASO SA:**17 TESEMA 2023****MATAUPU:**

**OLA I LE MALAMALAMA
(Living in the light)**

SINI:

Ia malamalama le vasega, o le savavali faatasi ma Iesu, o le ola lava lea i le malamalama.

TUSI FAITAU: Efeso 5: 1 – 14

FESOASOANI MO FAIAOGA:

O le savaliga faa-le-faatuatua, o le savali lea i le malamalama. E le o faatatau i se savaliga e pei ona masani ai. A e faatatau i tu ma aga e ao ona ola ai le tagata Kerisiano. O le mafua’aga lea o le vaega lenei o le tusi a Efeso sa faitauina. Ma o le aotelega foi lea o le feau a le Apostolo i tagata o le Ekalesia i Efeso. O le Ekalesia lenei i Efeso, sa faavae lava e le Apostolo, ua vave ona tupu le galuega ma ua tauleleia foi le ekalesia. O lona uiga o lo o lelei a le galuega, peitai o le tusi atu a Paulo ia Efeso, e le o se tusi e tali atu ai i ni faafitauli, po o ni uiga faataute’e i totonu o le Ekalesia. A o le tusi e faamalosiau, ma faalaei’au mo le au Kerisiano uma i Efeso, ina ia tumau pea lo latou faatuatua i le Tala Lelei o le faaolataga e ala ia Iesu Keriso.

O lenei faamalosiau, o lo o faamatala ai e Paulo le natura ma foliga o le Ekalesia, ma luitauina ai foi le au faatuatua ina ia galulue peiseai o i latou o le tino o Keriso i le lalolagi. Lea e faapea mai ai Paulo, “ia savavali i le alofa, faapei o Keriso foi na ia alofa mai ia i tatou.” A o le fesili, e faapefea ona savali ma faatino lea ituaiga alofa?

Fai mai Paulo, o le savali lea e pei o le tagata e savali i le malamalama. Manino lava le fa’aaogaina e Paulo o ia upu, i le tufaafeagai o le malamalama ma le pouliuli, e faatusatusa ai amioga e lē tatau ona fai, ma le ituaiga olaga e tatau ona savali ai le tagata Kerisiano. O le savali o le tagata i le malamalama, o le savavali lava lea ma Keriso Iesu. Aua fai mai Paulo, o fua ia o le malamalama, o le agalelei uma lava, amiontonu, ma le faamaoni. O aga ia e faamalamalamainai ai “galuega le aoga a le pouliuli.” O lona uiga, e manaomia le tagata e tu malosi, tumau i le amiontonu ma le faamaoni, ina ia aua lava nei toe tosina i tu ma aga a tagata o lo o ola lava i le pouliuli. Faapei o le faatoga a Paulo ia Efeso, ina ia feala ia, ma faanatinati ese mai faaososoga o le pogisa.

O se fesili faatupu manatu, e faafefea la ona tatou ola i lea malamalama i nei ona po?

O lea ua o tatou lata atu i le faaiuga o lenei tausaga, ma ua lata foi le taimi e faamanatuina ai le afio mai o lo tatou Alii Faaola o Iesu Keriso. Tatou te tomanatu ai i le fetu pupula sa fai ma taiala i le ‘au Makoi, ina ua o latou saili po o fea o lo o fanau ai le tupu. Ae sa faamalamalamainai lava e le Atua o latou ala, ina ia o latou molimauina le afio mai o le Mesia, o le Tupu, o Ia foi e malamalama ai le lalolagi atoa. Afai la tatou te ola ai i le malamalama lea, ma savavali ai i le alofa lea o Keriso, e faapena foi ona faamalamalamainai ai nisi o loo ola lava i le pouliuli.

GALUEGA FAATINO: Tala Fa’ata’ita’i

(Pule oe pe filifili ni tamaiti e faatino, pe avatu faafesili i le vasega atoa):

Sauni atu se tamaititi e alu i le aoga, ina ua agai atu i le aoga ua savali atu a le tamaititi ae fetaui ma lana uo, la feiloai fiafia ma o fiafia i le aoga. Alualu a ae toe fetaui le toalua lea ma le isi o la uo. Peitai, ua ese le mea ua tau agai atu ai lea tama. Fai atu loa le alii lea i le toalua, e aua latou te o i le aoga, ae o e tafafao ma matamata se latou ata tifaga. O le fesili la e tuu i tamaiti: pe o i le aoga (malamalama) pe o i le tifaga (pouliuli)?

(*E mafai ona fesuia’i mea e agai atu ai tamaiti [aoga, lotu, autalavou, Aoga Aso Sa etc.] ma mea e tosina ai o latou loto [tifaga, tafaoga etc.] ae ia maua lava le agaga o le tala*)

PESE: Si malamalama laititi / This little light of mine

A’OA’OGA:

1. Ia tatou savavali i le alofa, e pei ona alofa mai ai Iesu ia i tatou.
2. Ia ola i le malamalama, ae le o le pouliuli.
3. O fua o le malamalama o le agalelei, amiontonu, ma le faamaoni.

4. Aua ne'i faatosina i tatou i faaososoga faapouliui a isi o lo o fai.
-

ASO SA: **24 TESEMA 2023**

MATAUPU: **SA I LE AMATAGA LE UPU**
(In the beginning was the Word)

SINI: Ia malamalama le vasega, o le “Le Upu” e pei ona fa’aaogaina e Ioane, o Iesu lava lea sa i le amataga.

TUSI FAITAU: Ioane 1: 1 - 9

FESOASOANI MO FAIAOGA:

E tulaga ese le molimau a Ioane i le Tala Lelei ia Iesu Keriso, e pei ona faamauina e Mataio, Mareko ma Luka. Aua e amata mai i le foafoaina o le lagi ma le lalolagi mai le amataga. E tau foliga tutusa ma le tala o lo o i le tusi a Kenese. A e a fua foi i le tala o le foafoaga, e tai tutusa lava o la faamamafa. Aua o le faamamafa a Ioane, o le taumafai e faamatala le itu faale-Atua a Iesu, a o le tusi a Kenese o lo o faamamafaina ai foi le malosi o le Atua ma lana pule aoao. O le mafuaaga lea o le fa’aaogaina e Ioane o “Le Upu” e faamatalaina ai Iesu.

Ua o tatou malamalama i le tala a Kenese, e afua mea uma o le foafoaga, ona na fetalai i ai le Atua ona tupu lava lea. Afai la o lo o fai mai Ioane, “Sa i le amataga le Upu, sa i le Atua le Upu, o le Atua foi le Upu, O lona uiga, O Ia lava o le Atua sa i le amataga. Na ia faia mea uma lava.” O lona uiga, o Iesu o le fofoga paia a le Atua ua liutino tagata, ma ua afio mai i le lalolagi ina ia susulu atu ai le malamalama o le Atua i tagata uma. O lona uiga, o Iesu o le faatusa ola ma le paia o le Atua, o Le na faia le lagi ma le lalolagi ma mea uma o lo o i ai, o Lē o lo o faatumauina mea uma

lava ia te Ia. O lona uiga, e matua faamamafaina lava e Ioane le faasinomaga faaAtua o Iesu.

A o le auga ma le faamoemoe o lo o taua i le fuaiupu e 7, “ina ia faatuatua i ai o tagata uma lava ia te Ia.” O le molimau a le evagelia a Ioane i le Tala Lelei ia Keriso, e mo tagata uma. O le ala foi lea o le fai mai o Ioane, o Iesu o le malamalama moni lea, na te faamalamalamaina tagata uma, na te faasinoina tagata uma i le Atua, na te a’oa’o mai foi i ala e tatau ona savavali ai.

O le aso a taeao, o le aso faapitoa e faamanatuina ai le afio mai o lo tatou Alii Faaola o Iesu. O le afio mai lava lea o le Atua ua liutino tagata. O Lē sa i le amataga, ma e faavavau lava o Ia. Na Ia afio mai e faailoa ala o le Atua i le lalolagi, o lona soifua mai e faamalamalamaina ai i latou uma o i le pouliuli. O le malamalama moni lea e faamalamalamaina ai tagata uma.

O fesili faatupu manatu.

Aisea la tatou te lē faapea ai? Ae oa foi ni auala e mafai ona tatou fa’apupulaina ai le malamalama o Keriso i o tatou olaga? A lea ua ia i tatou le Atua, ina ia avea lava le soifua o Keriso e fai ma taiala, e faasusuluina ai le malamalama i tagata uma o le lalolagi.

GALUEGA FAATINO:

Vaevae le vasega i ni vaega se lua ma faatalanoa po o a ni mea e tutusa ai ma mea e eseese ai – Ioane 1:1-3 ma Kenese 1:1-3
(Compare & Contrast)

PESE: Se pese o le Kerisimasi.

A’OA’OGA:

1. O le alofa lavea’i o le Atua
 2. E pule aoao le Atua i mea na ia fai.
 3. O Iesu o le upu o le ola mo tagata uma.
-

ASO SA: 31 TESEMA 2023

MATAUPU: **O LE ALA MA LE UPU MONI MA LE OLA**(The way and the truth and the life)

SINI: Ia malamalama le vasega, o Iesu o le Ala tatou ui ai i le Ola Faavavau.

TUSI FAITAU: Ioane 14: 6 - 14

FESOASOANI MO FAIAOGA:

Upu ia na fetalai ai le Alii Faaola i ona so'o, "O a'u nei le ala, ma le upu moni, ma le ola; e le alu atu lava se tasi i le Tamā, pe a le ui mai ia te au." O le tali lea a Iesu ia Toma ina ua ia faamatala atu i ona so'o le mea e faataunuina ia te ia. A ua manino ai foi, pau lava lea o le ala e ui ai tagata uma i le Tamā, ua na o Keriso Iesu. O Ia o le fa'aaliga atoatoa o le Atua i le lalolagi. O le mea lea, e le mafai ona iloa e le tagata le Atua, pe a aunoa ma le iloaina o Iesu. Aua o Iesu o le ala tatou te sao atu ai i le Tamā. O Ia o le upu moni, o le faataunuina o folafolaga uma a le Atua mai lava i le amataga. O Ia o le ola ua saofaga ai tagata uma i le ola faavavau. E afio mai e faamalamalama i le lalolagi e le gata o Ia o le ala, a o Ia foi o le upu moni.

Ua valaauna foi i tatou e Iesu ina ia o tatou talitonu ma le faatuatua, o lo tatou ala lea i le ola e faavavau. Ma ia malamalama tagata uma, O Ia o le malamalama o le lalolagi, o lē e afio mai e fa'aola ma fa'amālōlō tagata puapuagatia ma saisaitia i le fili ma ana mailei. O le mea moni, e le faigofie lea ala ma lea upu moni. Ae mafai ona atagia lea vaaiga i lo tatou soifua ma le ola pe afai tatou te agalelei atu, maua i tatou le agamalu ma le onosai, ae faasilisili ai le alofa.

Aua nei galo, o le fanau mai o Iesu Keriso i le ala maulalo ma le faatauvaa, o le ala sili foi lea e ao ona o tatou ui ai, ma aua nei galo o lona fanau mai ma lona maliu o le Tala Lelei lena, o le upu moni lena e tatau ona o tatou ta'uta'u pea i lea aso ma lea aso,

ona o tatou maua ai lea o le ola e faavavau. Aua e pei ona fetalai Iesu, o Ia o le ala, upu moni, ma le ola.

GALUEGA FAATINO: Talanoa

Faasoa ma le vasega i le fesili ua tuuina atu:
Pe faapefea ona atagia ia i tatou o Iesu le ala, le upu moni, ma le ola, e taumafai ona faailoa atu i tagata e le iloa Iesu?

PESE: 371 – *Laulau mai pea* (Pese ma Viiga)

A'OA'OGA:

1. Ia faatuatua ma talitonu ia Iesu, tatou te maua ai le ola e faavavau
2. Aua nei galo le alofa laveai o le Atua i le lalolagi.
3. O Iesu o le ala, upu moni ma le ola.

.....